

# In o O'ohanas g Ha'ichu hab ha-Juni g Jesus Chuhchai

---

**1** Ni-nawoj map ab si tatchua g Jiosh:

Am ant ep wo i em-o'ohani ahni Luke mant wa heki hu m-o'ohani hegai mash wa haschu hab junihim ihda Jesus ch haschu ha mashcham eda mash am oimmelhim ha shahgid g Tutuligo hemajkam.

<sup>2</sup>Hekia S-ap'ekam Gewkdag ash wa ab mahkch g Jesus g gewkdag. Kutsh heg am ha'i i ha chuhcha k am ha mashcha g e-chehanig.

<sup>3</sup>Mtsh am hahawa sho'igchud k mua. Tsh wabshaba uhpam ep e chegito k am e chegid ha wui g e-chuhchai ch nahnko masma wohokamchud mo d doakam. Kush idam mu'ikko neid am oidam g gi'ikko wehst-mahm tash matsh eda koi im hu i e bei dahm kahchim wui. Sh g Jesus mu'i ha'ichu ha mashcham ab amjed g Jiosh kownaltalig.

<sup>4-5</sup>Sh wa am hu hebai am e hemapadch. Sh hab kajj g Jesus ab ha wui, “Mat ab i em-mah g John g pahl wakona. T wabshaba g Hekia S-ap'ekam Gewkdag g si ge'e gewkdag ab wo i em-mah pi sha'i mu'i tash i'ajed. Ni am wa heki hu em-ahgid mo hab kajj g Jiosh

matsh id am hab wo em-juni. Kumt ia wabsh wo ha'ichugk Jerusalem kihhim t am k ab wo ai mat hab wo e juh.”

## Jesus uhpam himhidag am dahm kahchim wui

<sup>6</sup>Sh am hema ep d tash. Tsh am ep i e hemapai g chuhchaij wehmaj g Jesus k ab kakke, “T-kownalig, napt ab hahawa ep wo t-mah ahchim Tutuligo hemajkam g ap'edag matt hejel am wo i himch g t-kownaltalig?”

<sup>7</sup>Sh hab kajj g Jesus ab ha wui, “Heki at hu i ap'ech g Jiosh mat hekid am hab wo i e juh hegai mam haschu ab ni-kakke. K pi d em-wuikam mams wo s-ap s-mahchk ia'i idani mas hekid wo i k. <sup>8</sup>Kumt wabshaba am wo i ahgahid mam haschu i s-ap s-mahch ab ni-amjed. Hekia S-ap'ekam Gewkdag at ab wo i em-mah g si ge'e gewkdag mamt hab wo junihid. Kumt wehpeg am wo i ahgahi Jerusalem kihhim ch ed k amjed wehsko am Judea chekshani ch ed k amjed gam hu Samaria chekshani ch ed. T amjed gam hu wehsko wo i e ahgahi a'ai jewed dahm.” <sup>9</sup>Neh, bash kajj ch

amjed im hu hahawa i e bei dahm kahchim wui k gam hu pi e mahsid chewagi ch ed.

<sup>10</sup>Sh am wabsh kia gegok ch am uhgk si nenea idam. Tsh am haha wabsh gohk i e chehgi g anghil k si s-tohtam e enigadadch <sup>11</sup>ch hab kajj, “Pi g ia hu wabsh wo gegokk ch am uhgk nenead mat hebai hih g Jesus. Hema tash at wo wa uhpam jiwia hab masma mam hemuch am neid mat has i masma gam hu hih.”

**Matsh am hema i e kei  
Judas kehkud ed**

<sup>12</sup>Id atsh hab e juh Olive U'us Kawulk t ab. Sh heg d al eda hugkam miha ab amjed g Jerusalem. Tsh ab hahawa i huhud hegam Jesus chuhchai kawulk amjed k am hihim <sup>13</sup>k gan hu dada mo an dadha k d idam Peter, John, James, Andrew, Philip, Thomas, Bartholomew, Matthew, ch hegai James mash g ohgaj hab chehgi g Alphias, ch hegai Simon mash d hema hegam mash tatchua mat g Tutuligo hejel wo himchudad g e-kownaltalig, ch hegai Judas mash g ohgaj hab chehgi g James. <sup>14</sup>Sh g Jesus je'e ch wepnag ch ha'i ehp g u'uwi am ha wehm e hehemapad ch am e ho'ige'idahun Jiosh wui.

<sup>15</sup>Sh am he'ekia d i tash matsh am ep i e hemapad k d siant gokko wehst-mahm (120) hegam mash ab ihm g Jesus e do'ibiakch. Kutsh am hahawa i kekiwua g Peter k ash hab kajj, <sup>16</sup>“Ni-wepnag, Hekia S-ap'ekam Gewkdag atsh am i tashogi g t-kownaligbad David matsh has wo e juh hegai Judasbad mo chum t-wehmaj. Kut hemho wa

hab e juh mash has i kajj. Judas at am i ha wanim hegam mat am bei g Jesus, <sup>17</sup>chum as d ep chum kehshaj mat am wo ahgahid g s-kehg ha'ichu ahgaj.” Bash kajj g Peter.

<sup>18</sup>Kumtsh wa chum namkid g Judasbad matsh gagda. Tsh wabshaba hema e nolawt g oidag heg hekaj namkidadaj. Kutsh g Judasbad am him k am e naggia heg eda k ab si wantsh g e-wohk. Tsh g hihij gam hu si e iawua. <sup>19</sup>Sh heg hekaj hab e a'aga Eh'ed Oidag.

<sup>20</sup>Kush g Peter heg hekaj hab ep kajj, “An o hab chu'ig heg eda nen'ei o'ohana mo an hab chu'ig Jiosh heki hu o'ohana ed:

Pi at am hu wo ha'ichugk e-kih ed nat pi wo muh. *Psalm 69:25*

K an ep o'ohanas:

Am at kehkud ed hema ep wo i kekiwua. *Psalm 109:8*

<sup>21-22</sup>“Kut id hekaj hemho wa am hema wo i kekiwua t-wehm mat hab wa'ap wo wohokamch mat uhpam e chegito g t-kownalig Jesus. T hemho wa d wo hema t-ahchimk mach ga hujed i wehmajkahim g Jesus am i amjed mat g John pahl wako am hugkam mat im hu hih dahm kahchim ch ed.” Neh, bash kajj g Peter ch am i ha'asa neo.

<sup>23</sup>Tsh am hahawa gohk i ha wuwahas. K hema hab chehgi g idam Matthias. K hema d ep Joseph Justus ch hab ep e chechcheg Barsabas. <sup>24</sup>Tsh am hahawa e ho'ige'idahun k hab kajj, “Ge t-kownalig, t am i dagito g Judas ihda chikpan k atki am ai g s-ko'ok e-namkidadag. Kuch ahchim pi sha'i mahch mo has e tatatk g hemajkam. Pt heg hekaj am wo

si i t-tashogi mapt hedai am wo i ha kei idam gohk <sup>25</sup>mat d wo si m-kehshak ch am wo i ahgahi g ha'ichu m-ahga am keh kud ed g Judas.” <sup>26</sup>Tsh am hahawa i ha tashogi mat d wo Matthiask ch d wo si kehshajk.

**Matsh am ha wui i e maskogi g Hekia S-ap'ekam Gewkdag**

**2** Tsh am i e ai matsh g Tutuligo hemajkam wo e nam k am hab wo juh g hehgchulida Jiosh wui heg hehaj ha'ichu e-bahijida. Kutsh am wehs i e hemapai hema kih ch ed heg am mash ab ihm g Jesus. <sup>2</sup>Tsh haha wabsh ab dahm kahchim t amjed ha'ichu hab kaida mo g s-gewk hewel wabsh shashawuk heg eda kih. <sup>3</sup>Sh hahawa ha'ichu ep neid mash hab mahs mo g mei. Tsh id ab a'ai i e gantad k ab i dahiwhi wehsijj ha ab. <sup>4</sup>Kutsh g Hekia S-ap'ekam Gewkdag ab i ha mah g si ge'e gewkdag. Tsh hehaj haha wabsh nahnko mahs ne'okikaj neneo matsh eda chum pi hebai mai.

<sup>5</sup>Sh eda mu'ijj ab dadha Jerusalem t ab heg am mash d Tutuligo ch ab a'ai i hihi mu'ikpa jejewed amjed matsh ab wo ihm g Jiosh. <sup>6</sup>Tsh an wehsko i kaida hegai mash hab kaidag mo g s-gewk hewel. Kutsh idam am i kah k am e chehm mash hebai i kaidag. Sh idam Jesus ihmdam haha wabsh am neneok g ha-ne'okikaj mash hedai haschu i ne'okikaj neok.

<sup>7</sup>Kutsh si e totods idam k hab kajj, “Hab kaidam neneok ch eda d wabsh Galilee t am o'odham.

<sup>8</sup>Kus has masma hab chu'ig mach

wehsijj s-ha amichud g hehe'ejel t-ne'okikaj? <sup>9</sup>Kuch eda mu'ikpa jejewed amjed, ha'i ab Parthia t amjed ch ha'i ab Media t amjed ch ab amjed g Elam ch Mesopotamia ch Judea ch Cappadocia ch Pontus ch Asia <sup>10-11</sup>ch Phrygia ch Pamphylia ch Egypt ch Crete ch Arabia ch gam hu Cyrene kihhim wehgaj am Libya jewed ch ed ch ab Rome kihhim t amjed. K ia ha'i t-wehmajj g gawul mahs hemajkam mat ab i wahp t-himdag ed. Kuch wehsijj kah g hehe'ejel t-ne'okikaj heg amjed mat haschu si s-hasigam hab juh g Jiosh. <sup>12</sup>A t haschu ahgk hab ha'ichu e juh?” Bash kajj nash pi si has elid.

<sup>13</sup>Sh wabshaba ha'ijj wabsh nahnko ha ahg ch hab kajj, “Tki wabsh nawkk idam.”

**Peter mihshmda**

<sup>14</sup>Tsh ab hahawa i gegokiwua g Jesus chuhchai. Sh g Peter am amog, “Ni-hajuni ch ahpim mam ia wabsh sha kih Jerusalem t am, ab g wo si i ni-kaiham k am wo i oidahi mant haschu wo i em-ahgi. <sup>15</sup>Pi ach d nawkkoi. <sup>16</sup>Ihda mat haschu has i e juh o d hegai matsh g Joelbad an o'oha. Heg ash wa d Jiosh ha'ichu i tashogiddam ch an o'oha hab masma:

<sup>17</sup>Bo kajj g Jiosh:

T ab wo i e aih g si oidchkam tash. Kunt wo cheha g Hekia S-ap'ekam Gewkdag mat am wo ha wehmajj g hemajkam ch ab wo ha mahkad g si ge'e i wehmtadag.

Kut g em-wihpiopga ch g em-chetchaga wo ah g ha'ichu ni-ahga.

Nt wo i ha tashogi g kekel am ha-chehchki ed mat haschu has wo e juh imhab i dahm. T id hab wa'ap am wo e chehgi ha-nena ed g wechij o'odham.

<sup>18</sup> Ab ant wehs wo ha mah g ni-pionag g Hekia S-ap'ekam Gewkdag, chum hems g u'uwi ni-pionag, mat am wo i ahgahi g ha'ichu ni-ahga.

<sup>19</sup> Nt wo ha chehgi g s-hasigam ha'ichu gan hu uhgk ha dahm ch an jewed dahm. Eh'ed at wo e iawua. T g mei ch kuhbs wo i wuhsh.

<sup>20</sup> T g tash pi wo ton k g mashad wo ge wegiumih hab masma mo g eh'ed. K id wehs hab d ahga mo e aihim hegai si ge'e tash mant heg eda wo ha lodai g hemajkam.

<sup>21</sup> Kut hedai ab wo i gei ni-wui k wo e do'ibia ab amjed g pi ap e-namkidadag. *Joel 2:28-32*

Neh, bash kaij g Jiosh.

<sup>22</sup> "Kumt ab wo i ni-kaiha, ni-hajuni. Ihda Jesus mo ab d kihkam Nazareth t ab at hab juh g s-hasigam ha'ichu mat pi hedai hejel wo sha'i e nako mat hab wo juh. T id hekaj am i t-tashogi g Jiosh mo id am d si Kehshaj. Kum ihda am wa hejel s-mahch heg hekaj mat wehs am hab e juh em-shahgid. <sup>23</sup> Jiosh atsh heki hu i ap'ech matsh has masma wo e muhkid g alidaj k heg hekaj am i dagito em-wui. Kumt an be k ha mah hegam mo pi mahch g Jiosh chehanig nam pi s-mu'amk. Kut idam mua ab kots t ab naggiak. <sup>24</sup> T wabshaba g Jiosh ab i wuhshad ab

amjed g s-ko'ok muhkig nat pi am hab wa'ap i ap'ech mat ep wo e chegito. Kut hemho wa am hab wo e juh.

<sup>25</sup> "T an wa o'oha g t-kownaligbad David mat hab wo chei g Jiosh si Kehsha:

Chum ap hekid ni-wehmaj, ni-Jioshga!

Ni heg hekaj pi sha'i ha'ichukaj ni-kudut

<sup>26</sup> ch wabsh si s-ap ni-tahtk ch s-hehgigam ha'ichu ahg.

Ab o e aihim mant wo muh.

Nt wabshaba wabsh si s-ap ni-tahtk ch wo m-nenida.

<sup>27</sup> Pi apt am hu wo sha'i ni-dagito amai mo hebai ha'ichug g ko'i k pi wo sha'i hiwigi mas wo padt g ni-chuhkug nani pi d hekia s-ap'ekam m-alidag.

<sup>28</sup> Am apt i ni-chehgi mant has masma uhpam ep wo i wuhsh ab muhkig t amjed.

Chum apt hekid wo ni-wehmajk. Nt heg hekaj wo si s-hehgigkad.

*Psalms 16:8-11*

<sup>29</sup> "Neh, ni-naipijju, batki masma an o'oha g Davidbad. K wabshaba si tasho mo pi hejel hab e ahg mat pi wo padt no pi g oh'oj am wabsh kia wehch hiha'inij ed id i tashkaj.

<sup>30</sup> Davidbad ash d Jiosh ha'ichu i tashogiddam ch heg hab ahg Jiosh si Kehsha matsh pi wo padt k wo uhpam i wuhsh ab muhkig amjed. Jiosh ash wa heki hu ahgid g Davidbad mat am wo hema i kei g amjedkam am kehkud ed mat d wo ge'e kownalk. <sup>31</sup> Davidbad oki s-mahch ihda ch heg hab ahg ch hab kaij mat pi am hu wo sha'i dagito amai mo hebai ha'ichug g

ko'i k pi wo sha'i hiwigi mat wo padt g chuhkugaj. <sup>32</sup>Pegih, k d hegai Jesus mat g Jiosh ab i wamigi muhkig amjed. Kuch ahchim g t-wuhpuikaj neid mach haschu ia em-ahgid. <sup>33</sup>Jiosh at am i wahkid k an kei si e-hugid an. Kut ab bei g ap'edag k cheha g Hekia S-ap'ekam Gewkdag mat ab t-wui wo hih. Heki ash hu hab kajj g Jiosh mat hab wo e juh. K d ihda mam am neid ch kah hemuch mat hab t-juni. <sup>34</sup>Pi o hejel hab e ahg g Davidbad ch wabshaba heg hab ahg Jiosh si Kehsha mat pi wo padt k wo uhpam hih am dahm kahchim wui nat pi an ep o'oha:

Jiosh o hab kajj ab ge  
ni-Kownalig wui:

In g dahiwua si ni-hugid an

<sup>35</sup>k ab wo ai mant wo ha gewito g  
m-obga. *Psalm 110:1*

<sup>36</sup>“Pegih, ihda Jesus mamt ab  
naggia kots t ab o d Jiosh si Kehsha  
ch d wo t-do'ibiakam kownalk.  
Kutt id wo chum si s-ap s-mahchk  
wehsijj ahchim Tutuligo hemajkam.”  
Neh, bash kajj g Peter.

<sup>37</sup>Kush si s-ko'okam pi ap e tahtk  
g hemajkam am i kaiok ch hab kajj  
ab ha wui hegam Peter, “Ih, tt has  
wo t-juh, t-naipijju?”

<sup>38</sup>Sh hab kajj g Peter ab ha wui,  
“Hehe'ejel g gam hu wo s-ohhod g  
pi ap e-chegitoi k wo e pahl-wapko  
ab chehchegch g Jesus Christ. Kut  
gam hu hab wo i juh g Jiosh g  
pi ap em-chu'ijig. T amjed wo si  
em-wehmajkad g Hekia S-ap'ekam  
Gewkdag <sup>39</sup>nash pi g Jiosh hab kajj  
mat ab wehsijj wo ha mah g Hekia  
S-ap'ekam Gewkdag hegam mat ab  
wo i ha wai e wui.”

<sup>40</sup>Sh tash am neok g Peter ch am  
chum ha ahgid ch hab kajj, “Am g  
wo e do'ibia. Si s-ko'ok namkidadag  
o ab ha aihim hegam t-wehm  
hemajkam mat pi gam hu wo ohhod  
g pi ap e-chu'ijig.”

<sup>41</sup>Kutsh waik mihl ab i s-wohoch  
g ha'ichu ahgaj heg i tashkaj k e  
pahl-wapkon k ab i e hemakoj  
ha wehm. <sup>42</sup>Sh g Jesus chuhchai  
am hahawa ha mashcham. Kush  
am ha wehm e mihshmad ch e  
ho'ige'idahun ch ha wehm huhuga  
g chemait.

#### Ha-himdag g Jesus ihmdam

<sup>43</sup>Kush mu'i ha'ichu s-hasigam  
hab junihim idam Jesus chuhchai  
g Jiosh gewkdagkaj. Tsh heg hekaj  
mu'ijj ehp ab si has i el mat haschu  
hab juh g Jiosh. <sup>44</sup>Sh wehsijj g  
Jesus ihmdam ab si e hajunit ch  
wehs ha'ichu ab i a'ai e mahk mash  
hedai haschu i pi edgid, <sup>45</sup>chum as  
hems wo gagda g ha'ichu e-eniga  
mat heg hekaj lial am wo i ha  
wehmt hegam mo ha'ichu i pi edgid.  
<sup>46</sup>Sh wehs tashkaj am e nanmek  
ge'e cheopi ch ed ch am ep e wehm  
e gegosid a'ai e-kihki ed si s-ap e  
tatatk ch ab wabsh i e sho'igchudch  
Jiosh wui <sup>47</sup>ch ab si hehgchulid g  
Jiosh. Kush wehsijj g hemajkam si  
s-ha ho'ige'elid. Sh g Jiosh ab i ha  
wahpkid ha shahgid wehs tash ab  
hegam mat hab wa'ap e do'ibia.

#### Matsh e doaj g pi himidkam

**3** Kush am wa'i hebai amjed,  
tsh am dada g Peter g John  
wehm ge'e cheopi t am. Kush d i  
waik ohla gam hu i juhk mo eda e  
a'ahe mat wo e ho'ige'idahu. <sup>2</sup>Sh ab

hema daha g sho'igkam hemajkam heg bahsho kolhai kihjeg mash hab e a'aga Si S-kehg Kihjeg. Kush ihda o'odham ga hu e-alijk amjed pi himdag. Kumsh wehs tashkaj am wabsh i bebhe ch ab dadsha ab kolhai kihjego. Kush wabsh ha'ichu ha tahni hegam mo am daiw.

<sup>3</sup>Tsh eda am wo i wahp idam Peter ch John. Sh ab ha'ichu chum ha tahni.

<sup>4</sup>Tsh ab si i nei idam Peter k hab kaj, "Ab g si i t-neid."

<sup>5</sup>Kutsh wa woho ab si i ha nei hab e ahgch mat wo ha'ichu mah.

<sup>6</sup>Sh oi wa hab wabsh kaj g Peter, "Neh, ni-nawoj, pi ani ha lialiga ch wabshaba ha'ichu wo m-mah mat heg ba'ich wo i m-wehmt. K d ihda mant hab wo m-ah mapt ab wo i hiw g Jesus Christ k wo kekiwua k wo hih." <sup>7</sup>Bash kaj ch ab hahawa bei g nowij k ab i wuhshad. Kutsh am wa i hekaj ab gewpka g kakhioj. <sup>8</sup>Tsh am si uhgk da'a k kekiwua k am wa i hekaj s-ap hih. Kutsh idam Peter im hu i wahp cheopi kolhai ch ed. Tsh heg ha wehm i wah k si chehk dad'ehim ch ab si hehgchulid g Jiosh. <sup>9-10</sup>Kutsh si has i el g hemajkam am i neidok mo d hegai pi himidkam mo ab dahiwp kolhai kihjego.

**Matsh am ha mihshmad g  
Peter ge'e cheopi t am**

<sup>11</sup>Batsh e juh ihda anai mash hab e a'aga Solomonbad Watto. Kush ihda pi himidkam gan hu wabsh i si e u'ukch ab ha ab g Peter ch John mat pi wo i e gawulkai ab ha amjed. Tsh ab hahawa a'aijed i wohp g hemajkam k gan hu ha biha si has i elidk mat e doaj.

<sup>12</sup>Tsh am wabsh ap'et g Peter mat am ha mihshmad k hab kaj:

"Ni-wehm o'odham, pi g am wo si e totodsid. Pi att g hejel t-gewpkdagkaj doaj ihda o'odham, <sup>13-16</sup>Jiosh si Kehsha at hab t-juni nach pi ab hiwig. K d hegai Jesus mam ahpim s-mu'amk ch ab mah g kownal Pilate. K eda g Jiosh d pionag g Jesus ch d hekia s-ap'ekam ch pi ha chu'ijig. T ha chum wo dagito g Pilate. M wabshaba ahpim hab ahg mat wo mu'a k heg wo dagito mo d ha mu'akam. K heg hekaj d em-chu'ijig mat e muhkid. K eda d hegai mo ab t-makioj g pi ha huhugedam doakag. T wabshaba g Jiosh ab si ha'ichuchud k uhpam i wuhshad ab amjed g muhkig k am i bei dahm kahchim wui. Hegam t-shohshonbad mash d Abraham ch Isaac ch Jacob ash ab si has i elid g Jiosh. Kum eda ab wui gegok g Jiosh si Kehsha.

<sup>17</sup>"Pegih, ni-wepnag, mtp hems heg hekaj s-mu'am g Jesus mam pi mahch mo heg am d si Kehshaj g Jiosh mat wo t-do'ibia. <sup>18</sup>T eda heki hu wa'i amjed an o'oha g kelibad Jiosh ha'ichu i tashogiddam mat g si Kehshaj wo e sho'igch. T idani woho am hab e juh. <sup>19</sup>Pegih, oi g gam hu wo s-ohhod g pi ap e-chegitoi k ab wo i e nohnogi Jiosh wui. T heg wo s-em-ho'ige'id k gam hu hab wo i juh g pi ap em-chu'ijig k ab wo si i wechijid g em-dodakag. <sup>20</sup>T ab em-wui wo i hih g si Kehshaj Jesus. <sup>21</sup>K hab mahs mat an wo ha'ichugk ihda Jesus dahm kahchim ch ed am hugkam mat hab wo e juh hegai mo haschu i t-tashogid g kekelibad Jiosh ha'ichu i tashogiddam.

<sup>22</sup>“Neh, bash wa kaij g Mosesbad am t-shohshon ha wui:

Em-kownalig Jiosh at ab  
wo hema i kei g ha'ichu i  
tashogiddam hab masma mat  
ahni am i ni-kei.

Kut ihda d wo em-wepo  
o'odhamk.

Wehs ha'ichu amt ab wo kaiha  
mat haschu ab wo i em-ahgi.

<sup>23</sup> Kut wo e ko'ij matp hedai  
pi ab hu wo kaihamad.

*Deuteronomy 18:15-19*

Neh, bash kaij g Mosesbad. <sup>24</sup>K  
wehsijj ahgachug g kekelibad Jiosh  
ha'ichu i tashogiddam hegai mo  
haschu am hab i e junihim idani.  
Samuelbad ash d hema hegam.

<sup>25</sup> Jiosh ash wa am ha ahgid g  
t-shohshonbad matsh haschu hab  
wo t-juni. K heg d ep t-wuikam  
ahchim mach d ha amjedkam.

“Bash kaij g Jiosh am wui g  
Abrahambad:

Am ant wo hema i kei g  
m-amjedkam mant heg hekaj  
ab wo i s-ha ho'ige'el g wehs  
nahnko mahs hemajkam id  
dahm jewed. *Genesis 22:18*

<sup>26</sup>“Neh, t wa woho hab e juh mat  
am i kei g e-alidag Jesus. T heg  
wehpeg ab i s-t-ho'ige'el ahchim  
Tutuligo k ab t-wui him k ab i t-mah  
g ap'edag matt ab wo i t-nohnogi ab  
amjed g pi ap'ekam.”

**Mamtsh am ha lodai g Peter ch John**

**4** Sh am wabsh kia ha  
mihshmad g Peter ch John.  
Kutsh am haha wabsh ha'i dada g  
papal ch ha-ge'ejjig g ge'e cheopi  
nuhkuddam ch ha'i ehp mash  
am oid g Sajusi himdag. <sup>2</sup>Sh eda

wa idam Peter ch John am ha  
mashcham g hemajkam mat ab i  
wuhsh g Jesus e-muhkig amjed. Sh  
idam Sajusi pi hohho'id nash pi  
pi wohochud mat ep wo e chegito  
g ko'i. <sup>3</sup>Sh eda e aihim mat wo  
s-chukk. T heg hekaj ged hu ha kuh  
mat wo ha lodai ba'ich tash.

<sup>4</sup>Tsh wabshaba mu'ijj hegam  
matsh kah g Peter ch John ab i  
s-wohoch g Jiosh ha'ichu ahga. Tsh  
am i mu'ida hegam mash ab ihm g  
Jesus. Kush hegam mash d chechoj  
d hahawa hetasp mihl.

<sup>5</sup>Sh am ba'ich d i tash. Tsh  
am e hemapai g hemajkam ha  
wanimeddam ch ge'eged ch  
chehanig ha mashchamd. <sup>6</sup>Kush  
am ha wehmaj hegai uhgchu pahl  
mash hab chehgig Annas. Sh g  
hajunij am hab wa'ap ha'ichug  
mash ha'i d Caiaphas ch John ch  
Alexander. <sup>7</sup>Tsh ab hahawa i ha  
wuwahas idam Peter kukpaikud  
amjed k ga hu i ha chuhcha k ab ha  
kakke, “Shahchu am e wepogid ch  
hab ha'ichu wua? Dohm hab elid  
mamt heg ab bei g e-gewkdag k  
doaj ihda pi himidkam?”

<sup>8</sup>Tsh ab ba'ich i gewkai g Peter g  
Hekia S-ap'ekam Gewkdag. Sh hab  
kaij:

“Bamki e elid ahpim  
t-wanimeddam ch ge'eged <sup>9</sup>matt  
hemho wo wa bei g ap'edag matt  
hab wo juh g s-ap'ekam. <sup>10</sup>Pegih, nt  
wo em-ahgi mat g Jesus Christ ab  
i t-mah hegai gewkdag matt hekaj  
doaj ihda o'odham. Ahpim amt  
hab juh hegai Jesus Christ mat ab  
e naggia kots t ab. T wabshaba g  
Jiosh ab uhpam i wuhshad muhkig  
amjed. <sup>11</sup>Id o hab ahg Jesus g



kelibad Jiosh ha'ichu i tashogiddam ch an o'oha ihda ha'ichu wepogida mo hab chu'ig:

Kihtdam at wo hema chum s-ohhodam g hodai.

T wabshaba id d wo si s-has ha'ichu hodaik am ha-kihta wehhejed. *Psalm 118:22*

<sup>12</sup>Hegai wa'i Jesus at wo ha do'ibia g hemajkam. Do Jiosh si Kehsha mat ab wo t-mah g pi ha huhugedam doakag. Kut pi hedai ep hab wo sha'i juh g do'ibiadag."

<sup>13</sup>Sh si s-e mahch ch neneok idam Peter. Tsh hekaj si has i ha el idam haha'ichu, wahm mat am i s-mai am i ha kahkch mo d wabsh si o'odham ch pi hasko sha'i uhgk e mashchamahim. Tsh am hahawa i amich moki an wehmajkahim g Jesus. <sup>14</sup>Kush am ha wehm kehk hegai mamt doaj. Sh pi e nakog hegam haha'ichu mas has wo chei nash pi g e-wuhpuikaj neid mat woho e doaj hegai. <sup>15</sup>Kumtsh gam hu hahawa i ha wuwhas hegam Peter matsh g haha'ichu am wo i a'aga.

<sup>16</sup>Kush hab kajj, "Shahtt wo ha juh. Wehsijj o s-mahch g Jerusalem t am kihkam mat doaj g pi himidkam. K id d si s-hasig ha'ichu. Kutt pi wo sha'i t-nako machs hab wo chei mas pi woho hab juh."

<sup>17</sup>Sh hab hahawa ep kajj, "Matt wo keshwua ihda ha-ahga mat pi hekid am hu ep wo sha'i a'agad ihda Jesus am hema i wui."

<sup>18</sup>Kumtsh ab hahawa ep i ha wahpki. Sh hab ha ahg, "Chum as has wo chu'igk ha'ichu, mt pi am hu wo sha'i a'agad ihda Jesus."

<sup>19</sup>Sh hab hahawa si kajj hegam Peter, "Am g wo i a'amichud machs

ahpim ab wo em-wohoch aha natt g Jiosh. <sup>20</sup>Tt ahchim hi hemho am wo wa ahgahid mat haschu i si s-kehg hab juh k haschu i si s-kehg hab kajj g Jesus mach si neid ch kah."

<sup>21-22</sup>Kush wa eda hegai pi himidkam i ba'iwchkim g gi'ikko wehst-mahm a'ahidag. Sh g hemajkam wehs ab si i hehgchulid g Jiosh mat doaj. Kutsh heg hekaj pi sha'i e nako g ha wanimeddam mas has masma s-ko'okam wo ha namkid k am wabsh si ha ebkioid k chum ha keshwua k hahawa ha dagito.

**Mash g Jesus ihmdam ab tahni g Jiosh g gewkdag**

<sup>23</sup>Tsh am wa i hekaj ged hu uhpam dada e-naipijju ha wui k am ha ahgid mo has i ha ahg g u'ugchu papal ch ge'eged.

<sup>24</sup>Tsh am i kaiok am ha hekaj e ho'ige'idahun k hab kajj, "T-kownalig Jiosh, wehs ap u'ukch g gewkdag ch nahtokch g dahm kahchim ch jewed kahchim ch ge kahchki ch wehs ha'ichu mo haschu am i ha eda. <sup>25</sup>Ab aptki cheha g Hekia S-ap'ekam Gewkdag mat wo amichudach g m-pionagbad David. K hekaj hab kajj:

Sho'o wa'i si s-babga g nahnko dakam hemajkam ch am chum e nakog mat am hab wo juh hegai mo g Jiosh pi ha hiwgid.

<sup>26</sup>T am i e nako g kokownal k am i e wehmt mat ab wui wo gegokiwua g Jiosh si Kehsha.

*Psalm 2:1-2*

<sup>27</sup>"Neh, Jiosh t-ohg, t wa woho am e hemapai g t-wehm o'odham



ha wehm g gawul mahs hemajkam ch hegam kokownal mo d Herod ch Pilate. Wehsijj at ab wui gegokiwua g hekia s-ap'ekam m-Kehsha, Jesus. <sup>28</sup>Heki apt hu am i ap'ech mapt wo ha hiwigi mat wo mua g si m-Kehsha. Kut idam mat ab chum m-wui gegokiwua hab wabsh juh mapt haschu heki hu i ap'ech. <sup>29-30</sup>Pegih, t-ohg Jiosh, am g i ha neid mo ab si t-ebkiok k ab wo i t-mah g gewkdag matt s-gewkam wo a'agad g ha'ichu m-ahga ch wo ha dodaj g kok'odam ch si s-hasigam ha'ichu hab wo juh g gewkdajkaj g hekia s-ap'ekam m-Kehsha, Jesus.”

<sup>31</sup>Tsh am i ha'asa e ho'ige'idahu. Tsh g Hekia S-ap'ekam Gewkdag am si u'ugij hegai kih mo am e hemapadch k ab si i ha mah g gewkdag. Tsh am hahawa ba'ich i si s-gewkam ah g Jiosh ha'ichu ahga.

**Mash pi sha'i da'a g ha'ichu  
e-eniga ab a'ai e wui**

<sup>32</sup>Wehsijj ash ab a'ai si e tatchua g Jesus ihmdam ch ab si i hemakoch g e-chegitoi k pi hedai sha'i s-da'a g ha'ichu e-eniga ab a'ai e wui. <sup>33</sup>Sh idam Jesus chuhchai si s-gewkam am ahgachug mat uhpam i wuhsh g Jesus muhkig t amjed k d wehs ha-kownalig. Kush g Jiosh am si i ha wehmt. <sup>34</sup>Sh ha'i am ha gagda g e-o'oidag ch e-kihki ch ab i u'u g lial <sup>35</sup>ch ab ha mamka g Jesus chuhchai mash hekid i e tatchua. Sh am hahawa a'ai ha mamka hegam mash pi ha'ichu edgid. Sh hekaj pi hedai ha'ichu pi edgid.

<sup>36</sup>Sh hema d Joseph ch ab Cyprus jewed t ab d kihkam ch d chum

papal ha wehm chikpandam nash pi ab d Levibad amjedkam. Sh id hab ep chechcheg g Jesus chuhchai Barnabas mo hab d ahga I ha Gewkemhundam. <sup>37</sup>Id atsh gagda g e-oidag k ab i ui g namkigaj k wehs ha mah g Jesus chuhchai.

**Ananias ch Sapphira**

**5** Sh am hema d Jesus ihmdam ch hab chehig Ananias. Kush g wehmaj kihkam hab chehig Sapphira ch hab wa'ap d Jesus ihmdam. Kutsh ihda Ananias epai gagda g ha'ichu e-eniga <sup>2</sup>k hab masma hab chum e juh mat wehs ha mah g namkigaj g Jesus chuhchai k wabshaba ged hu ha'i si toa e-wohshag ed.

<sup>3</sup>Sh hab kajj g Peter ab wui, “Shahchu apt ahgk hiwigi g Jiawul mat am pad ha'ichu hab juh m-ihbdag ed. Pt heg hekaj iattogi g Hekia S-ap'ekam Gewkdag mapt heg wepogi mo id d wehs g ha'ichu m-eniga namkig. <sup>4</sup>Hegai ha'ichu m-eniga o d m-eniga mapt koi gagda. Pt am i gagda. K hegai namkigaj d m-lialiga. Pt eda hab juh ihda si ge'e pi ap'ekam. Pi apt ahchim wa'i chum t-iattogi mach d wabsh o'odham. Jiosh apt ep chum iattogi.”

<sup>5</sup>T am wabsh i chum kaiok ihda g Ananias k muhk k i gei. <sup>6</sup>Tsh ab hahawa i wahp g wechij o'odham k am i ap'ech g chuhkugaj k ged hu cheh.

<sup>7</sup>Sh am ep s-mahch g wehmaj kihkam g muhki matsh hab masma wo chum ha iattogi. Sh am d i waik ohla. Kutsh eda pi koi kah mat has e juh k hekaj am jiwia mo am daha g Peter.

<sup>8</sup>Kush heg ab wui hab kajj, “Namt ha'akia ui g lial mamt gagda g ha'ichu e-eniga?”

Sh hab kajj, “Heu'u, ha'akia att ui.”

<sup>9</sup>Sh hab kajj g Peter, “Ms haschu ahgk hig ahpi g e-wehm kihkam wehm hab chum i e taht mamt wabsh wo pi'ich g Hekia S-ap'ekam Gewkdag? Dada at hegam mat ged hu cheh g m-wehm kihkam. Pegih, t hab wa'ap masma hab wo m-juh.”

<sup>10</sup>Tsh am ha hekaj muhk k i gei wecho. Tsh ab i wahp g wechij o'odham k am nei matki muh k gam hu i be k ged hu cheh hugidaj an g wehmaj kihkam. <sup>11</sup>Tsh wehsijj ab si s-ehbeni g Jesus ihmdam ch hegam ehp mo hedai i kah ihda.

**Mash g s-hasig ha'ichu hab junihim g Jesus chuhchai**

<sup>12</sup>Kush s-hasig ha'ichu s-ta neidamam hab junihim g Jesus chuhchai am ha shahgid g hemajkam. Sh wehsijj si s-ap e hehemapad hegam Jesus ihmdam heg wecho Solomonbad watto. <sup>13</sup>Sh g hemajkam ab si has ha elid ch wabshaba si s-e gihug mat ab wo i ha wehmt. <sup>14</sup>Tsh oi wa mu'i ab i s-wohoch g ha'ichu ha-ahga ab amjed g Jesus k ab i ha wehmt. Ha'i d chechoj ch ha'i d u'uwi. <sup>15</sup>Kumtsh am i ha wuwhas g kok'odam am i neidok mo haschu has junihim g Jesus chuhchai k an kahya oidk ha wahpakusch hab elidch mat chum hems g Peter ehkadag ab hab wo e juh ha ab mat wo e dodaj. <sup>16</sup>Mu'ijj atsh ab a'ajjed i hihi Jerusalem wui ab i ha u'uk g e-kok'odamga ch hegam mo g jijawul an ha u'ukch. Kutsh wehs ha dodaj.

**Mamtsh ha sho'igch g Jesus chuhchai**

<sup>17</sup>Tsh g uhgchu pahl ch hegam mash hab wa'ap am oid g Sajusi himdag si s-ko'okam s-ha hehgam g Jesus chuhchai <sup>18</sup>k am i ha cheha g ge'e cheopi nuhkuddam mat wo ha kuh. Tsh wa woho am ha kuh.

<sup>19</sup>Tsh wabshaba heg i s-chuhugam ab g anghil am si kuhpi'o g kukpaikud k ab i ha wuwhas g Jesus chuhchai k hab ha ahg, <sup>20</sup>“Am g wo uhpam hihim k am wo i gegokiwua ge'e cheopi ch ed k wo ha ahgi g hemajkam mat has masma wo bei ihda pi ha huhugedam doakag.”

<sup>21</sup>Kutsh ab wohog elid k am hihim k am i wahp ge'e cheopi ch ed mat wabsh i chum mahsi k am ha hekaj i ha mashcha g hemajkam.

Tsh eda heg wa'i si'alim g uhgchu pahl ch hegam Sajusi am i ha hemapai g e jehnidam. Sh idam pi mahch mat haschu has e juh ch atsh am ha cheha g nuhkuddam mat ab wo i ha ui g ha-lilsoga.

<sup>22</sup>Kutsh am chum hihi g ge'e cheopi nuhkuddam mat wo ha ui. Kush pi am hu ha'ichug.

Tsh ab wabsh uhpam hihim k am ha ahgid ch hab kajj, <sup>23</sup>“M att dada kukpaikud am k am chum nei. K ab wabsh kia yahwidag. K g lilso ha nuhkuddam ab ep gegok kihjeg t ab. Tt wabshaba am i chum kuhpi'o g kihjeg. K pi am hu hedai ha'ichug.”

<sup>24</sup>Tsh am i ha kaiok am wabsh i pi amich mas hebai has e juh g ha-lilsoga.

<sup>25</sup>Tsh am hahawa hema i wahk k hab kajj, “Neh'e! Idani o ged hu ha

mashcham g hemajkam ge'e cheopi ch ed hegam mamt wa ha kuh.”

<sup>26</sup>Tsh am hahawa hihi g ge'e cheopi nuhkuddam k ab uhpam wabsh s-ap i ha ui nat pi am hu wo ha ma'ichshul g hemajkam <sup>27</sup>k am ha u'apa ha wui g e jehnididdam.

Sh hab ha ahg g uhgchu pahl, <sup>28</sup>“Chum ach s-gewkam pi em-hiwgid mams an hu wo a'agad hegai Jesusbad. T eda g em-mashchamadag ab amjed heki hu wehsko chehmo g Jerusalem. Kum ahpim ab chum t-abchud g muhkigaj.”

<sup>29-32</sup>Sh hab kajj hegam Peter, “K wabshaba g Jiosh am t-ahgid matt am wo wa ahgahid ihda mach haschu i si t-wuhpuikaj neid. Kutt hemho wo wa i hehgch g Jiosh, pi wabsh g o'odham. Ahpim amt bei g Jesus k hab juh mat ab e naggia kots t ab k e muhkid. T wabshaba g Jiosh ab uhpam i wuhshad muhkig amjed k am i wahki dahm kahchim ch ed k an i kei si e-hugid an k ab i mah g gewkdag mat wo t-do'ibia k wo t-wanimedad. Kut heg ab i t-mah g ap'edag ahchim Tutuligo hemajkam matt gam hu wo s-ohhod g pi ap t-chegitoi. T hekaj g Jiosh gam hu hab wo i juh g pi ap t-chu'ijig. Jiosh at ab cheha g Hekia S-ap'ekam Gewkdag mat wehs wo t-wehmajk ahchim mach ab s-wohog elid ch am t-gahi wuhshanim wo wohokamch g Jesus.” Neh, bash kajj g Peter.

<sup>33</sup>Tsh wabsh woho'i babgat hegam e jehnididdam k wabsh chum s-ha kokdaimk. <sup>34</sup>Sh wabshaba am da hegai mash d Gamaliel ch d chehanig ha mashchamdand ch am

oid g Palasi himdag. Sh wehsijj ab si has elid g hemajkam. Kutsh am i kekiwua k am ha ahgi mat gm hu wo sha'i i ha wuwhas g e-lilsoga. Tsh wa woho hab ha juh.

<sup>35</sup>Sh hab hahawa kajj ihda ab ha wui g e jehnididdam, “Ni-hajuni, am g wo s-e nen'oidk mamt has wo ha juh idam o'odham. <sup>36</sup>Hekid o hu i mat am hema i e maskogid k hab chehgig Theudas ch hab kajj mo d ge ha'ichu s-mahchim. Kut am hu i gi'ik siant chechoj ab i wehmt. T wabshaba e muhkid ihda. T wehsijj e gantad hegam mat wa ab wehmt. T am wa'i huhug g ahgaj. <sup>37</sup>T amjed am hema ep i e maskogi eda mat g hemajkam e kuint k hab chehgig Judas ch am Galilee t am d o'odham. T ihda hab wa'ap mu'i o'odham am i oi. T wabshaba hab wa'ap e muhkid hegai Judas. T hab wa'ap a'ai e gantad hegam mat wa ab wehmt.

<sup>38</sup>“Pegih, k hemuch hab wa mahs ha'ichu. Pi g am hu has wo sha'i ha juhni idam o'odham. Ha g wo dagito. Hemu at wo huhug ihda ha'ichu hab ha-juni matp d wabsh wo o'odham hab ha-elidak. Tp d wo sha Jiosh ha'ichu hab junik, mt pi wo sha'i e nako mams wo keshwua. <sup>39</sup>Mtp hems heg wabsh wo e wepogi mam g Jiosh wabsh cheggia.”

Tsh oi wa ab i s-wohog el g Gamaliel idam e jehnididdam <sup>40</sup>k hab ha ahg g ge'e cheopi nuhkuddam mat am wo i ha wahpki g lilso k wo ha gewitta. Tsh wa woho hab e juh. Kutsh ab ep si ha ahgi mat pi am hu wo sha'i a'agad g Jesus k hahawa ha dagito.

<sup>41</sup>Kush wabsh si s-hehgig idam Jesus chuhchai am i wuwhak natsh pi ab si has i ha el g Jiosh k ab i ha mah g ap'edag matsh si e sho'igch wehhejed g Jesus. <sup>42</sup>Pi atsh sha'i ha'asa a'aga g Jesus k wabshaba wehs tashkaj am wabsh i ha mashcham g hemajkam ge'e cheopi ch ed ch am ha-kihki ed mo g Jesus d Jiosh si Kehsha.

**Matsh am i ha chuhcha g  
wewa'ak chikpandam**

**6** Kush am i mu'idahim hegam mash am oid g Jesus himdag. Sh am ha'i neneok g Greek hemajkam ha-ne'okikaj nash pi tash gam hu kihkahim ha-jewedga ed. Kush idam hab kaj mash pi ap ha dagio'id hegam hehe'ejel wi'ikam u'uwi mash d ha-hajuni. Kush heg hekaj am a'ai pi e ap'et idam Greek neneokdam ha wehm hegam mo g hejel e-ne'okikaj neneok.

<sup>2</sup>Tsh am i kah g Jesus chuhchai k am wehs i ha hemapad k hab kaj, "T-wepna, pi o ap'e machs wabsh wo dagito g mihshmda ab amjed g Jiosh k im hu g lial wo hudawogad. <sup>3</sup>Ab oki ha'i ep em-mahkch g Jiosh g gewkdag ch amichudadag mamt am hab wo junihid ihda chikpan. Pegih, mt am wewa'ak wo i ha gawulkai hegam mam s-ha mahch mo woho hab masma. Kutt idam am wo i ha chuhcha mat wo nuhkud ihda hab mahs ha'ichu. <sup>4</sup>Tt ahchim Jesus chuhchai am hab wo si i juh matt wo t-ho'ige'idahunad ch wo si ha mihshmdad g hemajkam." Neh, bash kaj.

<sup>5</sup>Kumtsh ab si i s-hohho'i mo has kaj k am wewa'ak i ha chuhcha.

Hema idam ash hab chehgig Steven ch ab si s-gewkam hiwig g Jesus. Sh g Hekia S-ap'ekam Gewkdag ab si mahkch g gewkdag. Kush hegam ha'i ehp hab chehgig Philip ch Prochorus ch Nicanor ch Timon ch Parmenas ch Nicolaus. Ihda Nicolaus ash ab d amjedkam g Antiok kihhim ch d gawul mahs o'odham ch ab i s-wohoch g Tutuligo ha-himdag eda mat koi s-mai ab amjed g Jesus. <sup>6</sup>Tsh idam ab hahawa i ha ui g hemajkam ha wui g Jesus chuhchai. Kutsh idam am e ho'ige'idahun k ab ha taht mat heg hekaj wo s-e mahchk mo d si ha-chuhchai. <sup>7</sup>Tsh am si i ge'eda g Jiosh ha'ichu ahga Jerusalem t am. Kutsh ba'ich i mu'ida hegam mash am oid g Jesus himdag. Tsh mu'ijj ab i s-wohoch hegam mo d papal Tutuligo ha-himdag ed.

**Mamtsh bei g Steven**

<sup>8</sup>Ab ash si s-ho'ige'id g Jiosh g Steven ch ab si i mahkch g e-gewkdag. Kush s-hasigam ha'ichu hab wua. <sup>9</sup>Tsh wabshaba ha'i ab wui gegokiwua mash am hebai e wehm e mihshmad g Tuhligo e-himdag. Ha'i idam ash d neneholkahim Cyrene ch Alexandria kihhim t am. Tsh am ha'i i ha wehmt ab Cilicia jewed t amjed ch ha'i ab Asia jewed t amjed.

Sh idam ab kam'on g Steven <sup>10</sup>Sh wabshaba g Hekia S-ap'ekam Gewkdag ab si mahkch g Steven g amichudadag. Kutsh pi sha'i e nako hegam mas ab uhpam wo i nodagi g ne'okij. <sup>11</sup>k heg hekaj am hahawa ha'i ha namkid k am ha ahgid mat hab wo chei, "Kah ach ihda mo si

has ahg hegai mo ab t-chehani g Jiosh Mosesbad o'ohana ed.”<sup>12</sup> Kush wa woho hab kajj idam ch hekaj i ha kudu g hemajkam ch ge'eged ch chehanig ha mashchamdham. Tsh idam wabsh woho i babgat k am hihim k an bei g Steven k ged hu u'apa ha wui g e jehnidam.

<sup>13</sup>Mtsh am hahawa ha'i i ha wahpki g o'odham matsh am ha'ichu wo ha iattogi ab amjed. Sh hab kajj idam, “Ihda o'odham o chum hekid has ahg g hekia s-ap'ekam ge'e cheopi ch hegai mo ab t-chehani g Jiosh Mosesbad o'ohana ed. <sup>14</sup>Kah ach mo hab kajj mat hegai Jesusbad wo i wua g ge'e cheopi k wo gawul juh g t-himdag mach ga hu hebai amjed hab i junihim mat g Mosesbad an o'oha.”

<sup>15</sup>Kush wehsijj ab si neid g Steven. Sh g wuhioshaj hab haha wabsh mahs matp hems g anghil wuhiosha nash pi si tonod.

### Matsh haschu ne'oki ab i nodagi g Steven

**7** Kush hab kajj g uhgchu pahl ab wui g Steven, “No am wa woho map hab junihim hegai mo haschu ab m-abchud?”

<sup>2</sup>Kush hab kajj g Steven:

“Ni-ge'egedga ch ni-hajuni, ab g wo si i ni-kaiham. An o o'ohadag matsh g Jiosh ab wui e chehgi g t-shohshonbad Abraham. Kush eda am wabsh kia kih Mesopotamia jewed ch ed.

<sup>3</sup>“Sh hab kajj g Jiosh ab wui:

Ia g wo ha dagito g e-hajuni ch e-jewedga k ab wo hihi heg wui jewed mant am wo m-chehgi. *Genesis 12:1*

<sup>4</sup>“Tsh wa woho am dagito g Mesopotamia jewed mash am kih g Caldea hemajkam k am chihpia Haran kihhim wui. Kutsh am i muh g Abrahambad ohgbad. Tsh ab hahawa ep cheha g Jiosh mat ia wo chihpia Canaan jewed wui. Kutsh ia i chiwia mach hemuch ia kih. <sup>5</sup>Tsh eda koi ab hu he'es sha'i mah ihda jewed k wabshaba am hi wa ahgid mat wo mah. T d wo ha-enigak g amjedkamaj mat he'ekiajj ab wo i oi. Kush eda pi koi ha a'aliga g Abrahambad mash eda hab ahg g Jiosh.

<sup>6</sup>“Kush hab kajj g Jiosh ab wui:

M at hu wabsh heb hu jewed ch ed wo kihk g m-amjedkam ch d wabsh wo ha-pionagk.

Kumt wo ha sho'igch gi'ik siant a'ahid ab. <sup>7</sup>Nt wabshaba wo ha kastigal hegam hemajkam mat an wo ha u'ukchid.

T ab haha wo i wuwaha heg amjed jewed k ab wo si has i ni-elid k wo ni-ihm iia.

*Genesis 15:13-14*

Neh, bash kajj g Jiosh <sup>8</sup>ch ab mah g Abrahambad hegai himdag mat am wa has masma wo ha o'oha an ha hikuchk g chechoj e-a'aliga. Tsh hab masma wo s-mahchk mash hab wa'ap d ha-wuikam hegai matsh g Jiosh am ahgi g Abrahambad. Tsh wa woho hab e juh g Abrahambad k an pahl hikuch g e-alidag Isaacbad mo d i gigi'ik tash amjed mat mahsi. Tsh g Isaacbad hab wa'ap juh g e-alidag Jacobbad. Tsh g Jacobbad hab wa'ap ha juh hegam gamai gohk e-a'alidag mach ab d ha amjedkam.

<sup>9</sup>“Tsh idam wa s-hehgam g e-wehnag Josephbad k ab ha'i ha

wui gagda mat d wo ha nehologak am Egypt jewed ch ed. Sh wabshaba g Jiosh am nuhkud <sup>10</sup>ch ab s-ap i wuhshad wehs ha'ichu sho'igdaj amjed k ab i mah g si o'odhamdag ch amichudadag. Tsh am i nei g ha-kownalig g Egypt t am hemajkam k am i uhgkajid k am kownalch am dahm g e-kownaltalig ch ha'ichu e-eniga.

<sup>11</sup>“Tsh wa haha wabsh gei g bihugig k ha sho'igch g hemajkam wehsko Egypt jewed dahm ch iia Canaan jewed dahm. Tsh pi sha'i e amich hegam Abrahambad mat hebai wo bei g ha'ichu hugi. <sup>12</sup>Kush eda am s-ha'ichu hugig Egypt jewed ch ed. Kutsh am i kah g Jacobbad k am ha cheha g e-a'alidag matsh am wo hunio. Kutsh hab e juh.

<sup>13</sup>“Tsh am ep i huhug g ha'ichu ha-hugi. Kutsh am ep hunio. Tsh g Josephbad am hahawa ha ahgi mo d ha-wehnag nash pi pi amichud. Tsh g ha-kownalig g Egypt t am hemajkam ab s-ha mai g Josephbad hajuni. <sup>14</sup>Tsh g Josephbad am hahawa wai g e-ohgbad mat wehsijj ab wo i chihpia Egypt wui. Kush eda d wewa'akko gamai hetasp (75) hemajkam. <sup>15</sup>Tsh wa woho am i chihpia hegam Jacobbad Egypt wui k am kihkahim ch am koi.

<sup>16</sup>Tsh am uhpam i e ui g ha-oh'o g Abrahambad ch Josephbad Shekem kihhim wui. Abrahambad atsh wa am he'es ha nolawt g jewed hegam mash d Hamor amjedkam matsh am wo e toa g ha-ko'idag.

<sup>17</sup>“Sh amjed mu'i a'ahidag wehgaj. Sh e aihim matsh am hab wo juh g Jiosh mash haschu i heki hu ahgid g Abrahambad. Tsh eda am i si

mu'ida g t-shohshonbad amai Egypt ch ed. <sup>18</sup>Kutsh am hema i wuhsh g kownal mash pi sha'i mahch matsh wa has masma am si i ha wehmt g Josephbad amai Egypt ch ed.

<sup>19</sup>Kush ihda nahnko ha wua hegam t-shohshon ch ha sho'igchud ch hab ha ahg mat gam hu wo ha shul g chu'uchum e-a'aliga hab ahgch mat wo koi.

<sup>20</sup>Kutsh eda mahsi g Mosesbad k si s-kehg d ali. Kutsh am i nuhkud g jehijj waik mashad ab <sup>21</sup>k gam hu hahawa i wuhshad. T g kownal uwi alidag am chehg k ab i bei hab masma mo d madaj. <sup>22</sup>Kumtsh wehs ha'ichu mashcha mo haschu d i si s-hasig ha'ichu am Egypt ch ed. Tsh ab si i mai ihda wehs k d si s-has ha'ichu am heg eda mo haschu hab i kajj ch haschu hab i junihim.

<sup>23</sup>“Batsh wa masma am i ge'eda g Mosesbad k am i ai g gi'ikko wehst-mahm (40) a'ahidag. Tsh am hu hebai hab i e ah mat am wo i ha chehgim g e-hahajuni. <sup>24</sup>Kush hema g Egypt t am o'odham am hema sho'igchud g Tuhligo. Tsh g Mosesbad am i wehmt g e-hajuni k mua ihda Egypt t am o'odham mat wo agwua <sup>25</sup>k hab e ahg mat g hajunij wo chum s-mahchk mat g Jiosh wo hekaj k wo ha do'ibia. Sh wabshaba g hajunij pi hab masma hab elid ha'ichu. <sup>26</sup>Sh am ba'ich d i tash, sh am ha'i e cheggia g Tutuligo. Tsh am ha neid k chum s-ha da'id k hab kajj, 'Kia, ahpim! Dam e-wepngam ch eda haschu ahgch e cheggia?’

<sup>27</sup>“Kut hegai mo ha cheggia ab si nu'ichkwua g Mosesbad k hab kajj: Shahchu ap ahgch hab chum e wua maps am t-dahm.

Pi o ab hu sha'i m-ab maps ahpi  
am ha'ichu wo i ap'echudad  
am t-shahgid.

<sup>28</sup> Napt hab wa'ap wo chum  
ni-mua mapt wa hab juh g  
Egypt t am o'odham tako?

*Exodus 2:13-14*

<sup>29</sup> "Tsh am i kah g Mosesbad ihda  
k ha hekaj gam hu i e mehkod ab  
Egypt amjed k gam hu i jiwia mash  
am d Midian jewed. Sh am ha'i  
o'odhamag. Kutsh am ha hohnt k  
gohk chechoj a'alidit

<sup>30</sup> "Sh am him k am d i gi'ikko  
wehst-mahm a'ahidag. Sh am  
hu hebai ha nuhkud g kahwal g  
Mosesbad am miabidch hegai do'ag  
mo hab e a'aga Sinai. Tsh ab wui  
haha wabsh hema i e chehgi g  
anghil hab masma mo am meihim  
g sha'i ch eda pi meitto. <sup>31</sup> Tsh ab i  
miabi g Mosesbad mat ab si s-ap wo  
i nei nash pi pi amichud matsh wa  
pi sha'i meitto g sha'i. Sh g Jiosh ab  
wui hab kajj am gahi wuhshanim g  
anghil:

<sup>32</sup> Ahni ani d Jiosh.

K wa ab has ni-elid hegam  
m-shohshon mo d Abraham  
ch Isaac ch Jacob. *Exodus 3:6*  
Tsh hahawa si gigiwuk g Mosesbad  
k si s-ehbeni mat am wo i nei.

<sup>33</sup> "Sh hab ep kajj g Jiosh ab wui:  
Ab g has i ni-elid k wuashulig  
g e-kaikia shuhshk nap pi ia  
kehk ni-wui.

<sup>34</sup> S-mahch ani mam has i masma  
ha sho'igchud g m-hajuni  
amai Egypt t am.  
Do ni-hemajkamga.  
Kuni kah g ha-shoshaki ch  
heg hekaj am i ni-maskogi

ab m-wui mapt ahpi wo ha  
do'ibia.

Pt oi am wo i e nako mapt  
am wo hih Egypt wui.

*Exodus 3:5, 7-10*

Neh, bash kajj g Jiosh.

<sup>35</sup> Kuni hab ep s-che'imk mo  
ihda Mosesbad d hegai matsh wa g  
hajunij pi ab hu tatchua ch hab kajj:  
Shahchu ap ahgch hab chum e  
wua maps am t-dahm?

Pi o ab hu sha'i m-ab maps ahpi  
am ha'ichu wo i ap'echudad  
am t-shahgid. *Exodus 2:14*

Do wa ihda Mosesbad matsh g Jiosh  
am i kei ha dahm g hajunij matsh  
wo ha wanimed k wo ha do'ibia.  
Kutsh hegai anghil mash ab neok  
mei ch ed am u'apa g Jiosh ne'oki  
Mosesbad wui. <sup>36</sup> Kutsh g Mosesbad  
am uhpam hih Egypt wui k am hab  
juh g s-hasig ha'ichu chehgida k  
am i ha wanim g e-hajuni mat ab i  
wuwaha Egypt amjed. Kutsh wa am  
i e tahp hegai mash hab e a'aga Al  
S-wegi Kahchki. Tsh am gahi i shul  
idam Mosesbad k am chipiahim  
gi'ikko wehst-mahm ahidag oidam  
tohono jewed ch ed.

"Sh g Mosesbad heg oidam  
s-hasigam ha'ichu am hab junihim  
<sup>37</sup> ch am ha ahgid ch hab kajj:

Jiosh atsh am hema ep wo i kei  
g t-hajuni hab masma mat  
ahni am i ni-kei.

Kut heg d ep wo Jiosh  
ha'ichu i tashogiddamk.

*Deuteronomy 18:15*

Neh, bash kajj g Mosesbad. <sup>38</sup> Tsh g  
Jiosh ab mah g e-ne'oki do'ag t ab  
am gahi wuhshanim g anghil. K d  
t-himdag ihda ne'oki matsh ab bei.



<sup>39</sup>Tsh pi oi jiwia g Mosesbad ab do'ag t amjed. Tsh g t-shohshonbad pi ab hu wohog elid k im hu hab wabsh i s-junimk g Mosesbad ch uhpam s-hihimimk am Egypt wui <sup>40</sup>Sh g ha-uhgchu pahlig d Aaronbad. Sh idam ab wui hab kaij:

Pi ach mahch mas has e juh ihda Moses mat ab i t-wuwhas Egypt amjed.

Am g wabsh ha'i ha nahto g jijosh mat hegam am wo t-wanimedad. *Exodus 32:1*

<sup>41</sup>“Kush wa am hema wisilot g ohlakaj k ab wui iagchul heg wepogidch mo d ha-jioshga k am ep piast mat heg hekaj ab wo si i ha'ichuch hegai e-jioshta. <sup>42</sup>Kutsh heg hekaj im hu hab i e juh g Jiosh ab ha amjed k am wabsh ha hiwigi mat wabsh g hejel hab e-elida am hab wo junihid. Kush wabsh g huhu'u ab ha ihm mat hab masma an o'oha g Jiosh ha'ichu i tashogiddam mash hab kaij g Jiosh:

Ab ani ha chehani g Tutuligo hemajkam mat wo mum'a g e-shoshoiga k ab ni-wui wo iagchul am wehhejed g pi ap e-chu'ijig.

K wabshaba pi woho ab hu ni-ihm mo eda am ha'ichug tohono jewed ch ed gi'ikko wehst-mahm ahidag oidam.

<sup>43</sup>Do hejel ha-nahtoi jijosh mo ab ha ihm.

Bo ha a'aga Molok ch Rephan ch hab ha elid mo an kih huhu'u t an.

Nt heg hekaj gam hu mehk wo em-shul Babylon jewed t am.

*Amos 5:25*

Neh, bash kaij g Jiosh.

<sup>44</sup>“Kuni hab ep s-che'imk mash hegam an u'ahim hegai cheopi mash heg hekaj am ha tashogid g Jiosh mash am ha wehmaj. Sh heg d wabsh hogi ch hab masma e nahto matsh wa g Jiosh am chehgi g Mosesbad. <sup>45</sup>Sh g ha-amjedkam an ep u'ahim hegai cheopi matsh hekid g Joshuabad am i e kei matsh wo i ha wanim. Kutsh g Jiosh ia i ha wahpki id eda jewed k am ha wehhejed gam hu i ha wuwhas hegam nahnko mahs hemajkam mo ia d chum kihkam. Kush am ha'ichugkahim ihda cheopi ch ab ai mash eda g Davidbad d ha-kownalig. <sup>46</sup>Sh ihda Davidbad d si Jiosh tatchui ch ab ahgid mat wo hiwigi mat hema wo kihch. Tsh heg eda am hab wo e junihid g ho'igel'idahuna Jiosh wui. <sup>47</sup>Kutsh g Jiosh hiwigi g alidaj Solomonbad. Tsh heg am i kei g kih am wehhejed g Jiosh.

<sup>48</sup>“K eda g Jiosh ba'ich i ge'ej mo haschu i mo an hab chu'ig t-wehgaj. T pi wo sha'i e nako g o'odham mas wo kihch. Batsh wa masma an o'oha g kelibad Jiosh ha'ichu i tashogiddam mash hab kaij g Jiosh:

<sup>49</sup>Ahni ani d Jiosh ch ab dahm kahchim t amjed ia nuhkud g jewed kahchim.

Pi amt wo sha'i e nako mamt wo ni-kihch mamt heg eda am wo ni-dai

<sup>50</sup>nant pi ahni wehs ha'ichu nahto. *Isaiah 66:1-2*

Neh, bash kaij g Jiosh.

<sup>51-52</sup>“Kush wabshaba g t-shohshonbad si e sheshemachud ch pi chechkaidag ch pi ab hu kaiham g Jiosh ha'ichu ahga.

Jiosh ash am i ha wuwhasid g ha'ichu i tashogiddam. Kush wa g t-shohshonbad ha sho'igchud ch ha'i ha kokda. Kum ahpim hab wa'ap chu'ig ch ab wabsh wui gegok g Hekia S-ap'ekam Gewkdag. Jiosh ha'ichu i tashogiddam ash am ahgachug mat wo jiwia g Jiosh si pionag k d wo si wehs s-ap'ekamk. Kut wa woho jiwia. Kumt wa gagda mat wo e muhkid. <sup>53</sup>Ahpim amt ab em-mah g Jiosh chehanig mat wa g anghil ia u'apa. Mt eda am wa pi wohoch." Neh, bash kaij g Steven.

#### Mamtsh mua g Steven

<sup>54</sup>Tsh am i kah g e jehnidam mash has ha ahg g Steven k wabsh woho'i babgat k si kuhm g e-tahtami. <sup>55</sup>Sh wabshaba g Hekia S-ap'ekam Gewkdag ab ba'ich i si mahkch g Steven g gewkdag. Tsh am i nea dahm kahchim wui k nei mo si s-masma tonod g Jiosh gewkdag. Kush g Jesus an si hugidaj an kehk g Jiosh.

<sup>56</sup>Kush hab kaij g Steven, "Neido! B at e kuhipi'o g dahm kahchim. K ab kehk g Jiosh si Kehsha an si s-apko hugidaj an g Jiosh."

<sup>57</sup>Tsh si hihinkiad k am si kuhkp g e-nahnk k ab hahawa si wui i wohp <sup>58</sup>k an be k gam hu i wuhshad kihhim t amjed mat wo ma'ichkwua. Sh am hema ha wehmaj g wechij o'odham ch hab chehgig Saul. Kutsh heg nuhkudach g e-liliwa hegama matsh wo ma'ichkwua g Steven.

<sup>59</sup>Kush g Steven ab si ihm g e-do'ibiakam ch hab kaij, "Ni-kownalig Jesus, ia g beh'i ni-doakag."

Sh eda heg oidch ab ma'ikkash g s-keh'iddam. <sup>60</sup>Tsh am hahawa tohtonwua g Steven k si s-kaidam hab kaij, "Ni-kownalig, pi g ab hu ha abchud ihda chu'ijig mat ihab e juh." Bash kaij ch am i muh.

**8** Sh g Saul am wabsh ap'echud mamt mua.

#### Mash wa g Saul ha sho'igchud g Jesus ihmdam

Sh amai i amjed mamtsh ab si s-gewkam i ha sho'igch g Jesus ihmdam amai Jerusalem t am. Kutsh a'ai ahho g e sho'igchuddam amai Judea ch Samaria chechkshani ch ed. Tsh wabshaba hegama Jesus chuhchai pi hasko ahho. <sup>2</sup>Tsh ha'i hegama mo ab d si ihmdam g Jiosh ged hu cheh g Steven k si s-kaidam shoani wehhejed.

<sup>3</sup>Kush g Saul chum s-padchudamk g ha-mihshmda g Jesus ihmdam ch hekaj an wahkhim ha-kihki oidch ch ab i ha chewaimed ch ged hu si ha kuhpahim, chum wa g u'uwu.

#### Matsh g Jiosh ha'ichu ahga am ai g Samaria

<sup>4</sup>Kush wa an wehsko ahgahim g Jesus hegama matsh wa e gantad. <sup>5</sup>Hegai Philip mash wa am d ha-kehsha atsh am hih Samaria kihhim wui k am ha mihshmad ch am ha ahgid mat heki hu an i wuhsh g Jiosh si Kehsha. <sup>6</sup>Kush ab si kaiham hegama hemajkam mo haschu i ha ahgid ch am neid mo s-hasigam ha'ichu hab junihim g Jiosh gewkdagkaj. <sup>7</sup>Mu'ijj ash e dodajid hegama mash g jijawul an ha u'ukch. Kush si hihnk g jijawul

gam hu hihimadch. Kush mu'ijj ha dodajid hegam mo pi hihimdag ch hegam mo pi ab hu gewpk. <sup>8</sup>Sh si s-hehgig g hemajkam amai.

<sup>9</sup>Sh am hema kih g o'odham mash hab chehgig Simon ch heki hu wa'i amjed am hab junihim g s-hasigam ha'ichu ch hab chum e wua mo d ge mahkai. <sup>10</sup>Kush wehs g hemajkam am si neidachug ch ab si has elid, chum wa hegam mo d s-chu a'amichuddam.

Kush wehsijj hab kajj, "Heg oki d ge mahkai ch ab u'ukch g e-gewkdag Jiosh t amjed." <sup>11</sup>Bash kajj ch ab si kaiham nash pi heki hu wa'i amjed hab junihim g s-hasigam ha'ichu.

<sup>12</sup>Tsh wabshaba am hahawa ha mihshmad g Philip ab amjed g Jiosh kownaltalig ch ab amjed g Jesus Christ. Kutsh ab i s-wohochud k e pahl wapko. <sup>13</sup>Tsh hab wa'ap ab i s-wohoch g Simon k e pahl wakon k amjed pi hebai dagito g Philip k ab si has elid am i neidok mo hab junihim g s-hasigam ha'ichu.

<sup>14</sup>Tsh am i ha ai hegam Jesus chuhchai ab Jerusalem t ab matsh idam Samaria t am o'odham ab bei g Jiosh ha'ichu ahga. Kush am ha chehani g Peter ch John matsh am wo ha mihshmedo. <sup>15-16</sup>Tsh am hihi idam k ged hu dada k am ha wehm e hemapai. Kutsh eda pi koi bei g gewkdag ab amjed g Hekia S-ap'ekam Gewkdag hegam matsh e pahl wapko. Kutsh am e ho'ige'idahun k ab tai g Jiosh mat hab wo wa e juh am ha tahgio <sup>17</sup>k amjed an i ha tahtamahi ab ihmch g Jiosh. Tsh g Hekia S-ap'ekam Gewkdag ab hahawa ha mah g gewkdag.

<sup>18</sup>Tsh g Simon am i nei ihda k chum s-ha namkidam <sup>19</sup>k hab kajj, "Ab g i ni-mahki ihda gewkdag mant hedai ab wo i taht, t wo bei g gewkdag ab amjed g Hekia S-ap'ekam Gewkdag."

<sup>20</sup>Sh wabshaba hab kajj g Peter ab wui, "T wabsh wo huhug g s-m-kaischuda hab wa masma mapt ahpi wo huhug. Pi o hab chum chu'ig mapt hekaj wo nolawt g Jiosh mahkigdag. <sup>21</sup>Pi o sha'i ap'e g m-chegitoi am Jiosh tahgio. K heg hekaj pi ab hu d sha'i m-wuikam ihda chikpan. <sup>22-23</sup>Gan o hu wabsh i si m-u'ukch g pi ap'ekam napki pi s-chu hehgamk. Pt gam hu wo s-ohhod g pi ap e-chegitoi k ab wo i e ho'ige'idahu Jiosh wui. Tp hems gam hu hab wo i juh g m-chu'ijig."

<sup>24</sup>Sh hab kajj g Simon ab ha wui, "Ab g wo si i s-ni-ho'ige'id k am wo e ho'ige'idahu Jiosh wui ni-wehhejed mat pi gam hu hab wo ni-juh."

<sup>25</sup>Tsh am hahawa ha mihshmad g Peter ch John ab amjed g Jesus k am ha ahgi mo haschu g e-wuhpuikaj neid. Tsh am hebai i cheka. Kutsh gam hu uhpam hihi Jerusalem wui am ahgachugch g s-kehg ha'ichu ahgaj g Jiosh am a'ai kihhim ch ed heg eda Samaria chekshani.

#### **Matsh hema e do'ibia g Ediopia t am o'odham**

<sup>26</sup>Kush g anghil am hema neok ch hab kajj ab Philip wui, "Am g i e nakog k gam hu hihm k am wo i ai hegai wohg m an hims tohono jewed ch ed am ha shahgid g Jerusalem ch Gaza."

27-28 Tsh wa woho am i e nako g Philip k gam hu hih.

Sh eda am hema med g e-kalitikaj ch d Ediopia jewed t am o'odham. Id ash g kownaligaj am kehshch mash d lial nuhkuddam. Kush am e mihshmdahim Jerusalem t am ch hemu am uhpam ep wo chihpia Ediopia wui.

29 Kush hab kajj g Hekia S-ap'ekam Gewkdag ab wui g Philip, "An g i miabid hegai kalit k gan hu hugidaj an wo i hih."

30 Tsh am hahawa si meh g Philip k an i miabi g kalit. Kush ihda am ne'okchulid hegai matsh g Isaiaabad an o'oha.

Kush am kah g Philip ch ab kakke, "Nap s-amichud hegai map an ne'okchulid?"

31 Sh hab kajj ihda s-has ha'ichu, "Pi ant has masma wo s-amich, heg hi wa matp am hema wo i ni-tashogi," ch amjed ab i wai g Philip mat gan hu wehmaj wo dahiwua kalit ch ed. T wa woho an i chesh.

32 Kush eda id an ne'okchulid mo hab chu'ig an Jiosh o'ohana ed:

T am hema wo i wuhsh g o'odham mat wo e wepogi g kahwal.

Neh, pi at wo shosha g kahwal mamt hekid wo sho'igchud k wo mua.

Pegih, t hab wa masma pi has wo sha'i chei ihda o'odham

33 mamt hekid pi ap wo lodait k wo mua.

T hab pi hedai wo e nako mas wo ah Mamt he'es i ge'e pi ap'ekam hab juh ab wui.

*Isaiah 53:7-8*

34 Sh hab kajj g s-has ha'ichu ab Philip wui, "Am g ni-ahgid. Doh'o hab ahg g Jiosh ha'ichu i tashogiddam? No hejel hab e ahg aha no wabsh hema hab ahg?"

35 Tsh g Philip amjed am i shonch id ab mash am ne'okchulid k am ahgid g s-kehg ha'ichu ahga ab amjed g Jesus.

36 Sh am wabsh kia wohpo wohg oidch ch am hu hebai ne'ibij mash am ge shuhdagi. Sh hab kajj g s-has ha'ichu, "Neh, m ia ge shuhdagi. No am hig ha'ichu ehpi manis heg hekaj pi wo ni-pahl wako?"

[37 Sh am hahawa ahgid g Philip, "Bapt wa'i masma wo e pahl wako mapt wehskaj am wo i e dagito Jesus wui."

Sh hab kajj, "Heu'u, wehskaj ant am wo i ni-dagito wui."] 38 Sh am hahawa i ahgid hegai e-pionag mo melchudahim g kalit mat wo keshwua. Tsh am huhud ab kalit t ab k am i huhud shuhdagi ch ed. Tsh am pahl wako g Philip ihda o'odham. 39 Tsh g Hekia S-ap'ekam Gewkdag gam hu wa hekaj i bei g Philip. Sh amjed si s-hehgig ihda s-has ha'ichuch gam hu uhpam meh pi hekid ep sha'i neidk g Philip. 40 Tsh g Hekia S-ap'ekam Gewkdag gam hu u'apa g Philip Ashdod kihhim t am. Tsh am i ahgahi g ha'ichu ahga ab amjed g Jesus k ga hu ai g Cesaria kihhim.

#### Matsh hegai Saul ab i e dagito Jesus wui

**9** Kush eda id oidam g Saul wabsh kia ha oid hegam mash am oid g Jesus himdag ch s-gewkam ha ebkioid ch s-ha

kokdaimk. Sh am hu hebai i, sh ab si tahni g uhgchu pahl <sup>2</sup>matsh am wo ha o'ohani g papal am Damascus kihhim t am. Kutsh heg wo be k am wo him k wo ha chehgi. Tsh heg am wo s-mahchk mo u'ukch g e-ap'edag. Kutsh wo ha ui heg am mo am oid g Jesus himdag k am wo uhpam i ha ui Jerusalem wui, chum wa g u'uwi. Tsh wa woho hab e juh g uhgchu pahl.

<sup>3</sup>Tsh am hih g Saul ha'i ha wehm g chechoj k gam hu i aihim g Damascus kihhim. Tsh haha wabsh ha'ichu si ton ab dahm kahchim t amjed an wehgaj. <sup>4</sup>Tsh am i gei g Saul jewedo. Sh ab hema si neok ab dahm kahchim t amjed ch hab kajj, "Saul, s-wohom ap hig ni-sho'igchud."

<sup>5</sup>Sh si has elid g Saul ch hab kajj, "Dohp wud ch ab neok?"

Kush hab kajj hegai mo ab neok, "Dani ahni Jesus. Kup ha sho'igchud heg am mo am oid g ni-himdag. <sup>6</sup>Ab g i wamig k am hihm k am wo i wah Damascus ch ed. T am haha wo hema m-ahgi mapt haschu am hab wo chum juh."

<sup>7</sup>Tsh heg am mo am wehmaj ab wabsh i gewpka k pi has sha'i kajj ch ash hi wa kah g ne'oki ch wabshaba pi sha'i neid mas hedai ab neok. <sup>8</sup>Tsh am hahawa i wami g Saul k ab chum si i nea. Tsh wabshaba pi ab hu mamsi g wuhpuij. Kumtsh am haha wabsh i wanimed k ged hu u'apa Damascus ch ed. <sup>9</sup>Kush waik tashkaj pi ha'ichu sha'i neid ch ep pi ha'ichu sha'i ko'a ch pi ha'ichu ih'e.

<sup>10</sup>Kush eda am hema d Jesus ihmdam amai ch ash hab chehgig

Ananias. Tsh g Jiosh am ha'ichu hab juh nenaj tahgio mash heg eda g Jesus am chehcheg.

Sh g Ananias hab kajj, "Shahchu ap tatchua, ni-Jioshga?"

<sup>11</sup>Kush hab hahawa kajj g Jesus, "Am g i e nakog k am hihm heg kih wui Judas mo am kih Shelini Kahya oidch. Amai o hema dak ch e ho'ige'idahun ch hab chehgig Saul ch ab d kihkam Tarsus kihhim t ab. <sup>12</sup>Kunt am nenaj tahgio ha'ichu hab juh mapt am wo jiwia wui ahpi Ananias ch ab wo taht mat ep wo mamsi g wuhpuij."

<sup>13</sup>Sh hab kajj g Ananias, "Ni-kownalig, ihda o'odham atsh mu'i ha sho'igch g m-hemajkamga am Jerusalem ch ed. Mu'ijj o hab ni-ahgid ab amjed. <sup>14</sup>Kutsh heg hekaj ia jiwia mash u'ukch g ap'edag ab ha amjed g u'ugchu papal mat wo uhpam i ha ui heg am mo ab m-ihm."

<sup>15</sup>Kush hab kajj g Jesus ab wui, "Am apt wo wa hih nant pi id am si i kei mat am ni-wehhejed wo chikp am i ahgahimk g ni-himdag ha wui g Tutuligo ch am ha wui g nahnko mahs hemajkam ch kokownal. <sup>16</sup>Nt ahni am wo wa chehgi ihda Saul mat has i masma wo e sho'igch am ni-wehhejed."

<sup>17</sup>Tsh wa woho am hih g Ananias heg wui kih k ab si i s-ha ho'ige'el g kihkam. Tsh ab i wakki. Tsh ab hahawa e mahtchul g Ananias Saul wui k hab kajj, "Ni-nawoj, Saul, am apsh neid g ge'echu t-kownalig Jesus ab himadch wohg oidch. T heg ab ni-cheha mantsh ab wo i him k ab wo m-taht. Tsh ep wo mamsi g m-wuhpui. Kutsh

ab wo m-mah g gewkdaj g Hekia S-ap'ekam Gewkdag." Neh, bash kaj ch ab hahawa taht. <sup>18</sup>Tsh ab ha hekaj i mamsi g wuhpuij. Tsh hahawa ep s-ap ha'ichu neid k am ha hekaj i e nakog k e pahl wakon <sup>19</sup>k ep ha'ichu hug k ab uhpam ep i gewka.

**Matsh am ha mihshmad g  
Saul Damascus t am**

Sh g Saul am he'ekia i tash ha wehmajkahim g Jesus ihmdam amai Damascus t am. <sup>20</sup>Kush am ha'i chechopi g Tutuligo. Sh g Saul am ha mihshmad g e-wehm o'odham ab amjed g Jesus am ah ahgidch mo d Jiosh alidag.

<sup>21</sup>Tsh si has i el hegam mo hedai i kah k hab kaj, "Aha no pi d ihda mash an ha kokdahim hegam mash am oid hegai himdag Jerusalem t ab ch heg hekaj ia jiwia mat in wo i ha u'ihim k am uhpam wo i ha ui u'ugchu papal ha wui."

<sup>22</sup>Tsh g Saul mihshmda am i si e gewkai. Kutsh wa wohokamch mo g Jesus d Jiosh si Kehsha. Tsh hekaj pi e nako g wehmaj o'odham mat ab hu has wo ah.

<sup>23-24</sup>Sh am hu i hebai amjed, tsh g Tutuligo am i e nako matsh wo mua g Saul. K eda si uhgk kolhaitas g kihhim. Kumsh si nuhkud g kihjegaj tash oidam ch s-chuhugam oidam. Tsh wabshaba s-mai g Saul mam s-mu'amk. <sup>25</sup>Tsh hegam mat ab i s-wohoch g Saul ha'ichu ahga ab amjed g Jesus am dai washomi ch ed k ab i huduni chuhug ch ed g wijinakaj ab amjed mash ab hebai ge wintani kolhai t ab.

**Matsh ged hu uhpam jiwia  
g Saul Jerusalem t am**

<sup>26</sup>Tsh amjed gam hu hahawa hih Jerusalem wui k ab chum ha shahgid i s-wahkim hegam Jesus ihmdam mat ab wo i ha wehmt. Sh wabshaba s-ehbid ch pi wohochud mas woho pi has wo ha juh <sup>27</sup>Kush oi wa am wehhejed neok g Barnabas am ha wui g Jesus chuhchai. Tsh hegam hiwigi matsh am i wahki ha shahgid. Sh am ha ahgid mash g Saul am himad ch haha wabsh neid g Jesus amai wohg ch ed ch ep kah mo ab neok. Sh am ep ha ahgid matsh has masma si s-gewkam am i ha mihshmad ab amjed g Jesus amai Damascus t am. Tsh g Jesus chuhchai am hahawa s-wohoch. <sup>28</sup>Sh am ha wehm dakahim ch wehsko oimmed ch am si s-gewkam ha mihshmad g hemajkam ab amjed g Jesus Jerusalem ch ed.

<sup>29</sup>Kutsh hegam Tutuligo mo neneok g Greek ne'okikaj am i chum e nako matsh wo mua nash pi ha wehm e ne'owin ab amjed g Jesus. <sup>30</sup>Kutsh g Jesus ihmdam am i kah ihda k am i bei Cesaria kihhim wui k am ahgid matsh gam hu wo hih e-kihhim wui mash d Tarsus. Neh, tsh gam hu hih.

<sup>31</sup>Tsh am hahawa dodolimat ha'ichu am ha wehhejed wehsko am Judea ch Galilee ch Samaria ch ed. Kutsh mu'i ep ab i s-wohoch g ha'ichu ha-ahga ab amjed g Jesus k ab si has elid g Jiosh. Kush ab si ha wehmaj g Hekia S-ap'ekam Gewkdag.

**Matsh am i ha wehmt g Peter  
Lydda t ab ch Joppa t ab**

<sup>32</sup>Sh eda g Peter an wehsko oimmed e-jewedga oidk ch am i ha chehgim hegama mash ab ihm g Jesus. Sh am ha'i dadha Lydda kihhim t am. Kutsh ged hu jiwia.

<sup>33</sup>Sh am hema kih g pi himidkam ch hab chehgid g Aneus ch ab wabsh i s-moik ch ash gigi'ik a'ahid ab pi sha'i e nako mas am wo i wami ab e-wo'ikud amjed.

<sup>34</sup>Kutsh g Peter am i chehgim k hab kajj ab wui, "Aneus, Jesus Christ at wo m-doaj. Ab g i wamig k am i holiwkad g e-wahpakus."

Tsh am ha hekaj i kekiwua k am hab e juh. <sup>35</sup>Kutsh mu'ijj ab i s-wohoch g s-kehg ha'ichu ahga ab amjed g Jesus hegama mo am kih Lydda ch Sharon kihhim t am nash pi neid matki doa ihda o'odham.

<sup>36</sup>Sh am hema kih g uwi Joppa kihhim t am ch d e do'ibiakam ch chum hekid s-ap ha'ichu am hab junihim ch am ha'ichukaj i ha wehmaj g sho'igkam. Sh hab chehgid ihda Tabitha mo hab d ahga Kuhwid. <sup>37</sup>Kush am wabsh kia daha g Peter Lydda t am. Tsh am wabsh si mumku ihda uwi k am i muh. Tsh am i ap'ech g chuhkugaj k am woi mash an hema kehk g kih gan hu uhgk kih dahm.

<sup>38</sup>K eda g Joppa pi sha'i mehk ab Lydda t amjed. Kumtsh am i kah amai Joppa t am mo am ha'ichug g Peter k am gohk ha cheha g chechoj matsh am wo wohp k ab wo wai. Kutsh wa woho am wohp k am wai matsh s-hohtam ab wo i hih Joppa

wui. <sup>39</sup>Tsh am wa hekaj i e nako g Peter k gam hu ha oi.

Kutsh ged hu dada. Tsh g Peter gan hu i wah mash an wo'o g muhki. Tsh wehsijj gan hu biha g hehe'ejel wi'ikam u'uwi k si shoani ch ab chehgid g wehshchuga matsh wa haschu hab ha juni. <sup>40</sup>Tsh gam hu wehs i ha wuwhas g Peter k am i tonwua k e ho'ige'idahu ab Jiosh wui k ab hahawa si neok wui g muhki ch hab kajj, "Tabitha, ab g i wamig."

Tsh am ha hekaj i e chegito k am i nei mash am kehk g Peter k shel i dahiwua. <sup>41</sup>Kutsh g Peter an i wehmt. Kutsh kekiwua. Tsh ab hahawa wehs i ha waid k ab ha chehgi mo d doakam. <sup>42</sup>Tsh ihda matsh haschu has e juh am wehsko kaida Joppa t am. Tsh mu'ijj ab i s-wohoch g s-kehg ha'ichu ahga ab amjed g Jesus. <sup>43</sup>Sh mu'i tashkaj am dakahim g Peter Joppa t am heg wehm mash hab chehgid g Simon ch ash g hogi chikpan hab wua.

**Matsh ha'i e do'ibia g gawul  
mahs hemajkam**

**10** Sh am dadha g siant shondal Cesaria kihhim t am mash ab amjed g Italy jewed. Kush g ha-uhgchuga hab chehgid g Cornelius <sup>2</sup>ch ash si oid g Jiosh himdag ch am ep i ha wehmt g sho'igkam Tutuligo ch ab ihm g Jiosh. Kush g wehmaj kihkam wehsijj hab wa'ap ab si ihm g Jiosh.

<sup>3</sup>Sh hema tash mash d i waik ohla im hab i juhk, tsh am nenaj ed hab e juh matsh am jiwia g anghil k am si chehch hab kajjch, "Cornelius."



<sup>4</sup>Sh ab hu wabsh si neid ihda anghil ch wabsh s-ehbeni ch hab kaj, “Shahchu ap ahgahim ch ab neok?”

Sh hab kaj g anghil, “Ab o kaiham g Jiosh g m-ho'ige'idahuna ch s-hohho'id hegai map haschu am hab junihim g sho'igkam ha wehhejed. <sup>5</sup>Pegih, pt hemuch ha'i wo ha cheha g chechoj mat am wo hihi Joppa wui k am wo nei hegai mo hab chehgig Simon Peter. <sup>6</sup>Am o da heg kih am mo d hogi chikpandam ch hab wa'ap chehgig Simon ch am kih ge kahchki hugid an.”

<sup>7</sup>Tsh amjed gam hu hahawa hih hegai anghil mash ab wui neok. Tsh g Cornelius am hahawa waik ha wai g e-pionag. Sh hema idam d shondal ch si oid g Jiosh himdag. <sup>8</sup>Kutsh am ha ahgi idam matsh haschu has e juh k am hahawa ha cheha mat gam hu wo hihi Joppa wui.

<sup>9</sup>Sh am ba'ich d i tash matsh am dahm i juh, sh am wabsh kia hihim idam ch ab hi wa aihim g kihhim. Tsh eda g Peter gm hu hejelko him k am e ho'ige'idahun. <sup>10</sup>k ash am i si bihugim k chum ha'ichu s-hugimk. Tsh eda koi bai g hihidod. Kutsh am Peter nena ed hab e juh <sup>11</sup>matsh ab i e kuhip'o g dahm kahchim. Kutsh ab ha'ichu i e huduni jewedo k hab mahs mo g lohna ch sha'i si ge'ej ch an a'ai e u'ukch chuhchpulij an ch ab i tadanich. <sup>12</sup>Sh id eda am ha'ichug g nahnko mahs ha'ichu doakam ch wahammad ch u'uwhig.

<sup>13</sup>Sh hab kaj g Hekia S-ap'ekam Gewkdag, “Peter, i g wuhshani k

am wabsh chum haschu wo ha mua idam k hekaj wo e gegos.”

<sup>14</sup>Tsh wabshaba g Peter hab si chei, “Ih, pi ant am hu hab wo ni-juh, ni-kownalig. Pi ani hekid ko'a hegai mo g m-chehanig pi t-hiwgid machs wo ko'ad.”

<sup>15</sup>Sh hab hahawa kaj hegai mo ab neok, “Pi g hab sha'i elid mas pi ap'e hegai mo haschu g Jiosh hemu am m-chehgid mo s-ap'e.”

<sup>16</sup>Tsh waikko hab e juh ihda am nenaj ed. Tsh amjed im hu hahawa uhpam i e bei ihda ha'ichu am dahm kahchim wui.

<sup>17</sup>Sh am wabsh kia oidahim g Peter hegai matsh haschu nei. Tsh heg i eda idam Cornelius pionag am i s-mai mo hebai i kih g Simon k am dada k ab gegok kolhai kihjeg t ab <sup>18</sup>ch ab si s-kaidam ha kakke, “No ia hema daha mo hab chehgig Simon Peter?”

<sup>19</sup>Kush eda g Peter am wabsh kia chum a'amichud mas has d ahga hegai mat am nei.

Kush hab kaj g Hekia S-ap'ekam Gewkdag, “Neh, ia at ha'i dada k s-m-neidam. <sup>20</sup>Pt am wo i e nakog k am wo ha nei. Pi g has sha'i ha elid mo d ge gawul mahs hemajkam k wabsh wo ha oi. Ahni o d ni-tatchui mat ab i hihi.”

<sup>21</sup>Tsh wa woho am i hud g Peter k hab kaj ab ha wui idam o'odham, “Ahni ani wud mam s-ni-neidamk. Shahchu amt ahgk ia dada?”

<sup>22</sup>Sh hab hahawa kaj idam o'odham, “No pi ab t-chehani g Cornelius. Heg o d shondal ha-uhgchuga Cesaria t ab ch si s-ap d o'odham k ch ab si ihm g Jiosh. K g Tutuligo hab wa'ap ab si has

elid. Tsh g anghil ab wui i hih ab amjed g Jiosh k hab ahg mat ab wo i m-wai e-kih wui k wo m-kah mapt haschu wo i ahgi.”

<sup>23</sup>Tsh ab i ha wahpki g Peter idam waik o'odham mat am wo wa'i kohk.

Sh an ba'ich d i tash, tsh i e nakog k gam hu hahawa ha oi. Tsh ha'i ep ha oi hegam mash d Jesus ihmdam ch ab d kihkam Joppa t ab. <sup>24</sup>Am ba'ich d ep i tash. tsh ged hu hahawa dada Cesaria t am.

Tsh oi wa g Cornelius heki hu am i ha wai g e-hajuni ch e-naipijju. Kush idam am wehmaj ha nenida.

<sup>25</sup>Tsh ab wabsh chum i wah g Peter. Tsh g Cornelius ab si da'iwuni k ab si i gei wecho ab si has elidch.

<sup>26</sup>Tsh wabshaba hab ah g Peter, “Pi g sha'i ni-wui i gehsh. Dani wabsh o'odham.” <sup>27</sup>Kush am e wehm neneokhim ch am i wahp. Sh am mu'i dadha g hemajkam.

<sup>28</sup>Kush am ha neid g Peter ch hab kajj ab ha wui, “Am am wa s-mahch mach ahchim Tutuligo pi sha'i hiwgidas ab t-himdag amjed machs ab wo i s-em-hajunima ahpim mam d gawul mahs hemajkam, ni'ichs am hu wo em-chehgim em-kihki wui. T wabshaba g Jiosh am ni-chehgi mant i'ajed pi am hu has wo sha'i em-elidad. <sup>29</sup>Nt hekaj ab i hih pi sha'i has elidk mam d ge gawul mahs hemajkam. Pegih, m haschu ahgch am ni-waid.”

<sup>30</sup>Sh hab kajj g Cornelius, “Am ani ni-ho'ige'idahun ni-kih am d hu hema i tako imhab i juhk. T am haha wabsh hema jiwia g o'odham. K si tonod g wehshugaj. K ab kehk ni-wui <sup>31</sup>ch hab kajj,

‘Cornelius, ab o kaiham g Jiosh g m-ho'ige'idahun ch s-hohho'id hegai map haschu am hab junihim g sho'igkam ha wehhejed. <sup>32</sup>Pt wo ha'i ha cheha mat am wo hihi Joppa wui k am wo wai hegai o'odham mo hab chehgig Simon Peter. Am wo da heg kih am mo d hogi chikpandam ch hab chehgig Simon ch an kih ge kahchki hugid an.’ Neh, bo kajj.

<sup>33</sup>“Kunt am hahawa ha'i ha cheha mat am hihim k ab i m-wai. Kupt s-ap e juh k ab i hih. Kuch hemuch ia dadha am nenaj ed g Jiosh ch s-kaimk hegai mat haschu g Jiosh am wo i m-ahgi mapt am hab wo chei.”

#### Matsh haschu k ab ha mihshmad g Peter

<sup>34</sup>Tsh wa woho am hahawa ha'ichu i ahgahi g Peter k hab kajj, “Hahawa ant wa s-mai moki woho mo g Jiosh wehs ha wepo masma ha neid g nahnko mahs hemajkam. <sup>35</sup>K hegam d si tatchuij mo hedai ab i si has elid ch am hab junihim g s-ap'ekam, chum as pi d wo Tutuligo hemajkamk. <sup>36</sup>Am amki chum heki hu kah ab amjed ihda mant haschu wo i em-ahgi nam pi ia t-shahgid dadha ahchim Tutuligo. K ahchim am t-ahgid g Jiosh mash s-ha do'ibiamk g hemajkam am gahi wuhshanim g e-alidag Jesus Christ. Heg o wud mat g Jiosh am i kei mat wehs d wo ha-kownaligk g nahnko mahs hemajkam. <sup>37-38</sup>K wa am hema t-jehnid ab amjed g Jesus ch am t-pahl wapkon ch hab chehgig John. T am i wuhsh g Jesus k am e pahl wako heg ab

John. T g Jiosh ab mah g si ge'e gewkdag am gahi wuhshanim g Hekia S-ap'ekam Gewkdag mat hekaj hab wo junihid g e-chikpan. T g Jesus am i shonwuich g e-chikpan Galilee chekshani ch ed k am hahawa wehsko hab junihim Judea chekshani ch ed. Jiosh o am wehmaj. K hekaj wehsko i ha wehmt g e-hemajkamga ch ha dodajid hegam mo g jiauwul ha sho'igchud.

<sup>39</sup>“Kuch ahchim am wehmajkahim ch g si t-wuhpuikaj neid hegai mo haschu hab junihim am wehsko t-jewedga ed ch am Jerusalem ch ed. Kumt an be k mua ab naggiak kots t ab. <sup>40</sup>T wabshaba g Jiosh ab uhpam i wuhshad muhkig amjed mo d i waik tash k am i t-chehgi. <sup>41</sup>K pi wabsh chum hedai neid. Ahchim ach wa'i neid mat he'ekiajj g Jiosh heki hu am i t-chuhcha. Tt wa am wehmaj t-gegos am i dahm mat g Jiosh ab i wuhshad muhkig amjed. <sup>42</sup>Jiosh atsh am si i kei matsh wo ha do'ibia hegam mat ab wo hiwgad k wo ha lodai hegam mat pi wo e do'ibia. T g Jesus ab t-mohto'i matt am wo si wohokamch ihda k am wo ahgahid g s-kehg ha'ichu ahgaj. <sup>43</sup>Jiosh at gam hu hab wo i juh g pi ap ha-chu'ijig wehs hegam mat ab wo i s-wohoch g ha'ichu ahgaj ab amjed g Jesus. Id o wehsijj wohokamchud g kekelibad Jiosh ha'ichu i tashogiddam.”

**Matsh g gawul mahs hemajkam ab bei g Hekia S-ap'ekam Gewkdag**

<sup>44</sup>Sh am wabsh kia neok g Peter. Tsh ab i hud g Hekia S-ap'ekam

Gewkdag ha dahm hegam mo am kaiham k ab si i ha mah g gewkdag. <sup>45-46</sup>Tsh am gawul ne'okikaj neneo mat pi hebai mai k ab si ihm g Jiosh. Tsh am i ha kaiok ab si e totods hegam mo wehmaj g Peter natki pi g Hekia S-ap'ekam Gewkdag ab si i ha mah g gewkdag hegam gawul mahs hemajkam.

<sup>47</sup>Sh ab kaij g Peter, “Jiosh atki ab i ha mah g Hekia S-ap'ekam Gewkdag mat hab masma ab i t-mah. No hig pi d ha wuikam mat wo e pahl wapko?” <sup>48</sup>Kumtsh wa woho ha pahl wapko am chehchegeh g Jesus Christ.

Sh idam ab hahawa si ahgid g Peter mat am wo sha'i ha wehm dakahim he'ekia i tash.

**Mamtsh kah mat g gawul mahs hemajkam ab i e nohnogi Jiosh wui**

**11** Tsh am i kah g Jesus wohochuddam amai Judea jewed t am matsh hegam gawul mahs hemajkam ab bei ihda Jiosh ha'ichu ahga. <sup>2</sup>Sh eda am ha'i d hegam mash hab si elid mat hemho wa hab wo juh g Tutuligo ha-himdag hegam gawul mahs hemajkam matsh ab i s-wohoch. Kutsh am hihi idam Peter k am dada Jerusalem t am. Kutsh hegam am ne'owin k hab si ahg, <sup>3</sup>“Kah ach maptsh am ha wehm e gegos hegam mo d gawul mahs hemajkam ch pi pahl hikuchkas. P eda s-mahch mo pi t-hiwgidas machs chum hems am wo i wahp ha-kihki ed.”

<sup>4</sup>Tsh am hahawa ha ahgi g Peter matsh haschu has e juh gd hu i shonchudk mo wa am e ho'ige'idahun Joppa kihhim t am ch hab kaij:

<sup>5</sup>“Am ani daha Joppa t am ch am hu hebai ni-ho'ige'idahun. T am ni-nena ed hab e juh mat ab ha'ichu i e huduni dahm kahchim t amjed k hab mahs mo g lohna ch sha'i si ge'ej ch an a'ai e u'ukch chuhchpulij an ch am ni-tahgio i e ul. <sup>6</sup>Kunt am si i nei eda k nei g nahnko mahs ha'ichu doakam, chum hegam ehp mo s-dodajk ch wahammad ch u'uwhig.

<sup>7</sup>“K ab hahawa hema si neok ch hab kajj, ‘Peter, i g wuhshani k wabsh chum haschu am wo mu'a k hekaj wo e gegos.’

<sup>8</sup>“Kuni hab kajj, ‘Ih, pi ant am hu hab wo ni-juh, ni-kownalig. Pi ani hekid ko'a hegai mo g m-chehanig pi t-hiwgid.’

<sup>9</sup>“K hab ep kajj hegai mo ab neok, ‘Pi g hab sha'i elid mas pi ap'e hegai mo haschu g Jiosh hemu am m-chehgid mo s-ap'e.’ Neh, bo kajj ab ni-wui. <sup>10</sup>Kut id hab e juh waikko. T amjed im hu hahawa uhpam i e bei ihda ha'ichu am dahm kahchim wui.

<sup>11</sup>“Kutki eda heki hu am ha'i dada waik g o'odham. Idam ha-ge'ejig o hab chehgig Cornelius ch am kih Cesaria t am ch ab ha cheha matsh ab wo i ni-wai. Tki am dada mani am da. <sup>12</sup>K hab ni-ahgid g Hekia S-ap'ekam Gewkdag mant pi has wo sha'i ha el mo d ge gawul mahs hemajkam k wabsh wo ha oi. T idam chuhdp t-wepnag m ia gegok am ni-wehm hihi Cesaria wui k am ni-wehm i wahp Cornelius kih ed.

<sup>13</sup>“K heg am t-ahgid matsh g anghil am jiwia kihj am k hab kajj, ‘Am g ha'i ha chehani mat am wo hihi Joppa wui k am wo wai hegai

o'odham mo hab chehgig Simon Peter. <sup>14</sup>T heg am wo em-ahgi mamt has masma wo e do'ibia wehsijj g e-wehm kihkam ha wehm.’

<sup>15</sup>“Pegih, tki wa woho hab e juh. Kunt am him k am wabsh chum ha'ichu i ha ahgid. T g Hekia S-ap'ekam Gewkdag ab i hud ha dahm mat wa hab e juh am t-wehhejed ga hu si i wehpeg. <sup>16</sup>Nt am hahawa i chegito mo wa hab kajj g t-kownalig Jesus, ‘Mat ab i em-mah g John g pahl wakona. T wabshaba g Hekia S-ap'ekam Gewkdag g si ge'e gewkdag ab wo i em-mah pi sha'i mu'i tash i'ajed.’ <sup>17</sup>Neh, t id amjed am si i e tashogi mat g Jiosh ab ha mah hegam gawul mahs hemajkam hegai mahkigdag mat ahchim ab t-mah mat hekid ab i s-wohoch g Jiosh ha'ichu ahga ab amjed g t-kownalig Jesus Christ. Kunt pi has masma am hu wo sha'i kuh g Jiosh id amjed.” Neh, bash kajj g Peter.

<sup>18</sup>Tsh idam am i kah wehs ha'ichu k pi ab hu has hahawa ep ahg ch wabsh si s-hehgigam ab ihm g Jiosh ch hab kajj, “Pegih, boki d Jiosh hab elida mat idam gawul mahs hemajkam hab wa'ap gam hu wo s-ohhod g pi ap e-chegitoi k wo bei g pi ha huhugedam doakag.”

**Matsh g gawul mahs hemajkam e do'ibia Antiok kihhim t am**

<sup>19</sup>Kutsh ha'i hegam matsh wa e gantad matsh hekid i e muhkid g Steven gam hu ahgahi g Jiosh ha'ichu ahga Phenicia ch Cyprus jejewed t am ch Antiok kihhim t am k hegam an wa'i ha mihshmad Tutuligo. <sup>20</sup>Tsh am hahawa ha'i

dada Antiok t am ab amjed g Cyprus ch Cyrene k am i ha mihshmad hegam ehp mo d gawul mahs hemajkam. <sup>21</sup>Tsh g Jiosh am i gewkai g ha'ichu ha-ahga. Kutsh mu'ijj hegam hemajkam ab i s-ha wohochud k ab i e dagito Jesus wui.

<sup>22</sup>Tsh am i kah hegam mash ab ihm g Jesus ch ab dadha Jerusalem t ab matsh has i e juh am Antiok t am k ab hahawa cheha g Barnabas matsh am wo him k wo i ha wehmt.

<sup>23</sup>Tsh ged hu jiwia k am i nei si s-hehgigch matki wa woho g Jiosh ab si s-ha ho'ige'el. Sh am ha ahgid mamt wehs ab wo i e dagito Jiosh wui k pi hekid wo sha'i dagito hegai mamt haschu ab i bei. <sup>24</sup>Sh wa eda si s-ap d o'odham g Barnabas ch si e dagitokch Jesus wui ch ab si u'ukch g gewkdag ab amjed g Hekia S-ap'ekam Gewkdag. Tsh mu'ijj ab i s-wohoch g ha'ichu ahgaj ab amjed g Jesus. <sup>25</sup>Tsh hekaj hab i e ah g Barnabas matsh am wo i bei g Saul mat heg am wo i ha wehmt. Sh eda heg am kih Tarsus kihhim t am.

Tsh am him <sup>26</sup>k am i chehg k ab uhpam i wai Antiok wui. Tsh am uhpam hihim k am dada Antiok t am k hemako ahid ab am i ha wehmt g e wehm wohochuddam amai. Sh eda mu'ij idam. Amai ash Antiok t am mamtsh si wehpeg hab ha chehch Christian.

<sup>27</sup>Tsh wa eda am ha'i dada g Jiosh ha'ichu i tashogiddam ab Jerusalem t amjed amai Antiok t am. <sup>28-29</sup>Sh idam hema hab chehgig Agabus. Tsh g Jiosh am i tashogi ihda mat g bihugig wo gei an wehsko jewed dahm. Kutsh am ha ahgi g Jesus ihmdam amai

Antiok t am. Tsh amai i amjed am i e nakog k am wehsijj i shuligahi g lial am ha wehhejed hegam e-wehm wohochuddam mo am kih Judea jewed ch ed. Kutsh gei hegai bihugig mash eda g Claudius am d kownal. <sup>30</sup>Kumsh am ha chehani g Barnabas ch Saul matsh am wo i ui g lial. Tsh idam am i u'u k ab ha mah g ha wanimeddam g Jesus ihmdam amai Judea jewed ch ed.

#### Mamtsh am ba'ich i ha sho'igch g Jesus ihmdam Jerusalem t am

**12** Tsh eda am i ha sho'igch g kownal Herod hegam mash ab ihm g Jesus <sup>2</sup>k ab ha chehani g e-shondalig. Tsh idam an bei hegai James mo d John wehnag k mua g is-pahyokaj. <sup>3</sup>Kush mu'li si s-hohho'id g Tutuligo matsh hab e juh ihda. Tsh heg hekaj wabsh ba'ich i si e gewkai g Herod k g Peter an ep bei. Kutsh eda e ai g si ge'e mihshmda mo eda g Tutuligo pi ko'a g hegai pahn mo jewajidas wewa'ak tash oidam. <sup>4</sup>Tsh am ha cheha g Herod g e-shondalig matsh wabsh wo kuh g Peter. Kumtsh am haha wo lodai am ha tahgio g hemajkam mat am wo i ha'asa e piast. Tsh gamai chuhdp i e chuhcha g shondal matsh gi'ik e wehm wo nuhkud tash oidam ch s-chuhugam oidam. <sup>5</sup>Sh wabshaba heg oidam am hahasko e hehemapad g Jesus ihmdam ch am wehhejed si e ho'ige'idahun.

#### Matsh g anghil am i wuhshad g Peter ab kukpaikud amjed

<sup>6</sup>Kutsh am i e ai matsh ba'ich i si'alim wo e lodai g Peter. Tsh am

i s-chuk. Sh am wo'o ch kohsh ha shahgid g gohk shondal mash am nuhkud. Kumsh gan hu si wupulshch g nohnoij ch kakhioj g gohk e hukshchim wapainomikaj. Sh an gohk ep gegok g shondal ch am nuhkud g kukpaikud kihkijeg.

<sup>7</sup>Tsh am haha wabsh jiwia g anghil k am wui i kekiwua g Peter. Tsh wabsh si ton am kukpaikud ch ed. Kutsh ihda anghil ab si ugij g Peter k wuhan k hab kajj, “Oi g kekiwua s-hohtam.” Kutsh gam hu wa hekaj a'ai shul hegai e hukshchim wapainomi mamsh an hekaj wupulshch. Tsh am i kekiwua.

<sup>8</sup>Sh hab hahawa kajj g anghil, “An g s-wihnam i e giwuddad k ab si i wuhpud g e-kaikia shuhshk.” Tsh wa woho hab e juh g Peter.

Sh hab ep kajj g anghil, “Ab g wahki g e-lihwa k ab i ni-oid.”

<sup>9</sup>Tsh ab wahk k gam hu i oi. Kutsh am i wuwaha ab amjed mash am kuhpikahim. Kush sha pi s-wohoma mat woho ab i wuhshad g anghil nash pi hab e ahg mo wabsh chehchk. <sup>10</sup>Tsh am hihim k am i wuwaha wehpeg kihjeg t ab. Kush am hema kehk g shondal ch wabshaba pi am hu sha'i ha neid. Kutsh am ep hihim k gam hu ep wuwaha mash am kahya wui kihjeg. Kush am hema ep kehk g shondal ch hab wa'ap pi sha'i ha neid. Tsh wabsh hejel ab i e kuhkpi'o g kihkijeg. Tsh am wa'i hekaj pi e ha'ichuch g anghil.

<sup>11</sup>Tsh am haha wabsh si i e taht g Peter k hab kajj, “Neh, woho atki hab e juh. Jiosh atki ab cheha g anghil mat ab ni-wui wo hih. Tki heg ab i ni-wuhshad kukpaikud

amjed ch ni-do'ibia ab amjed mat has wo i chum ni-juh g ni-wehm o'odham.”

<sup>12</sup>Tsh amjed am hih kihj wui hegai Mary mo d John Mark je'e. Kush eda mu'ijj am e hemapadch ch e ho'ige'idahun. <sup>13</sup>Kutsh ab si shontpag g pualit g Peter. Tsh am hema hih g ha-pionag k hab chehgig Rhoda.

Sh hab kajj g Peter, “Gam g i kuhpi'ok.” <sup>14</sup>Tsh heg am i amich mo d Peter ch ab neok k si s-hehgig ch gam hu uhpam meh pi ab hu i kuhpi'ok g pualit k ged hu ha ahgid mo g Peter ab kehk jeg ed.

<sup>15</sup>Sh hab kajj hegam ab wui, “Ptp wabsh chehch mo ab s-kehkadma.”

Sh wabshaba am hab wabsh i kajj mo woho.

Sh hab hahawa ep kajj, “Na'as d wabsh kok'oi namtsh pi wo mua.”

<sup>16-17</sup>Kush eda ab wabsh kia shontpag. Tsh ab hahawa i kuhpi'o g pualit k nei mo ab kehk. Tsh am ha hekaj i wah k ab ha ihm k am i ha ahgid mat has masma g Jiosh i wuhshad ab amjed g kukpaikud. Kush si has i elid mat has e juh. Tsh hab hahawa ha ah, “Am g wo ha ahgid hegam James mat g Jiosh ab i ni-wuhshad,” k amjed gam hu hahawa ep hasko hih.

<sup>18</sup>Tsh am ba'ich i mahsi. Tsh am sha'i si e kudu hegam mash am nuhkud g kukpaikud. “T hebai hih g Peter?” bash kajj. <sup>19</sup>Tsh g Herod am hahawa si ha cheha mat am wo i gahghi. Tsh wabshaba pi sha'i mai mas hebai hih. Sh am si i ha chehani g Herod mat ab wo ha kakke hegam shondal mas has e juh. Kush pi neid ch pi mahch mas has e

juh. Kush oi wa am ha chehani mat wo ha kokda.

Tsh amjed gam hu hahawa hih g Herod Cesaria kihhim wui ab Judea chekshani t amjed.

### Matsh muh g Herod

<sup>20</sup>Tsh am hebai i cheka. Kutsh wabsh woho'i bagat g Herod ab ha wui hegam mash am kih Tyre ch Sidon t ab. Kutsh ab wui hihi matsh wo chum ap'ech mash haschu i pi ap'e nash pi am chum huniop. Sh am hema d kownal kehsha ch nuhkud g kihj ch hab chehgig Blastus. Kutsh heg wehpeg ab si i s-nawojima k amjed am wui hihi g Herod k ab kakke mat wabsh ab wo i s-ha ho'ige'el.

<sup>21</sup>Tsh hema kei g tash g Herod k ab si s-kehge e enigadad k ab dahiwua kownal daikud ab k am si s-hasigam ha jehnigi g hemajkam.

<sup>22</sup>Kush ab si hihnk g hemajkam ch hab kajj, "Pi oki d sha'i o'odham ch ab neok noki pi d ge hema jiosh."

<sup>23</sup>Kutsh pi ha shohbi g Herod k pi am hu has el g Jiosh. Tsh heg hekaj g anghil ab ab hab juh g mumkidag mat waptopad k muh. <sup>24</sup>Kutsh g Jiosh ha'ichu ahga i ge'eda.

<sup>25</sup>Tsh g Barnabas ch Saul gam hu uhpam hihi ab Jerusalem t amjed mat am i ui g lial. Kutsh g John Mark am i ha oi.

### Matsh mehk wo ha mihshmedo g Barnabas ch Saul

**13** Sh am ha'i ep d Jiosh ha'ichu i tashogiddam Antiok t am. Hema idam ash hab chehgig Simon ch wabshaba hab e a'aga S-chukchu. Kush hema d

Lucius ch ab Cyrene t amjed. Kush hema d Manaen ch am wehmaj ge'eda g kownal Herod. Idam ash am ha mashcham am ha wehm g Barnabas ch Saul. <sup>2</sup>Kush am hu hebai wehsijj am he'ekia tashkaj wabsh e ho'ige'idahun ch hab pi ha'ichu ko'a. Kush am ha tashogid g Hekia S-ap'ekam Gewkdag mash g Jiosh hab kajj ab ha wui, "Neh, ab ant ha mohto'i g Barnabas ch Saul mat gam hu mehk wo i ahgahi g ha'ichu ni-ahga. Kumt am wo i ha dagito mat hab wo wa e juh."

<sup>3</sup>Kush am ba'ich i himchud hegai mash wabsh e ho'ige'idahun ch pi ha'ichu ko'a ch ab hahawa ha taht idam Barnabas ch Saul matsh hekaj am chehgi mat ha dagito heg wui mat g Hekia S-ap'ekam Gewkdag am i ha tashogi.

### Mash am ha mihshmad g Barnabas ch Saul Cyprus t am

<sup>4-5</sup>Tsh gam hu hihi g Barnabas ch Saul mash wa g Hekia S-ap'ekam Gewkdag am i ha tashogid. Kutsh am ep i ha oi g John Mark matsh am wo i ha wehmt. Tsh idam ged hu dada Selucia kihhim t am. K id an hugidaj an g ge kahchki. K ab hihhim g wapalko. Kutsh idam Barnabas an i chehchsh wahlko ch ed k gam hu aigo i shulig k gam hu dada Cyprus jewed ch ed. Sh am hema kihhimag ch hab e a'aga Salamis. Kush am ha'i chuhch g Tutuligo ha-chechopi. Sh idam Barnabas am i wahpk ch am ha jehnidid ab amjed g Jesus.

<sup>6-8</sup>Sh gam hu aigo hema ep kihhimag ch hab chehgig Paphos. Kutsh gam hu hihim k am ep ha



jehnid. Sh am da hegai mash d kownal id eda jewed ch hab chehgig Sergius Paulus. Kush am hema wehmaj g Tuhligo ch hab chehgig Barjesus ch d s-hasigam ha'ichu hab wuadam ch ha iattogid mash d Jiosh ha'ichu i tashogiddam. Kumsh hab a'aga Elymas mo hab d ahga Ge Mahkai. Sh g kownal d si ha'ichu s-amichuddam o'odham ch ab i ha wai g Barnabas ch Saul nash pi s-kaimk g ha'ichu ha-ahga ab amjed g Jesus. Tsh wabshaba ab ha wui kekiwua hegai Elymas k am i chum e nako mat hab wo juh g kownal mat pi ab hu wo ha wohoch.

<sup>9</sup>Saul o hab ep e a'aga Paul Greek ne'okikaj. Tsh g Hekia S-ap'ekam Gewkdag ab ep si mah g Paul g gewkdag. Sh heg ab si shel i neid g Elymas <sup>10</sup>ch hab kajj, "Neh, dap Jiawul pionag nap pi ab wabsh i si shuhdags g pi ap'ekamkaj. K heg hab m-wua map ab wui kehk g s-ap'ekam ch chum gawul s-junimk g Jiosh ha'ichu ahga. <sup>11</sup>Jiosh at hab wo m-juh mapt pi wo nehnt he'es i tash." Neh, bash kajj g Paul.

Kutsh am wa i hekaj woho hab e juh. Tsh am taht g Elymas mat ab ha'ichu si ma'ish g wuhpuuj. K am wabsh i s-chuhugam wehhejed. Tsh an i dahdaghi an chum hema gahgch mat am wo i wanim. <sup>12</sup>Tsh ab si e tods g kownal k ab i s-wohoch neidok mash has masma g Jiosh am chehgid g e-gewkdag.

**Mash am ha mihshmad hegam Paul Pisidia jewed ch ed**

<sup>13</sup>Tsh am hahawa gahi ep i shul hegam Paul ab Paphos t amjed k gam hu dada Perga kihhim t am

am Pamphylia jewed ch ed. Tsh wabshaba g John Mark am i ha dagito amai k gam hu uhpam hih Jerusalem wui. <sup>14</sup>Tsh amjed gam hu hahawa hihi idam Paul ch Barnabas Pisidia jewed wui. K am hema kihhimag ch hab chehgig Antiok. Kutsh am dada.

Tsh am i e ai g ha-mihshmda tash. Kutsh ged hu i wahp idam Paul e wehm o'odham ha-cheopi ed k am i dadhaiwua. <sup>15</sup>Kumtsh am ne'okchul g Jiosh o'ohana. Sh hegam mash d ha wanimeddam hab hahawa kajj, "T-naipijju, chum ach si tatchua mamt am wo ha'ichu ha ahgi g hemajkam mat heg amjed ab wo i e gewpkai."

<sup>16</sup>Tsh ga hu hahawa i kekiwua g Paul ha ba'ich k hab kajj:

"T-hajuni ch ahpim mam ia ha wehm ihm g Jiosh, ab g wo i ni-kaiham. <sup>17</sup>Jiosh atsh ab i ha gawulkai g t-shohshonbad matsh d wo hemajkamgajk. Kutsh am i mu'ida mash eda am kihkahim Egypt jewed ch ed. Tsh ab hahawa i ha do'ibia ab ha amjed g Egypt hemajkam g si ge'e e-gewkdagkaj. <sup>18</sup>Kush an oiopo tohono jewed ch ed gi'ikko wehst-mahm ahid ab. Sh g Jiosh am s-hemajim ha nakogahim <sup>19</sup>ch am wo i ha wahpki id eda Canaan jewed. Sh eda g wewa'ak kawod dakam hemajkam ia kih. Tsh g Jiosh ha hugio k g ha-jewedga am a'ai i ha tahpjel g t-shohshonbad mash hab masma heki hu ahgid g Abrahambad. <sup>20</sup>Tsh heg i dahm am hahawa i ha chuhcha g Jiosh g s-chu a'amichuddam mash am ha'ichu a'ap'echud ha wehhejed. "Tsh ga hu e ai matsh am i dahiwua g Samuelbad k d Jiosh

ha'ichu i tashogiddam. <sup>21</sup>Kush g t-shohshonbad ab si tahni g Jiosh matsh am hema wo i kei mat d wo ha-kownaligk. Tsh g Jiosh am i kei hegai Saul mash d Kishbad alidag ch ab d Benjaminbad amjedkam. Kush heg d ha-kownalig gi'likko wehst-mahm ahid ab. <sup>22</sup>Tsh g Jiosh im hu hab hahawa i juh g Saulbad k g Davidbad am i kei matsh d wo ha-kownaligk. Sh hab kajj g Jiosh ab amjed:

Ihda David mo d Jesse alidag  
o am si ni-tatchui oidch  
hab masma ch am e tashogi  
mat am hab wo juh hegai  
mant haschu ab wo i ahgi.

*Psalm 89:20*

<sup>23</sup>“Sh hab ep kajj g Jiosh matsh am hema wo i kei g Davidbad amjedkam matsh d wo t-do'ibiakamk. Kut wa woho hab e juh g Jiosh. K g Kehshaj hab chehgi g Jesus. <sup>24</sup>T wabshaba g Jiosh ab hema wehpeg i wuhshad g t-wehm o'odham. K id hab chehgi g John ch ab i ha mihshmad ch hab ha ahg mat gam hu wo s-ohhod g pi ap e-chegitoi k wo e pahl wapko. <sup>25</sup>Tsh ihda John id hekaj am i kuhgi g e-chikpan mo wa hab ha ahg g hemajkam, ‘Pi g hab wo sha'i ni-elidad mani ahni d hegai mam si nenida. Pi ani d ahni ch d wabsh pi ha'ichu an hugidaj an. Mt wo wa nei mat am epai wo i e maskogi hegai mo hig woho d s-has ha'ichu.’ Neh, bash kajj g Johnbad.

<sup>26</sup>“Pegih, ni-wehm o'odham ch ahpim mam hab wa'ap ab si has elid g Jiosh, ab o wehsijj d t-wuikam ihda s-kehg do'ibiadag ahgaj. <sup>27</sup>Hegam kekelibad Jiosh

ha'ichu i tashogiddam atki an o'oha matsh has wo masmak g Jiosh si Kehsha. K g ha-ne'oki e ne'okchulid t-sha'ashagid wehs mihshmda tash. Kuki eda hegam t-hajuni mo ab kih Jerusalem t ab pi amichud g ha'ichu ha-ahga ch hab pi amich g Jiosh si Kehsha mat hekid am jiwia k chum s-ha do'ibiamk. Jiosh at am i kei g e-alidag Jesus mat wo t-do'ibia. <sup>28</sup>K heg pi ha chu'ijig. T eda hegam ab chum chu'ijigch mat g kownal Pilate wo mua. Kumt ab naggia k mua kots t ab k ab hahawa i huduni k gam hu cheh hiha'ini ch ed. <sup>29</sup>Bat wa masma an o'oha g kekelibad Jiosh ha'ichu i tashogiddam mat hab wo e juh. Kut idam am wabsh wohokamch g ha'ichu ha-ahga. <sup>30</sup>T wabshaba g Jiosh ab uhpam i wuhshad muhkig amjed. <sup>31</sup>Tsh amjed mu'likko am si i e chehgi ha wui hegam mash an wehmajkahim ch ab wehmaj i hihi Galilee t amjed ab Jerusalem wui. K idam am si s-mahch ch ahgahim am t-shahgid. “Pegih, ab g wo ni-kaiham, ni-wehm o'odham mam ab d ep Abrahambad amjedkam ch ahpim mam ia ha wehm ab ihm g Jiosh. Ahpim at em-wui gei ihda ha'ichu ahga mamt has masma wo e-do'ibia nat pi gam hu wabsh s-ohhod g t-hajuni ab Jerusalem t ab. <sup>32-33</sup>Kutt hemuch ia dada k ia u'apa ihda s-kehg ha'ichu ahga em-wui. Heki ash hu am ha ahgid g Jiosh g t-shohshonbad matsh wo uhpam i wuhshad g si e-Kehsha ab muhkig amjed. Kutsh wa woho hab e juh. Kutki id heki hu o'oha g Davidbad mat eda koi hab e juh. K an wa o'ohanas gohkkam ne'i ed heg eda

Jiosh heki hu o'ohana mash hab  
kaij g Jiosh ab e-alidag wui:

Ahpi ap d si ni-alidag.

Hemuch ant am i m-maskogi.

*Psalm 2:7*

<sup>34</sup>K hab ep masma an o'ohanas  
mash hab kaij g Jiosh ab e-alidag  
wui:

B ant wo m-mah hegai si hekia  
s-kehg ho'ige'idadag mani  
wa am si ahgid g Davidbad.

*Isaiah 55:3*

Neh, bash kaij g Jiosh ch heg hab  
ahg mat ab i wuhshad g Jesus  
muhkig amjed mat pi hekid wo  
sha'i padt g chuhkugaj. <sup>35</sup>K gan hu  
ba'ich an ep o'ohadag ch hab chu'ig:

Pi at wo sha'i hiwigi g si  
e-Kehsha mas wo padt g  
chuhkugaj.

*Psalm 16:10*

<sup>36</sup>“Neh, pi oki hejel hab e ahg  
g Davidbad natsh pi muh am hab  
juniok hegai mat haschu g Jiosh  
ab mohto'i k am ha wehm e cheh  
g e-shohshonbad. Tsh hi padt g  
chuhkugaj. <sup>37</sup>Heg o hab ahg Jesus  
mat pi sha'i padt g chuhkugaj nat  
pi g Jiosh ab i wuhshad muhkig  
amjed. <sup>38</sup>Pegih, ni-wepnag, id amt  
hekaj wo chum s-mahchk mat g  
Jiosh gam hu hab wo i juh g pi ap  
em-chu'ijig <sup>39</sup>mamt hedai ab wo i  
s-wohoch g Jesus. Heg at am wo i  
em-ap'ech mamt pi wo ha chu'ijigk  
am Jiosh nena ed. T pi ha'ichu ep  
wo e nako mas hab masma am wo i  
em-ap'ech, nih g chehanig.

<sup>40-41</sup>“T an ep o'oha g kelibad  
Jiosh ha'ichu i tashogiddam mo hab  
kaij g Jiosh:

S-e g wo nen'oidk k am wo si i  
oidahi ahpim mam wabsh has  
ni-ahg.

Am ant ha'ichu hab wo juh  
em-shahgid.

Kut am hema wo si s-ap i  
em-tashogi mani d ahni ch  
hab wua.

Mt eda pi ab hu wo ha wohoch.

Nt heg hekaj gam hu hab wo i  
em-juh ab ni-amjed k pi dahm  
ep wo pihk ni-el em-hekaj.

*Habakkuk 1:5*

Neh, bash kaij g Jiosh.

“Pegih, si g wo s-e nen'oidk k  
ab wo s-wohog el g Jiosh. T hab  
pi ab hu wo i em-ai g s-ko'ok  
em-namkidadag.”

<sup>42</sup>Tsh ab i kuhgit g ha-namki. Tsh  
wo chum hihi g Paul ch Barnabas.  
Sh wabshaba g hemajkam ab si ha  
waid mat am ep wo dada ba'ich  
mihshmda tash k am ba'ich ep wo  
i ha ahgi idam ha'ichu. <sup>43</sup>Tsh am  
i himto g hemajkam. Tsh ha'i ab i  
ha oi hegam Paul. Kutsh ab si i ha  
gewkemhu ab ha'ichu ep ha ahgidk  
mat am wo wa e nakogad Jiosh  
hemajmatatig ed. Sh ha'i idam d  
Tutuligo hemajkam ch ha'i d gawul  
mahs hemajkam ch am ha wehm e  
mihshmad.

<sup>44</sup>Sh am ba'ich d i mihshmda tash.  
Tsh chum alo wehsijj ab e hemapai  
g hemajkam matsh wo kah g Jiosh  
ha'ichu ahga. <sup>45</sup>Tsh hegam Tutuligo  
mash pi ab hu ha wohochud si s-ha  
hehgam k hab kaij mo d wabsh  
s-chu iattomkam g Paul.

<sup>46</sup>Tsh wabshaba idam Paul am  
haha wabsh si ha ahgi, “Ni-hajuni,  
bo chum mahs matt wehpeg ab  
wo em-ahgi g Jiosh ha'ichu ahga  
ab amjed g si Kehshaj. Kumtki  
wabshaba s-ohhod k hab sha e wua  
mam pi tatchua g pi ha huhugedam

doakag am Jiosh kihdag ed. Kutt heg hekaj wo em-dagito k hegam ha wui wo i t-nohnogi gawul mahs hemajkam. <sup>47</sup>Bo wa masma am t-chehanig Jiosh. An o o'ohanas mash hab kajj:

Am ant i em-gawulkai mamt am wo i ha tashogi g ha'ichu ni-ahga g nahnko mahs hemajkam wehsko jewed dahm.

T ab em-amjed wo s-mai mat has masma wo e do'ibia. *Isaiah 49:6* Neh, bash kajj g Jiosh.”

<sup>48</sup>Tsh am i kah idam gawul mahs hemajkam k si s-hehgigam ab ihm g Jiosh nash pi ab ha makiog g e-do'ibiadag ahga. Kutsh hegam ab i s-wohoch mat hedai g Jiosh i ha ap'ech mat wo e do'ibia.

<sup>49</sup>Kutsh wehsko i e ahgahi g ha'ichu ha-ahga ab amjed g Jesus heg eda jewed. <sup>50</sup>Tsh wabshaba g Tutuligo am si i ha chu'amu hegam u'uwi mash am ha wehm e mihshmad ch hegam mash d hahha'ichu heg eda kihhim. Kutsh idam am si i ha sho'igch g Paul ch Barnabas k gam hu si ha huhu'i ab amjed g e-jewedga. <sup>51</sup>Tsh idam gam hu hahawa si i shahmud g jewed ab e-tahtad ab am ha chehgidch mat wo ha dagito nat pi pi ap ab hu i ha nei. Tsh gam hu hahawa hihi Iconium kihhim wui. <sup>52</sup>Kush hegam matsh ab i s-wohoch ab Antiok t ab si s-hehgig ch ab si u'ukch g gewkdag ab amjed g Hekia S-ap'ekam Gewkdag.

**Mash hegam Paul am ha mihshmad Iconium t am**

**14** Kutsh am hab wa'ap e juh Iconium t am matsh

g Tutuligo hemajkam ab ha wui gegokiwua. Paul ch Barnabas atsh am i wahp ha-cheopi ed k am si ha mihshmad. Kutsh mu'i ab i s-wohoch g Tutuligo mo g Jesus d Jiosh si Kehsha. Kutsh ha'i hegam mash am ha wehm e mihshmad hab wa'ap ab i s-wohoch g ha'ichu ha-ahga. <sup>2</sup>Tsh wabshaba am i wuwaha hegam Tutuligo matsh pi ab hu wohoch k am si i ha kudu g gawul mahs hemajkam. Kutsh idam s-ha keh'el g Paul ch Barnabas ch hegam ehp matsh ab i s-ha wohoch. <sup>3</sup>Sh wabshaba tash am oiopo idam Jesus chuhchai ha shahgid ch am si tasho ha mihshmad ab amjed g Jesus pihk elidadag. Tsh heg ab i ha mah g gewkdag mat hab wo wuad g si s-hasigam ha'ichu k hab masma wohokamch g ha-ahga. <sup>4</sup>Tsh hegam hemajkam am i e gawulkai mat ha'i ab ha wehmt g Jesus chuhchai k ha'i g ha-obga ab ha wehmt. <sup>5</sup>Tsh wehsijj hegam mat ab ha wui gegokiwua g Jesus chuhchai am hahawa i e ap'ech g e-wanimeddam ha wehm mat wo ha sho'igchud k wo ha ma'ichshul.

**Mash hegam Paul am ha mihshmad Lystra t am**

<sup>6</sup>Tsh idam am i s-mai mamtsh wo ha sho'igch k atsh gm hu wa hekaj ba'ich hahawa ep hihi Lystra kihhim wui. Ihda Lystra o am hab chu'ig Lyconia jewed ch ed. <sup>7</sup>Kutsh am dada k am ha ahgid g s-kehg ha'ichu ahga ab amjed g Jesus.

<sup>8</sup>Sh am ha wui hema daha mash pi himdag ga hu i e-alijk amjed.

<sup>9</sup>Tsh am i nei g Paul mo hab masma ab si kaiham g ahgaj mo ab si

s-wohochud mo g Jiosh wo ho ha doajid. Tsh ab si shel i neid <sup>10</sup>k si s-kaidam hab kajj, “Oi g kekiwua.” Tsh gam si da'iwush g pi himidkam k an has si oimmed.

<sup>11</sup>Tsh am i nei g hemajkam matsh haschu has juh g Paul k ash am si e-ne'okikaj hihnk ch hab kajj, “Ia atki ha'i dada g jijosh o'odham e wepogidch. <sup>12</sup>Id oki d Zeus. Kuki heg d neokdam ch hab d Hermes.” Sh heg hab ahg Paul nash pi heg am neok. <sup>13</sup>Sh am mia kehk g ha-cheopi. Kush heg eda am kehshch g Zeus. Tsh am i ha wehmaj g ha-pahlig. Kutsh am ha u'apa g totolo ch ha'ichu heosig mat ab ha wui wo iagchul g Paul ch Barnabas. <sup>14</sup>Kutsh id pi ha hohho'idach.

Tsh hab ab si wantsh g e-wehschuga k am si wohp ha shahgid g hemajkam k si hihnk ch hab kajj, <sup>15</sup>“Pi g hab wo t-elidad machs d jijosh. Dach wabsh o'odham hab masma mam ahpim. Ia att dada matt am wo em-ahgi mamt wo ha'asa ihm hab masma mo d Jiosh hegai mo pi d wohokam Jiosh. Heg o d wohokam Jiosh mat nahto g dahm kahchim ch jewed kahchim ch wehs ha'ichu mo an hab chu'ig. Kumt heg wui ab wo i e dagito. <sup>16</sup>Heki o hu am hab wabsh junihim g hejel e-tatchui g nahnko mahs hemajkam. Kuki g Jiosh wabsh s-hemajim ha nakogahim. <sup>17</sup>K wabshaba chum hekid hab chu'ig mo am e chehgidahim no pi s-kehg ha'ichu hab em-junid ch ab em-mahkch g juhki ch ab bahijid g ha'ichu em-e'es mamt wo s-kokwogch ch wo si s-ap e

tahtkkad.” <sup>18</sup>Neh, bash kajj idam Paul ch wabshaba chum alo pi ha shohbi nash pi chum si tatchua matsh ab ha'ichu wo iagchul ha wui.

<sup>19</sup>Tsh am hahawa ha'i dada hegam mash wa am ha sho'igchud Antiok t am ch Iconium t am k am i ha nu'ichkwua g hemajkam. Kutsh ab wui gegokiwua g Paul k ma'ichkwua k am i chewaimed k gam hu i wuhshad ab kihhim t amjed k am wua hab elidch mat muh. <sup>20</sup>Tsh wabshaba am e chehm hegam mo ab ihm g Jesus k an wehgaj gegok g Paul. Tsh gam si i wamig k gam hu uhpam hih kihhim wui.

**Matsh ab uhpam dada  
hegam Paul matsh ab amjed  
gam hu ha mihshmedo**

Am ba'ich d i tash. Tsh gam hu hahawa hihi Derbe wui hegam Paul <sup>21</sup>k an i ha ahgidahi g Jesus ha'ichu ahga. Kutsh mu'ijj ab i s-wohoch. Tsh am hahawa hihi Lystra wui ch Iconium wui ch Antiok wui <sup>22</sup>k am si i ha gewkemhun mat am wo hihimad ch ab wo si hiwgad g Jesus. Ha-mashchama ash hab masma matt hemho wa mu'i ha'ichu wo nakog k am haha wo i wahp Jiosh kihdag ed. <sup>23</sup>Tsh am hahawa i ha chuhcha hegam mat d wo ha wanimeddamk am ha sha'ashagid mo hebai i e wehm e nanmek. Sh am hahawa wehsijj wabsh e ho'ige'idahun ch hab he'ekko pi e gegosid. Sh idam Jesus chuhchai ab hahawa i ha dadagitod Jiosh wui.

<sup>24</sup>Neh, batsh wa masma am gahi wuwaha g Pisidia jewed k gm hu dada Pamphylia jewed ch ed <sup>25</sup>k am

ha mihshmdahim Perga kihhim ch ed ch amjed gm hu hahawa ep hihi Attalia kihhim t am.

<sup>26</sup>Tsh am i e nahto g ha-chikpan. Kutsh am gahi i shul ge shuhdagi ch ed an ge'e wahlko ch ed k gam hu dada hegai Antiok t am mamtsh am i ha dagito Jiosh hemajimatalig ed.

<sup>27</sup>Tsh am wehsijj i e hemapai hegam mash ab ihm g Jesus amai. Sh g Paul ch Barnabas am ha ahgid mat g Jiosh am si i ha wehmt k ab ha mah g nahnko mahs hemajkam g ap'edag mat ab wo i s-wohoch g ha'ichu ha-ahga ab amjed g Jesus.

<sup>28</sup>Tash ash am dadkkahim ha wehm hegam mash ab ihm g Jesus amai Antiok t am.

**Natsh am haha wo oidad g Tutuligo himdag hegam mo ab ihm g Jesus?**

**15** Kutsh am ha'i dada Antiok t ab ab Judea t amjed k hab chum ha ahg hegam matsh ab i s-wohoch g ha'ichu ha-ahga ab amjed g Jesus, "Jiosh o am t-chehani Mosesbad o'ohana ed mat g chechoj hemho wa wo e o'oha an e pahl hikuchk. Kumt pi wo sha'i e do'ibia mamtp pi hab wo e juh."

<sup>2</sup>Tsh wabshaba g Paul ch Barnabas pi sha'i hohho'i ihda k am si ha ne'owi idam Judea t am Tutuligo. Tsh am hahawa i e ap'ech matsh g Paul ch Barnabas am wo hihi Jerusalem wui ha'i ep ha wehm k am wo s-mai mat has wo chei hegam ha'i ehp Jesus chuhchai ch ge'eged.

<sup>3</sup>Tsh idam am hihim k am i ha ahgidahi hegam mash ab ihm g Jesus Phenicia jewed oidk ch

Samaria jewed oidk mat g gawul mahs hemajkam ab i e nodagi Jesus wui. Kutsh wehsijj ab si s-ap i e tahtam k si s-hehgig idam mash hedai i kah.

<sup>4</sup>Kutsh ged hu dada Jerusalem t am. Tsh si s-ha ho'ige'el g Jesus chuhchai ch ge'eged ch wehsijj hegam mash ab ihm g Jesus amai. Tsh am hahawa ha ahgi mat haschu k ab am si i ha wehmt g Jiosh mat am hab juh.

<sup>5</sup>Tsh wabshaba am ha'i ab ha wui gegokiwua hegam mash si s-gewkam oid g chehanig ch hab kajj, "Hemho wa at wo e o'oha an e pahl hikuchk g chechoj k am hab wo junihid hegai t-chehanig mo g Jiosh ab t-mahkch."

<sup>6</sup>Tsh am ep e nam g Jesus chuhchai ch ge'eged k tash am a'aga ihda. <sup>7</sup>Tsh g Peter am i kekiwua k hab kajj:

"Ni-wepnag, s-mahch am mant ga hu i wehpeg am ha ahgi g gawul mahs hemajkam g s-kehg ha'ichu ahgaj g Jiosh ab amjed g Jesus nat pi g Jiosh am i ni-gawulkai mant hab wo juh. <sup>8</sup>Jiosh o s-mahch g o'odham chegitoi ch ab ep ha mah g Hekia S-ap'ekam Gewkdag hab wa masma mat ahchim hab t-juh. <sup>9</sup>Kuch heg hekaj s-mahch mo s-ha ho'ige'elid ch gam hu hab i juh g pi ap ha-chu'ijig mat ab i s-wohoch g ha'ichu ahgaj. <sup>10</sup>Pegih, m haschu ahgch ha'i pi'ichud g Jiosh ab s-wehch ha'ichu ha mohto'idch g wechij wohochuddam? Ahchim Tutuligo att pi sha'i t-nako machs wehs am hab wo junihid g t-chehanig. T g t-shohshon hab wa'ap pi sha'i e nako. <sup>11</sup>Pi attki hab

masma wo t-do'ibia. Heg at wo wa'i t-do'ibia t-kownalig Jesus. Ab att i s-wohoch g ha'ichu ahgaj. T heg ab i s-t-ho'ige'id k t-do'ibia. Pegih, t hab wa'i masma wo e do'ibia idam gawul mahs hemajkam.” Neh, bash kaj g Peter.

<sup>12</sup>Sh am hahawa ha ahgid g Barnabas ch Paul mat haschu s-hasigam hab juh g Jiosh gewkdagkaj am ha shahgid g gawul mahs hemajkam. Kush wehsijj ab wabsh i pi shahmuni ch am ha kaiham.

<sup>13</sup>Tsh am i ha'asa neneo. Tsh g James am i kuhgi g ha-ahga mash hab kajj, “Ni-wepnag, ab g wo i ni-kaiham. <sup>14</sup>Peter o am t-ahgid matsh has masma g Jiosh am chehgi mo pihk e elid ha hekaj g nahnko mahs hemajkam ch am ha'i i ha gawulkai mat d wo hemajkamgajk. <sup>15</sup>K id am wohokamchud mat wa has i masma an o'oha g kekelibad Jiosh ha'ichu i tashogiddam mash wa hab kajj g Jiosh:

<sup>16</sup>‘Neh, e at padch g Davidbad kownaltalig.

K wabshaba ab him g tash mant am ep wo i ap'echud k am hema wo i kei g amjedkam am kehkud ed mant heg gahi wuhshanim wo i himch g kownaltalig.

<sup>17</sup>T g nahnko mahs hemajkam ab wo i ni-gahghi.

Hegam ani ab i ha waid mat d wo ni-hemajkamgak.’

<sup>18</sup>Neh, bo kajj g Jiosh ch heg am i t-tashogid heki hu wa'i amjed.

*Amos 9:11-12*

<sup>19</sup>“Kuni hab ep s-che'imk mani hab hi elid matt pi ab hu wo ha mohto'i g t-chehanigkaj hegagawul mahs hemajkam mat ab i e nohnogi Jiosh wui. <sup>20</sup>Tt hi wabsh wo ha ahgi mat has wo e junihid. T hab ab ha wui wo si s-ap e tahtkkad hegagawul t-wehm o'odham mo am ha wehm kihdag. Tt wabsh wo ha cheha mat wo si e nuhkud g hejel e-wehm kihkam wehhejed ch pi ab hu wo ihm hab masma mo d Jiosh hegai mo pi d Jiosh ha'ichu ko'adch mo ab e to'id ha wui k pi wo ko'ad g eh'ed ch hegai mo pi gam hu e iawua g eh'ed e mum'ajch. <sup>21</sup>Id o wehsko si s-ap s-e mahch no pi an ahgachug wehs kihhim ch ed ch am e ne'okchulid t-wehm o'odham ha-chechopi ed.”

**Mamtsh haschu i ha o'ohani  
hegagawul mahs hemajkam  
mo ab ihm g Jesus**

<sup>22</sup>Tsh idam Jesus chuhchai ch ge'eged am i ap'ech am wehs ha wehm hegagawul mash ab ihm g Jesus amai matsh am ha'i wo i ha chuhcha. Tsh idam am wo i ha oi g Paul ch Barnabas am Antiok wui. Sh idam d ha-chuhchai Judas Barsabbas ch Silas nash pi g hemajkam ab si has ha elid. <sup>23</sup>Kutsh ab ha mah g o'ohana matsh wo bek am Antiok wui. Sh hab chu'ig ihda o'ohana:

“T-naipijju mam d gawul mahs hemajkam ch ab ihm g Jesus ch ab kihdag Antiok t ab ch Syria t ab ch Cilicia t ab. B ach si em-ho'ige'elid ahchim mach d Jesus chuhchai ch ge'eged ia Jerusalem t ab.



<sup>24</sup>“Idam Barnabas ch Paul o ab t-ahgid mat am ha'i hihi g t-wehm o'odham k am em-kudu am ha'ichu pi ap em-ahgidk. Kuch eda wa chum pi sha'i ha ap'echud mat hab wo e juh. <sup>25-26</sup>Kutt heg hekaj wehsijj ia t-hemapad k am i ap'ech matt has wo t-juh. B o si i s-ap e dagitokch idam Barnabas ch Paul am chikpanaj ed g t-kownalig Jesus Christ ch hekaj chum alo e ko'ij. <sup>27</sup>Kutt gohk ep i ha chuhcha mat am wo i ha oid k si s-ap wo em-ahgi mach haschu i em-o'ohanid. K d idam Judas ch Silas. <sup>28</sup>T am i t-tashogi g Hekia S-ap'ekam Gewkdag mattki pi ab hu wo i em-mohto'i g t-chehanig ahchim Tutuligo k wabsh wo em-ahgi ihda mamt am hab hi wo wa junihid. T hab wabsh si s-ap wo e tahtkkad em-wui hegam t-wehm o'odham mo am em-wehm kihdag. <sup>29</sup>Neh, pi amt wo ko'ad g eh'ed ch hegai mo pi gam hu e iawua g eh'ed e mum'ajch ch pi wo ko'ad hegai mo ab e to'id mo haschu hab chum e elid mo d jiosh. Mt wo si e nuhkud g hejel e-wehm kihkam wehhejed. Mamtp wo si e nuhkud id ab k am wo wa s-ap'ek. T g Jiosh am wo wa em-wehmajk.”

<sup>30</sup>Kutsh am hahawa gam hu hihi idam Barnabas ch Paul ch Judas ch Silas k gam hu dada Antiok t am. Tsh am i e hemapai hegam mash ab ihm g Jesus. Kutsh am i ha mah g o'ohana. <sup>31</sup>Tsh idam am ne'okchulid k si s-ap i e taht natsh pi heg hekaj ab si i e gewkemhu.

<sup>32</sup>Kush g Judas ch Silas hab wa'ap d Jiosh ha'ichu i tashogiddam ch am dadkkahim he'es i tash ch mu'i

ha'ichukaj am i ha gewkemhu.

<sup>33</sup>Kumtsh am hahawa s-ap i ha dagito mat wo uhpam hihi. <sup>34</sup>[Tsh wabshaba g Silas hab i e ah mat wabsh ha wehm wo dakad.]

<sup>35</sup>Sh g Paul ch Barnabas he'es i tash am dadkkahim Antiok t am am ha jehnidich ab amjed g Jesus. Sh mu'ijj hab wa'ap ha ahgid g ha'ichu ahga ab amjed g Jesus.

**Matsh ep wo i ha mihshmedo g Paul ch Barnabas k i e gawulkai**

<sup>36</sup>Sh am hu hebai amjed, sh hab kajj g Paul ab Barnabas wui, “Am att ep wo hihim k am wo i ha gewkemhu wehs kihhim ch ed mach wa hebai ahgachug g Jiosh ha'ichu ahga k am wo ha nei mas has wa'i masma.”

<sup>37</sup>Kush g Barnabas hab chum kajj mat wo bek g John Mark. <sup>38</sup>Tsh wabshaba g Paul pi hohho'i mat wo bek nat pi wa am wabsh i ha dagito Pamphylia t am k pi am hu ha wehm i nahto g chikpan. <sup>39</sup>Kutsh id am si pi ha ap'et. Tsh hekaj i e gawulkai. Kutsh g Barnabas bek g Mark k gan hu aigo i shul ge'e wahlkokaj Cyprus jewed t am. <sup>40</sup>Tsh wabshaba g Paul g Silas am epai bek mat wo oi. Kumtsh am e ho'ige'idahun k am i ha dagito Jiosh hemajimalig ed. <sup>41</sup>Tsh idam Paul am hihi Syria ch Cilicia jejewed oidk k am i ha gewkemhunahim hegam mash ab ihm g Jesus.

**Mash hema d Timothy ch ha oi hegam Paul**

**16** Kutsh hegam Paul am hahawa hihi Derbe kihhim wui k amjed gam hu dada Lystra

kihhim t am. Kush eda amai am hema kih g wechij o'odham ch am oid g Jesus himdag ch hab chehgig Timothy. K g je'ej hab wa'ap am oid g Jesus himdag ch d Tuhligo uwi. Sh wabshaba g ohgbadaj d Greek hemajkam. <sup>2</sup>Sh wehsijj g Jesus ihmdam am Lystra t am ch Iconium t am am si wehhejed neok g Timothy. <sup>3</sup>Tsh g Paul s-behim g Timothy e wehm. Sh eda wehs s-mahch g Tutuligo amai mat g ohgbadaj pi pahl hikuch g Timothy. Tsh heg hekaj g Paul an pahl hikuch k hahawa bek. <sup>4</sup>Kutsh am hihim k hebai i daiw kihhim t am ch am ha ahgid hegam mo ab s-wohochud g Jiosh ha'ichu ahga hegai matsh ha o'ohani g Jesus chuhchai ch ge'eged am Jerusalem t am k hab ha ahgid mat s-ap am hab wo chum junihid. <sup>5</sup>Tsh am i mu'ida hegam mash am e wehm e mihshmad wehs kihhim ch ed. Tsh g ha-wohochudadag am i gewka.

**Matsh gam hu hihi hegam  
Paul Macedonia wui**

<sup>6</sup>Tsh am gahi wuwha g Phrygia jewed ch Galasia jewed idam Paul k am ahgahim g ha'ichu ahga ab amjed g Jesus. Tsh wabshaba pi ha hiwigi g Hekia S-ap'ekam Gewkdag mas am wo i ahgahi am Asia jewed ch ed. <sup>7</sup>Tsh gam hu dada mo an i chekshani g Mysia jewed k hab chum i e ah mat imhab uhpam wo hihi Bithynia jewed wui. Tsh wabshaba ep pi ha hiwigi g Hekia S-ap'ekam Gewkdag. <sup>8</sup>Tsh hekaj gam hu gahi hihi Mysia jewed oidk k gam hu dada Troas kihhim t am. Kunt am ha nam ahni Luke.

<sup>9</sup>Tsh g Jiosh am ha'ichu hab juh nenaj ed g Paul. Sh am hema neid g Macedonia jewed t am o'odham. Kush id ab kehk ch hab kaij, "Ab g i hihm Macedonia wui k wo i t-wehmt." <sup>10</sup>T g Paul am hahawa t-ahgi ihda. Kuch hab kaij moki tatchua g Jiosh matt am wo hihim k am wo i ha ahgidahi g ha'ichu ahgaj. Tt am ha hekaj i t-nako matt am aigo i chehchsh Macedonia jewed t am.

**Si wehpeg wohochuddam  
Macedonia ch ed**

<sup>11</sup>Kutt an ha hekaj gahi i shul g ge'e shuhdagi ge'e wahlko ch ed k ga hu dada Samothrace kihhim t ab. Am ba'ich d i tash, tt am dada Neapolis kihhim t am <sup>12</sup>k amjed gam hu ba'ich i wahp mo am d Philippi kihhim amai wehpeg chekshani ch ed g Macedonia jewed. Ihda Philippi o d si s-has ha'ichu. K mu'i am dadha g si ge'e kownal shondalig. Kuch am he'es i ha'ichugkahim id eda kihhim.

<sup>13</sup>Pi o am hu hema kehk g Tutuligo hemajkam ha-cheopi. Kutt heg hekaj am hihi mo an ge akimelig kihhim aigo mach hab t-ahg mo am hu hebai apchudas mo am e ho'ige'idahun g Tutuligo. K am hebai e hemapaidch g u'uwi. Kutt am i dadhaiwua k am ha wehm neneo. <sup>14</sup>K hema hegam u'uwi hab chehgig Lydia ch ab amjed g Thyatira kihhim ch d s-ihbhamagi lohba gagdadam ch ab si ihm g Jiosh. Jiosh at ab i mah g wohochudadag. Kut ab s-wohog el g Paul <sup>15</sup>k e pahl wako. T wehs hab wa'ap e juh g wehmaj kihkam. K

hab hahawa kaij g Lydia, “Oi g wo t-oid k am t-wehm wo i dadhaiwua t-kih am nach pi d hahawa em-wehm wohochuddam.” Kutt wa wo ho hab t-juh heg hekaj mat pi t-dagito k ab ep t-waid.

**Mamtsch am ha kuh hegam  
Paul Philippi t am**

<sup>16</sup>Kuch am hu hebai am hihim matt gam hu wo hihi mo am e ho'ige'idahun. T ab hema i t-oi g uwi. Kuki g jiawul an u'ukch ch ab mahkch g amichudadag mo gam hu ba'ich tash ha'ichu ahg. K am ha'i si u'ukch ch mu'i lial u'u ab amjed mo am ha'ichu ha ahgid g hemajkam.

<sup>17</sup>T ihda uwi ab i t-oid k si hihnk ch hab kaij, “Idam o'odham o d piongaj g si uhgchu Jiosh ch am em-ahgidahim mamt has masma wo e do'ibia.” <sup>18</sup>Neh, bo kaij ch mu'i tashkaj an t-oidahim.

T am hahawa pi e nako g Paul k ab si sikol i kekiwua k hab kaij ab jiawul wui, “Jesus Christ gewkdagkaj ani ab si m-chehani mapt wo dagito ihda chehia.” T am wa i hekaj dagito g jiawul.

<sup>19</sup>T am i nei hegam mo an u'ukch mat hahawa pi has masma ep wo u'ud g lial heg hekaj chehia k hekaj an ha ui g Paul ch Silas k gam hu i ha chewaim haha'ichu ha wui. Idam o am dadha si eda g kihhim. <sup>20</sup>K hegam mat am i ha ui g Paul ch Silas hab ha ahg, “Idam o d Tutuligo. Kutt ha cheh mo ha kudut g ia kihkam <sup>21</sup>no pi chum t-ahgid mash hema d si ge'e kownal mattsh ab wo chum si has elidad. K eda pi hiwigidas machs hab wo t-wuad nach pi ab si wecho g Rome kownal.

K pi d t-wuikam ihda ha'ichu ha-ahga.”

<sup>22</sup>T wehsijj hegam mat ab i e hemapai ab i ha wehmt k ab ha wui gegokiwua g Paul ch Silas. T g haha'ichu gam hu wuashul g ha-wehschuga k am ha'i ha chehani mat wo ha gewitta. <sup>23</sup>Kumt am i si s-ko'okam ha gewittani k ged hu ha u'apa kukpaikud wui k hab ahgid g lilso ha nuhkuddam mat si s-wihnam wo ha kuh. <sup>24</sup>T wa wo ho hab e juh k ged hu si chuhko ha kuh k an ha wahpki g ha-kakhio uhs wupulshpadag ed.

<sup>25</sup>Kutsh am eda i huh g s-chuhugam. Sh g Paul ch Silas am si e ho'ige'idahun ch si ne'ed ch ab si ihm g Jiosh. Sh am ha'i ep kuhkpi g lilso ch ha kaiham. <sup>26</sup>T am haha wabsh si s-gewkam ugij g jewed. Tsh g kukpaikud am si wehs u'ugij. Tsh gam si e kuhkpi'o g kukpaikud kuhkpadag. Tsh g ha-wupulshpadag e padch. <sup>27</sup>Tsh ab si i nea g ha nuhkuddam k hab e ahg mat ne'ioipa g lilso k hekaj an bei g is-pahyo mat wo hejel e mua.

<sup>28</sup>Sh wabshaba g Paul am si s-kaidam hihnk ch hab kaij, “Pi g am hejel e mua'i. Ia ach wabsh i wehs ha'ichug.”

<sup>29</sup>Tsh am hahawa bei g lahmpa k am si med k am i wahk k si gigiwuk. Sh am wabsh kia dadha g lilso. Kutsh ab i gei ha wecho g Paul ch Silas <sup>30</sup>k ab i ha wuwhasid k ab ha kakke, “Shahnt masma wo ni-do'ibia?”

<sup>31</sup>Sh hab kaij idam Paul, “B apt wo i s-wohoch g ha'ichu t-ahga ab amjed g t-kownalig Jesus Christ. T heg wo m-do'ibia. T idam m-wehm

kihkam m ia gegok hab wa'ap wo e juh.”<sup>32</sup> Tsh idam Paul am hahawa i ha mihshmad ab amjed g Jesus.<sup>33</sup> Tsh am ha hekaj i ha u'u k ab i wako g eh'ed mat wa am ha gewitta. Tsh amjed am ha hekaj i e nakog k e pahl-wapko g e-wehm kihkam ha wehm<sup>34</sup> k gan hu hahawa i ha wahpki g Paul ch Silas e-kih ed k ha gegos. Kush si s-hehgig ihda wehs ha wehm g e-wehm kihkam no pi ab hahawa wohochud g Jiosh.

<sup>35</sup> Sh am ba'ich d i si'alim. Tsh g haha'ichu am ha ahgi g chich-lilihi mat wo ha dagito idam Paul. <sup>36</sup> Sh hegai lilso ha nuhkuddam ab ahgid g Paul ch hab kajj, “Ia at gei g ahga ab ha amjed g haha'ichu matsh wo em-dagito. Mt gamai wabsh s-ap e taht k wo hihi.”

<sup>37</sup> Kush wabshaba g Paul hab kajj ab ha wui g chich-lilihi, “Pi att hab wo t-juh. Hemho wa at ab wo i hihi hegama s-has haha'ichu k ia wo i t-wuwhas am ha tahgio g hemajkam nat pi t-gewitta am ha tahgio wa chum pi mahchch mas haschu d t-chu'ijig. K heg pi d chum t-wuikam nach pi u'ukch g t-shel hab masma mo g Rome t am hemajkam.”

<sup>38</sup> Kush g chich-lilihi am hahawa ha ahgid g s-has haha'ichu mo has kajj. Tsh am i kah ihda k si e totodsid k am hihim<sup>39</sup> k ab ha ahgi mat wabsh wo i s-ha ho'ige'el k am hahawa i ha wuwhasid k hab ha ahg mat hig gam hu wo hihi ab amjed g kihhim. <sup>40</sup> T g Paul ch Silas am i wuwhag k gam hu hihi Lydia kih wui. Kut am e nam hegama mat ab i s-wohoch g ha'ichu ha-ahga ab

amjed g Jesus. T idam Paul ab si i ha gewkemhun k gam hu hahawa hihi.

### Mash am ha mihshmad hegama Paul Thessalonica t am

**17** Tsh idam Paul am wabsh gahi wuwha g Amphipolis kihhim ch Apollonia kihhim k gam hu dada Thessalonica kihhim t am. Sh am hema kehk g Tutuligo ha-cheopi. <sup>2-3</sup> Tsh heg wui am hihi hegama Paul mo hab wa e wua chum hekid. Tsh g Paul am ha wehm a'aga ab amjed g Jiosh o'ohana k id hekaj am chum wohokamch mat g Jiosh si Kehsha hemho wa wo e sho'igchud k wo e mu'a k wabshaba ep wo i wuhsh ab muhkig t amjed. Sh hab ep kajj, “Ihda Jesus mani ia mahsko wua em-shahgid d hegai Jiosh si Kehsha.” Sh waik domig oidam am ha jehnid g mihshmda tash ab. <sup>4-5</sup> Kutsh ha'i ab i s-wohochud k ab i ha wehmt hegama Paul. Tsh mu'i hegama Greek hemajkam ch hegama s-has ha'ichu u'uwi mash ab ihm g Jiosh ab hab wa'ap i s-wohoch g ha'ichu ha-ahga k ha wehmt. Sh hema idam hab chehgig Jason.

Tsh wabshaba ha'i s-ha hehgama g Tutuligo. Kush am ha'i oiopo g s-papadmakam ch am i ha wehmt hegama Tutuligo k am i ha kudut g kihkam. Kutsh wabsh woho i babgat k am hihim k am wabsh si wahp Jason kih ed mat am wo ha ui g Paul ch Silas k am wo ha u'apa hemajkam ha wui. <sup>6-7</sup> Sh wabshaba pi am hu ha'ichug. Kush heg hi wa Jason am da. Kush ha'i ep dadha g wehmaj wohochuddam.

Kumtsh idam ha u'u k am i ha chewaim haha'ichu ha wui k si hihnk ch hab kajj, "Ia at ha'i dada g o'odham k ash wa wehsko ha kudut g hemajkam ch ab wui gegok g si uhgchu kownal hab kaijch mo am hema d ep kownal ch hab chehgig Jesus. K ihda Jason ab ha to'akch e-kih ab." <sup>8</sup>Neh, bash kajj ch hekaj ab si i ha kudut g hemajkam ch haha'ichu mat wabsh woho'i babgat. <sup>9</sup>Tsh g haha'ichu am cheha g Jason ch hegam ha'i mat wo ha namkid ha'akia mo haschu d i ha-chehanig. Kutsh am hab e juh. Tsh hahawa ha dagito.

**Mash am ha mihshmad Berea t am**

<sup>10</sup>Tsh am i s-chuk. Tsh hegam Jesus ihmdam am ha ahgi idam Paul matsh gam hu wo hihi Berea kihhim wui. Tsh ged hu dada k am ha hekaj hihi Tutuligo ha-cheopi wui. <sup>11</sup>Tsh idam s-ap ab i ha nei. Sh am ha mihshmad. Kush si s-hohho'id ch ab kaiham g ha'ichu ha-ahga ch wehs tashkaj am si hoan g Jiosh heki hu o'ohana mat wo s-mai mas wa woho hegai mash g Paul am ha ahgid. <sup>12</sup>Tsh mu'ijj ab i s-wohoch g Tutuligo. Tsh mu'ijj g gawul mahs hemajkam hab wa'ap ab i s-wohoch. Ha'i idam ash d s-has haha'ichu u'uwi.

<sup>13</sup>Tsh am wabsh i chum kah g Tutuligo am Thessalonica t am mash idam Paul am ha mihshmad Berea t am hab wa ehp k am ha hekaj i hihim k am i ha kudu g hemajkam. <sup>14</sup>Kutsh heg hekaj am ahgi g Paul hegam mash ab s-wohochud mat gam hu wo hih g kahchki hugidgo. Tsh wabshaba

g Silas am wa'i wih Berea t am g Timothy wehm. <sup>15</sup>Tsh hegam matsh am i bei g Paul gam hu u'apa Athens kihhim t am. Tsh am hahawa ha ahgi g Paul mat wo ha ahgi g Silas ch Timothy mamt hekid wo i e nakog k ab ha hekaj wo i hihi. Tsh amjed gam hu hahawa uhpam hihi idam e-kihhim wui.

**Mash am ha mihshmad Athens t am**

<sup>16</sup>Sh am daha g Paul Athens t am ch am ha nenida g Silas ch Timothy. Sh eda wehsko chuhch g ha-jjoshta. Sh g Paul am ha neid idam ch hab si pi ap e tahtk. <sup>17-18</sup>Tsh am wabsh ap'et mat ha wehm wo si i a'aga g hemajkam am ha-cheopi ed. Kush am ha'i ha wehm e mihshmad g gawul mahs hemajkam.

Sh g Paul am epai kuaya ch ed ha wehm ha'ichu i a'aga ab amjed g Jesus am ha ahgidch mat g ko'i wo i wuwha ab muhkig t amjed. Sh am ha'i d jewed t ab ha'ichu s-chu a'amichuddam ch wabsh ab uhpam i ne'owi g Paul.

Sh ha'ijj hab kajj, "K haschu hab chum ahg ihda pi ha'ichu amichuddam o'odham?"

Kush ha'i hab ep kajj, "Shahag wepo mo g mehk jewed dahm jijosh am ha a'aga." <sup>19-21</sup>Kush eda hegam kihkam ch hegam mo am wabsh sha dadha s-hohho'id mat tash oidam wo kaihamad ch wo a'agad hegai mo haschu d si wechij ahga. (19) Kumtsh ab i bei g Paul k ged hu u'apa mo am e nanmek k hab kajj ab wui, "Shah'o d ahga ihda wechij mashchama map ab amjed neok. (20) Pi ach am wa chum amichud."

<sup>22</sup>Tsh am hahawa kekiwua g Paul k hab kaij, “Ahpim kihkam amki ab si has ha elid g jijosh. <sup>23</sup>Am ani neid m an chuchch g em-jijoshta kahya oidk. Kuki am hema kehk g iagchulidakud mo id an o'ohanas, ‘Ia amt wo ha'ichu dai heg wehhejed jiosh mattp hems pi mahch.’ Pegih, ihda pi em-machiga o d hegai mant am haha wo em-ahgi ab amjed.

<sup>24</sup>“Do ihda Jiosh mat wehs ha'ichu nahto ch d kownal wehs ha'ichu dahm. Wehsko o an ha'ichug g Jiosh. K pi hab sha'i mahs mas am hebai wabsh wo e dai hab masma mam hab ha wua g e-jijoshta. <sup>25</sup>Jiosh o ab t-mahkch g doakag ch wehs ha'ichu. K pi am hu ha'ichu d sha'i hegai mas ab i si tatchua ab amjed g o'odham mat ab wo mah chikpank.

<sup>26</sup>“Jiosh at am hemako nahto g o'odham k ab amjed i wuhshad g wehs nahnko mahs hemajkam k an a'ai i ha gantad wehsko jewed oidk mat hebai heki hu i ap'ech mat an wo kihkad. <sup>27</sup>K hab d elidaj mat am wo i e gahgidahi g Jiosh k atp hems wo cheh. Pi o sha'i mehk ab hema i t-amjed <sup>28</sup>ch ab t-mahkch g doakag ch kihdag. Ha'ijj g em-wehm o'odham o d ha'ichu a'amichuddam ch hab kaij, ‘Ahchim hemajkam ach d Jiosh a'aliga.’

<sup>29</sup>“Pegih neh, id o d wohokam mach d a'aligaj g Jiosh. Tt pi hab wo ge t-ahgad mas g wohokam Jiosh hab mahs mo idam em-jijoshta mat wabsh g o'odham am nahto g ohlakaj o g plahdakaj o g hodaikaj. <sup>30</sup>Heki o hu pi mahch g hemajkam g Jiosh tatchui. K g Jiosh si s-hemajim am ha nakog.

Ni wabshaba hemu em-ahgid mo hahawa ab si i ha chehani g hemajkam wehsko mat gam hu wo s-ohhod g pi ap e-chegitoi. <sup>31</sup>Am at i ap'ech g tash mat wehs wo ha lodai g hemajkam k heki hu am hema si i kei mat hab wo juh g lodaita. Tsh id ia mahsi t-shahgid k ia oimmelhim ch e muhkid. Tsh g Jiosh ab i wuhshad muhkig t amjed mat wo wohokamch mo d si Kehshaj.” Neh, bash kaij g Paul.

<sup>32</sup>Tsh idam am i kah mo hab kaij matsh hema i wuhsh ab muhkig amjed. Kush ha'ijj wabsh si ash ch wabshaba ha'i hab kaij, “Am g wa ep t-jehngid ab amjed ihda.”

<sup>33</sup>Tsh amjed gam hu hahawa hih g Paul. <sup>34</sup>Tsh ha'i ab s-wohochud k ab i wehmt. Sh hema idam d Dionysius ch d hema hegam s-chu a'amichuddam. Kush am hema d ep uwi ch hab chehgig Damaris.

### Mash am ha mihshmad Corinth t am

**18** Tsh gam hu hahawa hih g Paul ab Athens t amjed k am him k am jiwia Corinth kihhim t am. <sup>2</sup>Sh am hema daha g Tuhligo ch hab chehgig Aquila ch ab d mahsikam Pontus t ab. K g wehmaj kihkam hab chehgig Priscilla. Idam o d ikus kihtdam. Kutsh hab wa e juh am ha tahgio matsh g ge'e kownal Claudius gam hu ha huhu'i Tutuligo ab amjed g Rome kihhim. Sh idam Aquila ch Priscilla am ahho Corinth wui. <sup>3</sup>Tsh g Paul am i ha chehgim k am ha wehm i dahiwua k am ha wehm chikpan no pi hab d wa'ap ikus kihtdam. <sup>4</sup>Kush wehs mihshmda tash am hihim Tutuligo ha-cheopi wui mat am

wo ha'ichu i ha tashogi ab amjed g Jesus. Kush am ha'i ep ha wehm e mihshmad hegam mo pi d Tutuligo ch am kah g ha'ichu ahgaj.

<sup>5</sup>Kutsh am i dada g Silas ch Timothy ab Macedonia jewed t amjed. Tsh g Paul am hahawa i dagito g e-chikpan k heg am himch matsh am hahawa si i ha mihshmad am si s-mahch ch ahg ab ha wui g Tutuligo mo g Jesus d Jiosh si Kehsha mat wo t-do'ibia. <sup>6</sup>Tsh wabshaba ab wui gegokiwua idam k am si pi ap has ahg. Tsh oi wa g Paul ab si i shahmud g e-wehschuga ha wui mat wo ha chehgi mat ha dagito k hab kajj, "Dat wo hejel em-chu'ijjgk mamtp wo sha pi e do'ibia. T ahni pi ab hu ha'ichu d wo ni-chu'ijjgk. Nt ia'i amjed g gawul mahs hemajkam ab wo i ha mihshmad." <sup>7</sup>Neh, tsh ia'i dagito g ha-cheopi k ged hu hahawa ha mihshmad g hemajkam hema kih am g gawul mahs o'odham. Id ash ab ihm g Jiosh ch hab chehgi Titius Justus ch an kih hugidaj an g Tutuligo ha-cheopi. <sup>8</sup>Kutsh mu'i ep ab i s-wohoch am i kahk k am e pahl wapko. Hema ash d chum ha wanimeddam g Tutuligo ch hab chehgi Crispus ch ab i s-wohoch g e-wehm kihkam ha wehm.

<sup>9-10</sup>Tsh am hu hebai chuhug ch ed am ha'ichu hab e juh Paul nena ed mash kah g Jesus. Kush ab wui hab kajj, "Pi g am sha'i ha'ichu ehbidad. Ia ani m-wehmaj ch pi hedai wo shai hiwigi mas wo s-ko'okam m-juh. Pi g sha'i ha'asa ha mihshmad. Mu'ijj o ia kih id eda kihhim mat d wo ni-hemajkamgak." <sup>11</sup>Sh heg hekaj hemako ahidag ch

eda hugkam ehg am ha'ichugkahim ch am ha mashcham g Jiosh ha'ichu ahga.

<sup>12</sup>Tsh am hahawa hema i dahiwua g kownal am Greek hemajkam ha-jewedga am k hab chehgi Gallio. Tsh g Tutuligo am i e hemapad k an bei g Paul k am u'apa ge'e kih t am <sup>13</sup>k hab kajj, "Ihda o'odham o chum ha chehani g hemajkam mat hab masma ab wo i ihm d g Jiosh mam has masma pi t-hiwgid."

<sup>14</sup>Kutsh am haha wabsh wo i chum neo g Paul. Sh wabshaba Gallio hab ha ahg, "Pi oki ab wui kehk g ge'e kownal chehanig. T heg hekaj pi wo ni-ap'et mant ab wo em-kaiha. <sup>15</sup>Doki wabsh ha'ichu ahga ab amjed g em-himdag ch ab hema i amjed g em-wehm o'odham. Mt heg hekaj am hejel wo i ap'ech. Pi ant am hu wo sha'i i hudaw hab mahs ha'ichu." <sup>16</sup>Neh, bash kajj ch gam hu si i ha wuwhas ge'e kih amjed. <sup>17</sup>Kutsh idam an wabsh si bei hegai mash d ha wanimeddam am cheopi ch ed ch hab chehgi Sosthenes k am si gewitta ge'e kih bahsho. Tsh pi ab hu has sha'i e taht g Gallio.

**Matsh am uhpam ep jiwia g Paul mat ab amjed ha mihshmedo**

<sup>18</sup>Sh mu'i tash am ha'ichugkahim g Paul Corinth kihhim t am ha wehm hegam mash ab s-wohochud g Jiosh ha'ichu ahga. Tsh amjed hab i e ah matsh gam hu uhpam wo hih Syria jewed wui. Sh eda gam hu hihhim g ge'eged wapalko Cencrea kihhim t amjed. Kutsh gam hu hih g Paul. Tsh g Priscilla



ch Aquila gm hu oi. Tsh koi am hu i chehchsh ge'e wahlko ch ed, tsh g Paul hih g e-mo'o matsh wa am he'es i tash pi hih mo d ha-himdag heg hekaj mat ab ha'ichu ah'ad g Jiosh. <sup>19</sup>Tsh am hahawa gahi i shul g ge'e wahlkokaj k ga hu dada Ephesus kihhim t am. Kutsh am i dadhaiwua g Priscilla ch Aquila. Tsh g Paul am hih mat am wo sha i wah Tutuligo ha-cheopi ed k am ha wehm ha'ichu a'aga. <sup>20</sup>Sh idam ab ahgid mat am wabsh wo i wih ha wehm.

Tsh wabshaba pi e nako <sup>21</sup>k ash hab wabsh ha ahg am wo i himk, "Matp g Jiosh d wo tatchuik, nt wo wa uhpam ep jiwia." Neh, bash kaij ch amjed ab i chesh ge'e wahlko t ab. <sup>22</sup>Tsh heg gam hu gahi i gei Cesaria kihhim t am.

Tsh amjed gam hu hahawa hih g Paul Jerusalem wui k am i ha chehgim g e-wehm wohochuddam. Am he'es i tash, tsh gam hu hahawa ep gahi i chesh Antiok t am.

**Mash d i waikkokam mat am  
ep i ha mihshmdam g Paul**

<sup>23</sup>Sh am he'es i ha'ichugkahim amai ch am hahawa ep ha dagito k atsh gam hu hahawa ep hih ha oidk g Galasia ch Phrygia jejewed k am i ha gewkemhunahim g e-wehm wohochuddam.

**Mash g Apollos am ha mihshmad  
Ephesus ch Corinth t am**

<sup>24</sup>Tsh am hema jiwia g Tuhligo Ephesus kihhim t am k hab chehgig Apollos ch ab d mahsikam Alexandria kihhim t ab ch si s-e mahch ab s-neokimakam t ab ch

ash si ge'e s-mahch g Jiosh o'ohana. <sup>25</sup>Kumtsh heki hu mashcha ab amjed g Jesus. Kush si s-hohho'id ch am ahgahim ch si s-ap ha mashcham ch eda heg wa'i s-mahch John pahl wakona. <sup>26</sup>Tsh am i kah hegam Priscilla ch Aquila nash pi am si ha mihshmad Tutuligo ha-cheopi ed. Tsh idam am i wai e-kih wui k am s-ap ahgid mo haschu i koi s-mahch ab amjed g Jesus.

<sup>27</sup>Kutsh hab hahawa i e ah g Apollos mat am wo hih Greece jewed wui. Tsh am i wehmt hegam mash ab s-wohochud g s-kehg ha'ich ahgaj g Jiosh ch am kih Ephesus t am k am ha o'ohani g e-wehm wohochuddam amai Greece ch ed k ab si ha ahgid mat s-ap ab wo i nei g Apollos. Tsh gam hu jiwia k ab si ge'e i ha wehmt. <sup>28</sup>Sh am ha'i ne'owin g Tutuligo. Tsh wabshaba am ha gewito am ha-kaichudch g mu'i hemajkam k am si i wohokamch heg hekaj Jiosh o'ohana mo g Jesus d Jiosh si Kehsha mat wo ha do'ibia g hemajkam.

**Mash am ha mihshmad g  
Paul Ephesus t am**

**19** Tsh gam hu ba'ich ep hih g Paul k ged hu jiwia Ephesus t am mo eda g Apollos am oimmed Corinth t am. Kush am ha'i kih ch ab chum s-wohochud g Jiosh ha'ichu ahga. <sup>2</sup>Sh g Paul ab ha kakke, "Namt am wa bei g gewkdag ab amjed g Hekia S-ap'ekam Gewkdag mamt hekid ab i s-wohoch g Jiosh ha'ichu ahga?"

Sh hab kaij hegam, "Pi ach koi hebai sha'i kah mas am ha'ichu d Hekia S-ap'ekam Gewkdag."

<sup>3</sup>Sh hab hahawa kaij g Paul, “A namt koi e pahl wapko g Jesus pahl wakonakaj?”

Sh hab kaij, “Pi koi. Johnbad pahl wakonakaj att t-wapko.”

<sup>4</sup>Sh hab hahawa ep kaij g Paul, “M o wa woho mash heg am ha ahgid mat gam hu wo s-ohhod g pi ap e-chegitoi ch wabshaba am ep ha ahgid mat ab wo i s-wohoch hegai mat am epai wo i e maskogi. K heg d Jesus.”

<sup>5</sup>Tsh idam ab i s-wohochud k e pahl wapko ab chehchegch g Jesus.

<sup>6</sup>Tsh g Paul an i ha tahtamahim k ab ihmahim g Jiosh. Tsh ab si i bei g gewkdag ab amjed d Hekia S-ap'ekam Gewkdag k am si gawul ne'okikaj neneok mat pi hebai mai ch am ahg g Jiosh ha'ichu ahga.

<sup>7</sup>Kush am hu d i gamai gohk idam chechoj.

<sup>8</sup>Sh am wapke g Paul Tutuligo ha-cheopi ed ch am ha wehm ha'ichu si i a'aga waik mashad ab chum s-ap s-ha mahtchudamk ab amjed g Jiosh kownaltalig. <sup>9</sup>Tsh wabshaba ha'i pi wohochud k wabsh si pi ap neneok ab amjed g Jesus himdag am ha kaichudch g hemajkam. Tsh heg hekaj am ha dagito g Paul k gam hu hih ha u'uk hegama mat ab i s-wohoch. Sh am hema d Tyrannus ch ge mashchamakud ch id ha hiwigi. Kush heg eda g Paul am ha wehm a'aga g Jiosh kownaltalig wehs tashkaj <sup>10</sup>gohk ahid ab. Tsh wehsko e kah g Jesus ahga heg eda Asia jewed.

**Mash am ha'i chum s-e  
wepogidamk g Paul**

<sup>11</sup>Kush g Jiosh am si i wehmaj g Paul mash am hab junihim

g s-hasigam ha'ichu. <sup>12</sup>Sh g hemajkam chum hems ab u'u g Paul ha'ichu eniga ch hekaj ab tattam g kok'odam. Kush ha dodad. Tsh g jijawul im hu hab wo i e juh ab ha amjed hegama mo an ha u'ukch.

<sup>13-14</sup>Sh eda an ha'i ep oiopo g Tutuligo ch hab chum e wua mo im hu hab i ha wua g jijawul ab ha amjed g hemajkam. Kush am hema g uhgchu pahl hab chehgid Sceva ch wewa'ak a'alidag. Sh idam hab wa'ap chum im hu hab i ha wua g jijawul ab ha amjed g hemajkam. Am hu hebai, sh idam am hema neid g o'odham mash g jiauwul an u'ukch ch hab kaij, “Ab g i dagito ihda o'odham, ahpi jiauwul. Bani si m-ahgid heg gewkdagkaj Jesus mo g Paul ab amjed ha mihshmad.”

<sup>15</sup>Sh wabshaba hab kaij g jiauwul ab ha wui, “S-mahch ani g Jesus ch ep s-mahch mo hedai wud hegai Paul ch wabshaba ahpi pi sha'i em-mahch mams hedai wud.” <sup>16</sup>Kutsh ihda cheoj mo g jiauwul an si u'ukch haha wabsh ha dadge k s-ko'okam ha juh. Tsh gam hu ne'ioapa ab amjed g kihj k d wabsh i eh'ed. K g ha-wehschuga wantshas.

<sup>17</sup>Kutsh wehsijj kah ihda amai Ephesus t am k atsh si s-ehbeni k ab si has i el g t-kownalig Jesus.

<sup>18</sup>Tsh mu'ijj hegama matsh ab i s-wohoch s-kehg ha'ichu ahga ab amjed g Jesus am i e hemapad k mahsko wua g pi ap e-chu'ijig am wehs ha tahgio g hemajkam. <sup>19</sup>Tsh mu'ijj hegama mash hab chum e elid mo d mamakai am u'apa hegama e-o'ohana mo an ahgas g hihoiana k am ha chehgid k ha mei. Tsh eda am i kuint g ha-namkig idam

o'ohana mash am mei. Kutsh ai g hetaspo wehst-mahm mihl pihsh (50,000). <sup>20</sup>Kutsh hab masma hekaj si s-gewkam am i hih g ha'ichu ahga ab amjed g Jesus k am i e gantad. Sh g hemajkam ba'ich i s-gewkam ab u'ukch.

**Matsh g Ephesus t am kihkam babgat ab ha wui g Jesus wohochuddam**

<sup>21</sup>Tsh amjed hab i e ah g Paul matsh gam hu wo hih Macedonia ch Greece jejewed oidk k amjed gam hu haha wo hih Jerusalem wui k amjed am Rome wui wo hih. <sup>22</sup>Kush eda g Timothy ch Erastus am wehmaj. Kush am ha ahgid g Paul matsh am wo hihi Macedonia wui. Tsh g Paul am wih Asia ch ed he'es i tash.

<sup>23</sup>Kutsh ia'i idani am i e kudu g hemajkam ab Ephesus t ab heg hekaj Jesus himdag. <sup>24</sup>Amaj ash am hema kehk g ge'e cheopi. Kush am eda e kehshch g uwi ha-jioshga ch hab chehgi Artemis. Kush am hema d plahda chikpandam ch hab chehgi Demetrius. Sh id pionag g plahdakaj ha nahto g al kihki mo heg wepogidas cheopi ch mu'i nahto g lial ha gagdach.

<sup>25</sup>Kutsh g Demetrius am i ha hemapai hegam mash hab wa'ap mahs chikpan hab wua k am si s-gewkam hab kaj ab ha wui, "Ni-naipijju, s-mahch am mo g s-t-kaistalig ab him id amjed chikpan. <sup>26</sup>Kum eda si neid ch ep kah ihda hab chehgi Paul mo hab kaj mo idam t-jijoshga pi d sha'i jijosh. T hab am gawul juh g e-chegitoi g mu'i hemajkam ab i s-wohochudk iia Ephesus t am ch

chum alo wehsko am Asia jewed oidk. <sup>27</sup>Kut wo e padch g t-chikpan nat pi pi ab hu hab masma wo e ihmud g Artemis mo hemuch wehsko ab si e ihm. T g cheopigaj pi ab hu wo e ha'ichuch."

<sup>28</sup>Tsh am i kah idam mat am e hemapai k atsh si babgat k si s-kaidam hihnk ch hab kaj, "B ach si has elid g t-jioshga Artemis." <sup>29</sup>Sh wehsko kaidag g ha-hihinki ch wehs ha babgach g kihkam. Tsh gohk ha ui hegam mash am wehmaj g Paul k am ha u'apa chichwikud ed. Hegam mamtsh ha ui ash d Gaius ch Aristarcas. <sup>30</sup>Tsh g Paul am chum s-wahkim ha shahgid. Tsh wabshaba g wehmaj wohochuddam pi hiwigi. <sup>31</sup>Tsh ha'i hegam mash d haha'ichu ch d naipijju g Paul hab wa'ap ahgid matsh pi am hu wo hih mamt am i ha ui idam gohk.

<sup>32</sup>Tsh eda heg oidam am i si e gewkai g kudutadag. Sh ha'ijj si hihnk has i kaidam. Sh ha'i am wa gawul ha'ichu ep hihnk heg hekaj mash mu'ijj pi sha'i mahch mas haschu ahgch ia e chehm. <sup>33</sup>Tsh g Tutuligo am hema i kei mat am wo him k ab wo i kekiwua ha wehhejed k am wo ha ahgi mo pi d ha-chu'ijig g Tutuligo. Id ash hab chehgi Alexander ch am wabsh i chum ha ba'ich i kekiwua mat am wo neo. <sup>34</sup>Tsh am i nei g hemajkam mo d Tuhligo k pi ab hu sha'i kaiham k wabsh si hihnk e wehm am hu i gohk ohla ab hab kajch, "B ach si has elid g t-jioshga Artemis."

<sup>35</sup>Tsh g s-has ha'ichu o'ohandam ha shohbi g hemajkam ash hab kajch, "Ahpim kihkam! Wehsijj am s-mahch mo ia Ephesus t am

e nuhkud g cheopigaj g si s-has ha'ichu t-jioshga Artemis ch ia ep e nuhkud hegai hodaigaj mat ab dahm kahchim t amjed i gei. <sup>36</sup>T pi hedai hab wo sha'i chei mas pi woho ihda. Kumt ab wabsh wo i e bahbgi k pi am hu ha'ichu wabsh wo si has juh. <sup>37</sup>Neh, mamt i ha u'apa idam o'odham. T eda pi ha'ichu sha'i ha ehs ab cheopi t amjed, ni'is am hu sha'i pi ap has ahg g t-jioshga. <sup>38</sup>Neh, k am dadha g haha'ichu lodaita tash ch ed. Kut idam Demetrius am ha'ab wo ha u'apa matp ab ha'ichu wo s-ha abchudam. <sup>39</sup>K am ep e nanmek g kihkam ch ha'ichu i a'aga ch am i ap'echud. Kumt am wo u'apa mamtp ha'ichu ep tatchua. <sup>40</sup>T hahawa pi ab hu wo t-abch g kownal machs wabsh t-cheggia heg hekaj mat haschu has i e juh id tashkaj. Kutt pi wo sha'i t-nako machs wo ah mat haschu ahgk hab e juh ha'ichu." <sup>41</sup>Neh, bash kaij ch ha dagito.

**Matsh am i ha gewkemhunahi g Paul Macedonia ch Greece jewed oidk**

**20** Tsh am i dodolimat ha'ichu. Tsh g Paul am i ha hemapai g e-wehm wohochuddam k am si i ha gewkemhun k am hahawa ha dagito k gam hu aigo i chesh Macedonia t am <sup>2</sup>k am heg oidk i ha gewkemhunahi mu'ikpa ha mihshmadk. Am he'es d i tash, t ia jiwia Greece jewed t am <sup>3</sup>k ia ha'ichugkahim waik mashad. T am hebai i cheka, t am hahawa i chum e nako mat am aigo i chesh Syria jewed wui. Tsh wabshaba g Tutuligo am i e nako mat wo be

k wo mua. T hekaj hab i e ah mat am uhpam ep wo hih Macedonia wui. <sup>4</sup>Tsh ha'i oi g Paul mat gam hu hih. Hema o d Sopater ch ab Berea t amjed ch d alidaj g Pyrrus. K ha'i ep d Aristarcas ch Secundus ch ab Thessalonica t amjed. Tki hegai Gaius mo ab Derbe t amjed ch Timothy am ha oi. Tki hegam ep ha oi Tychicus ch Trophimus mo ab amjed g Asia jewed. <sup>5</sup>T ia dada Philippi kihhim t am. Ni ahni Luke ia wabsh kia ha'ichug ch am hahawa oi g Paul. T wabshaba hegam ha'i i'ajed gam hu t-ba'ich i chehchsh Troas kihhim wui matsh am wo t-nenida. <sup>6</sup>T eda e ai mat g Tutuligo wuhshad g e-shohshon ha-do'ibiadag k hab pi ko'a hegai pahn mo jewajidas. Kutt am hahawa gahi i shul g ge'e wahlkokaj k am ha nam Troas t am mo d hetasp tash amjed mat hegam am i t-dagito. Kuch wehsijj am ha'ichugkahim hemako domig.

**Mash am ha mihshmad g Paul Troas t am**

<sup>7-8</sup>Am hu hebai d i shahwai hudunk. Tt am i t-hemapai mo an hebai uhgk g kih k am t-wehm t-gegos matt am wo hehgigchul g Jiosh. K an mu'i e mehmheidch g lalampa. T g Paul am neok k sha'i si tash am t-mihshmad natsh pi wo hih ba'ich tash ed. Kut eda i huh g s-chuhugam. <sup>9</sup>K an hema daha g wechij o'odham wintani t an ch hab chehgig Eutycus ch atsh am i s-kohsim k kohsh k i gei ab wintani t amjed k ged hu gei jewed. K eda waik e dahm kihki mat amjed ab i gei. T am hahawa ha'i be k

am s-mai matki heki hu muh. <sup>10</sup>T wabshaba g Paul am i huduni k an si kohm k hab kajj, “Pi g am wo has e tahtkkad. Do doakam.” <sup>11-12</sup>T g hajunij gam hu hahawa i bei hegai wechij o'odham kihj wui si s-ap e tahtkch mo d doakam. Kut gam hu hahawa uhpam ep i chehchsh mo an e mihshmad k am hab juh hegai chemait hugi mat hekaj wo s-chegitok g Jesus muhki. T g Paul am hahawa ep ha mihshmad k gam hu hahawa hih.

**Matsh am gahi i shul hegam  
Paul Miletus wui**

<sup>13</sup>K am hahawa t-ahgid g Paul mattsh gam hu wo nam mo am d Assos kihhim natsh pi wabsh wo i keish g wohg k am wo hih. Kutt heg hekaj gahi i shul g ge'e wahlkoka k gam hu dada. <sup>14</sup>T am hahawa t-nam k an t-wehm dahiwua. Tt am ep gahi i shulig k gam hu ai g Mitylene kihhim <sup>15-16</sup>k amjed gam hu ai g Chios kihhim. K am ba'ich d ep i tash, tt gam hu ai g Samos kihhim. K eda e aihim mat g Tutuligo gam hu wo hihi Jerusalem wui k am hab wo juh g hehgchulida Jiosh wui mat s-ap i ha wehmt k am babhaijid g ha-e'esha. K heg wui s-himimk g Paul ch s-e hohtkid ch hekaj hab kajj matt pi am hu wo i huhud Ephesus t am. Kutt hekaj am wabsh gahi wuwaha. K am ba'ich d i tash, tt gam hu dada Miletus kihhim t am.

**Matsh hemho ep i ha gewkemhu  
g Paul g Ephesus t am ge'eged**

<sup>17</sup>K oi wa s-ha neidamk g Paul hegam mo d ge'eged am ha

shahgid g t-wehm wohochuddam ab Ephesus t ab. Kut ab i ha wai Miletus wui. <sup>18</sup>T am i dada. K hab kajj ab ha wui:

“Ni-wepnag, s-mahch am mani haschu am hab i junihim am em-shahgid wabsh chum hekid ga hu i amjed mant hekid ia jiwia iia Asia jewed t am. <sup>19</sup>Ni ab wabsh i ni-sho'igchud ch hebai ni-oh'og iawua am hab junihidch g Jiosh chikpan nani pi si pihk ni-elid em-hekaj. Am o chum e nakog g ni-wehm o'odham mat wo ni-mua. Ni heg hekaj ab nakog g s-wihnk ha'ichu. <sup>20</sup>Kum s-mahch mani pi ha'ichu sha'i ehstohim ch wabshaba am wehs em-ahgid mani haschu hab elid mat d wo i em-wehmtadagk. Ni am em-mashcham g Jiosh ha'ichu ahga mam am e hehemapad ch amai ep si hehe'ejel em-kihki ed. <sup>21</sup>Kuni am si tasho ha ahgid g ni-wehm o'odham ch gawul mahs hemajkam mat wo s-ohhod g pi ap e-chegitok i ab wo i e dagito Jiosh wui k ab wo bei g t-kownalig Jesus. <sup>22</sup>K hemuch hab si tahhadag g ni-ihbdag mant am wo hih Jerusalem wui. Pi ani mahch mas haschu has wo mahsk am ni-wehhejed amai. <sup>23</sup>Id ani hi wa s-mahch mani heg wui am him mantp hems wo ni-kuhpachud k wo ni-sho'igch no pi heki hu am i ni-tashogid g Hekia S-ap'ekam Gewkdag mani hebai i jijiwhia. <sup>24</sup>Pi o d sha'i ha'ichu g ni-doakag manis wo si s-huwidad hejel ni-wehhejed. Heg ani wa'i hab s-junimk mant wo nahto hegai mo g t-kownalig Jesus ab ni-chehani mant am hab wo juh. K d ihda mant am wo i ahgahi g Jiosh hemajimatalig.

<sup>25</sup>“Neh, pi amtki hekid ep wo sha'i ni-nei. Ni heg hekaj s-em-ahgidamk mani wa wehs ha'ichu em-ahgid ab amjed g Jiosh kownaltalig. <sup>26</sup>K pi d ni-chu'ijig mamtp hema i pi wo e do'ibia. <sup>27</sup>Wehs ant em-ahgi hegai mo haschu g Jiosh am hab elid k pi haschu sha'i ehsto ab em-amjed. <sup>28</sup>Ab g hejel wo e nuhkudad ch ep wo ha nuhkudad g e-wehm wohochuddam. Hegam o g Hekia S-ap'ekam Gewkdag em-nuhkudachud hab masma mamt wo ha'i ha nuhkudach g kahwal e-shoshoiga. Kumt wo s-chegitok mat g t-kownalig Jesus eh'ed e iawua mat am ha wehhejed e muhkid k ha do'ibia. <sup>29</sup>Ab at ha'i wo i wahp em-shahgid mat hab masma wo s-ta ehbidamak am em-wehhejed mo g sheh'e am ha wehhejed g kahwal k wo chum s-em-u'im. <sup>30</sup>Kut am ha'i wo i e maskogi g chechoj em-shahgid k wo ha'ichu chum em-iattogi ahpim wohochuddam mat hab masma ha'i im hu gawul wo i em-wanim. <sup>31</sup>Neh, mt wo si e nuhkudad ch wo s-chegitokad mani em-mashcham wehsijj waik ahid ab ch g ni-oh'og iawua s-chuhugam oidam ch tash oidam nani pi pihk ni-elid em-hekaj. <sup>32</sup>“Pegih neh, ab ant wa em-ahgi ab amjed g Jiosh ho'ige'idadag k am haha wo em-dagito Jiosh nohnhoi ed. T g Jiosh wo wa em-nuhkudad ch ab wo i gewkai g em-wohochudadag k wo em-mah hegai si s-kehg ha'ichu mo ab ha makiog g e-hemajkamga. <sup>33</sup>Pi ani hekid hedai ha-lialigakaj o g wehschuga sha'i pihk ni-elid. <sup>34</sup>Ni

wabsh g hejel ni-nohnhoikaj am hab junihim g chikpan ch hekaj ni-dagio'id ch ep ha dagio'id g ni-wehm chikpandam. <sup>35</sup>Ni hab wa masma am em-chehgid mamt wo i ha wehmt hegam mo pi e amichud. T-kownalig Jesus o hab kajj, ‘T wo s-em-hehgigch hegai mat ab wo ha'ichu em-mah. Mt wabshaba ba'ich wo i s-hehgigk mamt ab wo ha'ichu ha mah.’ Kumt id wo s-chegitok mo has i kajj.”

<sup>36</sup>I am i ha'asa neo g Paul k am hahawa wehs ha wehm tohtonwua idam k am e ho'ige'idahu. <sup>37</sup>K wehsijj si shoani ch an si kokme no pi si pihk e elid hekaj ch hab ahg, “Jiosh at wo wa m-wehmajk.” <sup>38</sup>K si pi ap e tahtk, wahm mat am i chegito mo hab kajj mat pi dahm ep wo nei. T am hahawa wehsijj hihi mo am daha g ge'e wahlko.

**Matsh eda am wa hih g  
Paul Jerusalem wui mamt  
wa chum pi hiwigi**

**21** Kutt am hahawa si wehs i ha ho'ige'el g t-wepnag k am ha dagito k am wabsh si shel gahi i shul g ge'e wahlkokaj k ga hu dada Cos kihhim t ab. Am ba'ich d i tash, tt ga hu ai g Rhodes kihhim k amjed ga hu aigo i dada Patara kihhim t ab. <sup>2</sup>Neh, k am hema daha g ge'e wahlko matsh gam hu wo hih Phenicia jewed wui. Kutt heg ab an ha hekaj i chehchsh k gm hu oi. <sup>3</sup>Tsh ab wo i e huhuds g wahlko mohtoi Tyre kihhim t am. Kutt am bihbij hugidaj an g Cyprus jewed k am dada amai Tyre t am.

<sup>4</sup>K am ha'i kih g t-wehm wohochuddam. Kutt ha chehg

k am ha wehm dadha hemako domig ab. T am i ha tashogi g Hekia S-ap'ekam Gewkdag matsh am ha'ichu has wo e juh tahgio g Paul. Kum hab chum ahg mat pi am hu wo hih Jerusalem wui. <sup>5</sup>T wabshaba am i e ai matt wo hihi. Tt gam hu hihi. T wehsijj gam hu t-oi ha wehm g e-wehm kihkam ch e-a'aliga matt gm hu wo i wuwaha ab kihhim t amjed. Tt wehsijj am i tohtonwua ge shuhdagi bahsho k am t-ho'ige'idahun <sup>6</sup>k ab hahawa a'ai t-ahgid mat wo t-wehmajk g Jiosh. Tt ahchim gan hu hahawa i chehchsh ge'e wahlko ch ed. T hegam gm hu epai hihi uhpam.

<sup>7</sup>Kutt gam hu hahawa ep gahi i shul g ge'e wahlkokaj Ptolemais kihhim wui. K am ha'i kih g t-wehm wohochuddam. Ch am ha wehmajkahim hemako tash ab. <sup>8</sup>Am ba'ich d i tash, tt ga hu dada Cesaria kihhim t ab.

Kuki am kih hegai Philip mo hema d hegam wewa'ak chechoj matsh wa am e chuhcha matsh am wo i ha wehmt g Jesus chuhchai Jerusalem t ab. Kutt am hihi kihj wui. T am i t-wahpki. <sup>9</sup>Kuch am wehmajkahim he'ekia i tash. Ihda Philip o gi'ik u'uwi a'alidag. K idam pi ha kuhkun ch am ahgahim hegai mo haschu g Jiosh am ha tashogid.

<sup>10</sup>Kut ab Judea t amjed heg ab jiwia Jiosh ha'ichu i tashogiddam mo hab chehggig Agabus. <sup>11</sup>Ch am t-mihshmad. T heg an bei g Paul giwud k an hekaj wuh g e-kakhio ch e-nohnhoi ch hab kaij, "Bamtsh masma hab wo m-juh maptp am wo hih Jerusalem wui. T-wehm o'odham atsh an wo si

m-wud k ab wo m-dagito gawul mahs hemajkam ha wui. Id o am ni-tashogid g Hekia S-ap'ekam Gewkdag."

<sup>12</sup>Kutt am i kah ihda k ab chum si i ahgid g Paul mat pi am hu wo hih Jerusalem wui. <sup>13</sup>K wabshaba hab wabsh kaij, "Pi g am wo shoanid. Pi am ap ni-tahtchud. Ni-nahtokch ani mamtp wo ni-wulsh o chum hems wo ni-mua g t-kownalig Jesus wehhejed."

<sup>14</sup>Kutt pi sha'i t-nako machs wo shohbi k am wabsh i dagito k hab kaij, "Pegih, id ach wa'i tatchua mat g Jiosh ha'ichu ap'echuda am hab wo e juh."

<sup>15</sup>Kuch am ep ha'ichug he'es i tash ch am hahawa i t-nakog k gam hu hihi Jerusalem wui. <sup>16</sup>T am ha'i t-oi Jerusalem wui k am i t-ui heg kih wui matt am wehmaj wo dadhaiwua. Id o hab chehggig Mason ch ab d si kihkam Cyprus jewed t ab ch ash heki hu wa'i s-wohochud mo g Jesus d Jiosh si Kehsha.

#### **Matsh Paul am chehggim g James**

<sup>17</sup>T si s-ap i e taht g t-wehm wohochuddam ab i t-neidok. <sup>18</sup>Idam ha-uhgchuga ash d James. Kutt heg chehgio am wehmaj g Paul. K am wehsijj dadha hegam mo d ge'eged. <sup>19</sup>T g Paul ab wehs i ha ho'ige'id k am hahawa si s-ap ha ahgid wehs ha'ichu mat g Jiosh s-kehg am hab juh am gahi wuhshanim am ha shahgid g gawul mahs hemajkam.

<sup>20</sup>T am i kaiok ab si ihm g Jiosh k wabshaba hab kaij ab Paul wui, "Neh, t-wehnag, s-mahch ap mat mu'i mihl t-wehm o'odham ab i



s-wohoch g Jiosh ha'ichu ahga k ab ihm g t-kownalig Jesus k eda ab wabsh kia si has elid g heki hu t-chehanig. <sup>21</sup>Idam o kah mapsh ahpi ha mashcham hegam t-wehm o'odham mo an a'ai kih nahnko mahs hemajkam ha shahgid mat wo s-ohhod g t-chehanig k pi an hu wo ha o'oha an ha pahl hikuchk g e-a'aliga. <sup>22</sup>Do wabsh si shel mat wo kah mapt ia jiwia. Pegih, k hab chum mahs <sup>23</sup>mapt am hab wo e juh matt has wo i m-ah. M o ha'i d chechoj ch d gi'ik mat he'es pi hih g e-mo'o nat pi ab ha'ichu ah'ad g Jiosh. <sup>24</sup>Pt am wo ha oid k am ha wehm wo e dagito Jiosh wui ge'e cheopi t am. Am apt ha wehhejed wo namkid mat haschu wo i chum ha namkid heg hekaj. Kumt am haha wo hih g e-mo'o. Pt hab masma wo ha chehgi g t-wehm o'odham map am hab junihim g t-himdag. T heg amjed wo s-mahchk mo pi woho hegai mam haschu ab m-abchud. <sup>25</sup>P am wa s-mahch matt haschu am ha o'ohani hegam gawul mahs hemajkam mat ab i s-wohoch g Jiosh ha'ichu ahga. Bo chu'ig g t-o'ohana mat hegam pi wo ko'ad g eh'ed ch hegai mo pi gam hu e iawua g eh'ed e mum'ajch kch hegai mo ab e to'id hegai mo haschu hab chum e elid mo d jiosh. Kut wo si e nuhkud hab masma mat hegai wa'i si e-hohnig o g si e-kun wehm wo kihk."

<sup>26</sup>K wa woho am ba'ich d i tash. T g Paul am i ha ui hegam chechoj k am ha wehm i e dagito Jiosh wui k am hahawa i wah ge'e cheopi ch ed k am ha ahgid mat d wo wewa'ak tashk, t wo kuhgit hegai mat ab

ah'ad. T am hab wo e juh hegai mat am hahawa ha'ichu wo iagchul Jiosh wui.

**Mamsh s-mu'amk g Paul ch an bei**

<sup>27</sup>K am i e aihim mat wo kuhgit hegai wewa'ak tash. T am hih g Paul k am i wah ge'e cheopi ch ed. Kutsh ha'i am chehg k an bei hegam Tutuligo mo ab Asia jewed t amjed. K eda mu'i an oiopo g hemajkam. Kutsh am si i ha kudut <sup>28</sup>k ash si hihnk ch hab kajj, "T-hajuni, ia g wo i t-wehmt. Ihda o'odham o an wehsko si has ahg g t-himdag ch t-chehanig ch ihda ge'e cheopi. Pi o d ha-ap'edag g gawul mahs hemajkam mas ia hu wo i wahp. Kutki eda ihda ha'i i ha wahpkid k hab uamhu g ge'e cheopi." <sup>29</sup>Bash kajj nash pi am hu hebai neid g Paul hema wehm g gawul mahs o'odham ch hab e ahg mat am i wahki. Hegai mo wa am wehmaj o hab chehgi g Trophimus ch ab Ephesus t ab d kihkam.

<sup>30</sup>T am wabsh wehsko chehmo g pi ha-ap'edag amai kihhim t am. T ab a'aijed i wohp g hemajkam k an wabsh si bei g Paul k gam hu i chewaim ab amjed g ge'e cheopi. T ab ha hekaj si e kuhkp g ge'e cheopi kihkijeg. <sup>31</sup>K idam s-babgam hemajkam chum mum'aa g Paul. Kumtsh am ahgi g shondal ha-ge'ejig mash am ge e cheggia. <sup>32</sup>T ab ha hekaj da'iwush mu'i ha wehm g e-shondalig k ha'i ehp g ha-ge'ege'ejig k ged hu wo'i mat am e hemapai g hemajkam. T hegam am ha hekaj wabsh si ha'asa cheggia g Paul am i ha neidk. <sup>33</sup>T g shondal am him k an bei g Paul.

T g ha-ge'ejig hab ha ah mat an wo si wuh g gohk e hukshchim wainomikaj. Kut hab juh. T ab hahawa ha kakke g hemajkam, "Doh'o wud ihda o'odham ch haschu has juh?"

<sup>34</sup>K ha'i g hemajkam am hu has i ahg. K ha'ijj ehp am wa gawul ep ahg. T am wabsh i ge nahnko e juh g ha'ichu ha-ahga. Kut pi sha'i amich ihda shondal ha-ge'ejig mat haschu has e juh k heg hekaj am wabsh ha ahgid g e-shondalig mat ged hu wo kuh g Paul. <sup>35-36</sup>T an i bei mo an cheshajkudag. T wabshaba wabsh e nondagch g hemajkam k an chum s-behimk ch si hihnk ch hab kajj, "Mu'awo! Mu'awo!" T heg hekaj wabsh uhgk i ul g shondal mat pi wo e muhkid.

**Matsh am hejel e  
wehhejed neo g Paul**

<sup>37</sup>T am haha wabsh i chum wahki g Paul e-kolhai ed. K hab kajj g Greek ha-ne'okikaj ab wui g shondal ha-ge'ejig, "M ani ha'ichu chum s-m-ahgidamk."

K heg hab kajj, "A kupki neok g Greek ha-ne'okikaj. <sup>38</sup>Ps hensi d hegai Egypt t am o'odham mat wa am hu hebai ia i chum shonwuich g cheggiadag. T wa am i wehmt g gi'ik mihl chechoj ch u'a g cheggiakud am tohono jewed oidk."

<sup>39</sup>K hab kajj g Paul, "Pi ani d hegai. Dani Tuhligo ch ab d mahsikam Tarsus kihhim t ab am Cilicia jewed ch ed ch ab u'ukch g ni-shel ab amjed g si s-has ha'ichu kihhim. Pt ab wo si i s-ni-ho'ige'id k wo ni-hiwigi mant am wo neo ha wui g hemajkam."

<sup>40</sup>T wa woho am hiwigi g shondal ha-ge'ejig. T an i kekiwua mo an cheshajkudag ab ha ba'ich g hemajkam k am neo g hejel e-ne'okikaj k hab kajj:

**22** "Ni-hajuni ch ahpim ge'eged hemajkam, ab g wo i ni-kaiham mant am hejel ni-wehhejed wo neo." <sup>2</sup>T am i kah mo g ha-ne'okikaj neok k gam hu wabsh i pi shahmuni. K hab hahawa kajj g Paul:

<sup>3</sup>"Ahnani d Tuhligo ch ab d mahsikam Tarsus kihhim t am am Cilicia jewed ch ed ch wabshaba ia ge'eda Jerusalem kihhim t am k ia ni-mashcham. K wa g Gamaliel d ni-mashchamdam ch ab si s-gewkam ni-mashcham g t-chehanig. Ni hab wa masma am chum si s-gewkam oid g Jiosh himdag mam ahpim hemuch id i tashkaj. <sup>4</sup>Kuni wa heg hekaj ha sho'igchud ch ha kokda hegam mo an u'ukch ihda wechij ha'ichu ahga ch wa an ha u'u g chechoj ch u'uwi ch am ha shulig kukpaikud ch ed. <sup>5</sup>T g uhgchu pahl ch hegam e jehnidam am wo wohokamch ihda mani em-ahgid. Bani wa ha ahg mant am wo hih Damascus kihhim wui. T hegam ab ni-mah g o'ohana am ha wui hegam mo d u'ugchu am ha eda g t-wehm o'odham amai Damascus ch ed. Nt wa am hi wa i hih mant wo ha wupulsh g e hukshchim wainomikaj hegam mo ab s-wohochud ihda wechij ha'ichu ahga k wo uhpam i ha ui ab Jerusalem wui mat wo bei g s-ko'ok e-namkidadag.

**Matsh has masma ab i e  
dagito g Paul Jesus wui**

<sup>6</sup>"Neh, am att wa hihim k gam hu i aihim g Damascus kihhim.

K wa am hu d i dahm juhk mat haha wabsh ha'ichu si ton ab amjed g dahm kahchim an wehsko ni-wehgaj. <sup>7</sup>Nt wa am i gei jewedo. T wa ab hema si neo ni-wui k hab kajj, 'Saul, s-wohom ap hig ni-sho'igchud.'

<sup>8</sup>"Kuni si has elid ch hab kajj, 'Dohp wud ch ab neok?'

"K hab hahawa ep kajj, 'Dani ahni Jesus map ha sho'igchud g ni-ihmdam.' <sup>9</sup>K hegam mo am ni-wehmaj hi wa neid hegai ge'e tonlig ch wabshaba pi amichud g ne'oki.

<sup>10</sup>"Ni ab hahawa kakke, 'Shahnt wo ni-juh, ni-kownalig?'

"K wa hab kajj, 'Ab g i wamig k am him k am i wahki Damascus ch ed. T am hahawa hema wo m-ahgi mapt haschu am hab wo chum wuad.'

<sup>11</sup>"Tki eda pi ni-nenich heg hekaj mat wa am si s-masma ton. T wa am wabsh i ni-wanim hegam mo am ni-wehmaj k ged hu ni-u'apa Damascus t am.

<sup>12</sup>"Kuki wa am hema kih g o'odham ch hab chehgig Ananias ch ab si ihm g Jiosh ch ep am si oid g chehanig. K ab si has elid g t-wehm o'odham amai Damascus t am. <sup>13</sup>Heg at wa am jiwia ni-wui k ab kehk ch hab kajj, 'Ni-nawoj Saul, ab g beh'i g e-mentalig!' Nt ha hekaj s-ap ha'ichu neid k ab si i nei.

<sup>14</sup>"K wa hab kajj ab ni-wui, 'Neh, am antsh wo m-ahgi matsh ahpi am i m-kei g Jiosh mapt wo s-mahchk g tatchuij ch wo nei g si s-ap'ekam Kehshaj k wo kah mat am hejel wo m-ahgi g ha'ichu e-ahga. K d wa'i ihda Jiosh mo an u'ukch g

t-shohshonbad. <sup>15</sup>K hab d elidaj mapt d wo hema hegamk mapt am wo si i wohokamch g Jesus k am wo i ha ahgi g hemajkam mapt haschu i neid k haschu i kah. <sup>16</sup>Pt ha hekaj wo i e nakog k wo e pahl wako ab ihmach g Jesus. T heg gam hu hab wo i juh g pi ap m-chu'ijig.' Neh, bo ni-ahg.

**Matsh g Paul am i e kei mat wo ha mihsamad g gawul mahs hemajkam**

<sup>17</sup>"Nt wa am hab juniok ab i hih Jerusalem wui k am hu hebai am ni-ho'ige'idahun ge'e cheopi ch ed. T wa am haha wabsh ni-nena ed ha'ichu hab e juh <sup>18</sup>mani neid g Jesus. K hab kajj ab ni-wui, 'Ia g ha hekaj dagito g Jerusalem k hihm ab amjed nat pi g m-wehm o'odham iia pi ab hu wo kaiha g ha'ichu m-ahga ab ni-amjed.'

<sup>19</sup>"Ni hab kajj, 'Tp hems wo wa ni-kaiha, ni-kownalig, no pi s-ap s-mahch mani d ahni mani wa an wahkhim ha eda g ha-chechopi ch an ha u'ud ch ha gewittan hegam mo ab m-ihm. <sup>20</sup>Kuni wa am ha wehmaj ch am nuhkud g ha-wehschuga hegam mat mua hegai Steven mat am si s-mahch k ah ab m-amjed.'

<sup>21</sup>"K wabshaba hab kajj g Jesus ab ni-wui, 'Am g wa hihm nant pi am i m-kei mapt am mehk wo hih ha wui g nahnko mahs hemajkam.' "

Neh, bo kajj g Paul.

<sup>22</sup>K wa ab hi wa s-ap kaiham idam hemajkam. T wabshaba am hab wabsh chum chei ihda matsh g Jesus am i kei matsh am wo hih ha wui g nahnko mahs hemajkam. T am ha hekaj i hihinkiad si s-kaidam

k hab kaij, “Mu'awo! Mu'awo! Pi o an hu hab chum chu'ig mas in d wo doakamk.” <sup>23</sup>K si hihnk ch ab si shahmud g e-wepschuga ch g jewed shashkum ch am uhgk si nen'eichud nat pi am i si babgat.

<sup>24</sup>T g shondal ha-ge'ejig am hahawa ha cheha g e-shondalig mat gam hu wo i wahki g Paul shondal ha-kih ed. T am i wahki. T am ha cheha mat wo gewitta am hugkam mat am wo ha ahgi mat has e juh mo hekaj si hihnkoid g Tutuligo.

<sup>25</sup>T an wulsh mat wo chum gewitta. K am hema kehk g shondal ha ge'ejig. K ab wui hab kaij g Paul, “Ab ani u'ukch g ni-shel hab masma mo g Rome t am o'odham. K heg hekaj pi hab chum mahs mams wo ni-gewitta pi koi ni-lodaidk.”

<sup>26</sup>T heg am i kah ihda k am wui hih g si uhgk shondal ha-ge'ejig k ab kakke ch hab kaij, “Nap s-mahch maptki has wo chum chu'i? Ihda o'odham oki ab u'ukch g e-shel hab masma mo g Rome t am o'odham.”

<sup>27</sup>T am hahawa hih g si uhgchu shondal ha-ge'ejig am Paul wui k ab kakke ch hab kaij, “Am g ni-ahgid. Nap ab u'ukch g e-shel hab masma mo g Rome t am o'odham?”

Sh hab kaij g Paul, “Heu'u.”

<sup>28</sup>K hab hahawa kaij g ha-ge'ejig, “A pt has hig masma ab bei g e-shel. Ahni ant hi ab bei mu'i lial ha namkid.”

K hab kaij g Paul, “Ni wabshaba ahni ab u'ukch g ni-shel mani ab d ha amjedkam hegam mo u'ukch g e-shel.”

<sup>29</sup>T ga hu ta'i si i gegokiwua hegam mo an wulshch g Paul mat wo chum gewitta. T g shondal

ha-ge'ejig ep si e tods nat pi ha cheha mat hab wo juh.

### Mamtsch am u'apa g Paul e jehnidam ha wui

<sup>30</sup>Am ba'ich d i tash, tsh g shondal ha-ge'ejig am i ha cheha g u'ugchu papal mat am wo i ha hemapai g e jehnidam nash pi s-mahchimk mo haschu ab abchud g Paul. T g shondaligaj gam wul'o g e hukshchim wainomi ab ab g Paul k am i be k am i kei ha wui.

**23** K g Paul ab si ha neid g e jehnitiddam ch hab kaij, “Ni-hajuni, chum ani hekid si ni-nakog mant am hab wo wa'i junihid g s-ap'ekam ch hab pi wo sha'i ha'ichukaj si has ni-elidad am tahgio g Jiosh ia i himdam tashkaj.” <sup>2</sup>Kut hegai uhgchu pahl mash hab chehgig Ananias am ha cheha hegam mo an miabidch gegok mat ab wo si shonihi g Paul chinij ab. T ab shonihi.

<sup>3</sup>K hab kaij g Paul, “Jiosh at hemho ab wo wa uhpam i nodagi ihda am m-wui ahpi map s-chu iattomk. Ab ap dak ch ni-lodait g t-chehanigkaj ch eda ep melchkwuhim g t-chehanig map ab ha chehani mat ab wo ni-shonihi.”

<sup>4</sup>K hab kaij hegam mo an miabidch gegok g Paul, “S-ko'okam ap has ahg g uhgchu pahl.”

<sup>5</sup>K hab kaij g Paul, “Ni-hajuni, mant hems wo s-mahchk mokis d uhgchu pahl, nt pi hab wo sha'i chei, no pi hab chu'ig g Jiosh o'ohana:

Pi g am wo sha'i pi ap has ahgad g e-ge'ejig.”

*Exodus 22:28*

<sup>6</sup>K hegam e jehnegiddam ha'i d Sajusi ch ha'i ep d Palasi. T id am i s-mai g Paul k am si s-kaidam neok ha wui ch hab kajj, "Ni-hajuni, ahni ani d Palasi ch d ha amjedkam g Palasi ch ha wepo s-wohochud mat g ko'i ep wo i wuwaha ab hiha'ini t amjed. Kum heg hekaj ni-lodait." <sup>7</sup>T id am i kah g e jehnegiddam k am ha hekaj a'ai e ne'owin k pi ab hu i e wehmt. <sup>8</sup>Hegam mo d Sajusi o pi ab hu wohochud mat g ko'i wo i wuwaha ab hiha'ini t amjed ch ep pi wohochud mo an ha'ichug g anghil o g kok'oi. K wabshaba g Palasi wehs s-wohochud ihda.

<sup>9</sup>T am hahawa i si e gewkai g ha-hihinki. T am ha'i gegokiwua hegam mo d chehanig hudawogam ch d Palasi k am si s-gewkam ha shohbid k hab kajj, "Pi att ha'ichu sha'i cheh mas pi ap hab juh ihda o'odham. Tp hems wa woho g anghil am wehmaj neo."

<sup>10</sup>T am ba'ich i si e gewkai g ha-ne'owina. Kum hab e ahg mat am hu wo wantsh g Paul. K g shondal ha-ge'ejig am hahawa ha chehani g e-shondalig mat am wo ha wohppo'i. Kut am hihim k be k ged i bei e-kih wui.

<sup>11</sup>Sh am ba'ich d i hudunk, tsh am i e chehgi g Jesus Paul wui k hab kajj, "Ia ap si s-mahch ch am ahgahim ha'ichu ab ni-amjed. Kuni am i m-gewkemhun mapt hab wo wa masma hab e juh am Rome t am."

**Matsh g Paul wehm  
o'odham wo s-mu'am**

<sup>12</sup>K am ba'ich d i tash wabsh i si'alim, tsh am ha'i e hemapai g

Tutuligo k am chum Jiosh tahgio a'ai si e ahgid mat pi ha'ichu wo hug k ho'ip mua g Paul. <sup>13</sup>Kush i ba'iwechkim gi'ikko wehst-mahm idam matsh hab masma e ap'ech. <sup>14</sup>Tsh am hahawa hihi ha wui g u'ugchu papal ch ge'eged ch hab kajj, "Matt am Jiosh tahgio a'ai si t-ahgi matt pi ha'ichu wo hug k ho'ip mua hegai Paul. <sup>15</sup>Kumt ahpim g e jehnegiddam ha wehm am wo ahgi g shondal ha-ge'ejig mat ab wo i bek g Paul em-wui. Kumt hab wo e wuad mam ba'ich ha'ichu s-mahchimk ab amjed. Kutt ahchim wo t-nahtokchid matt wo mua mat koi ia hu wo jiwia em-wui."

<sup>16</sup>Tsh wabshaba g Paul cheoj ma'i am i kah ihda k am him k am i wah shondal ha-kih ed k am ahgid g Paul. <sup>17</sup>Tsh heg am hema wai g shondal ha-ge'ejig k hab kajj ab wui, "Am g beh'i ihda wechij o'odham am si uhgchu shondal ha-ge'ejig wui, matsh wo ha'ichu ahgi."

<sup>18</sup>Tsh wa woho am i bei wui k hab kajj, "Ihda wechij o'odham at ia jiwia k am nei hegai Paul mo ia e kuhpch. T heg am ni-waid k hab ni-ahg mant ab wo i bei m-wui matsh wo ha'ichu m-ahgi."

<sup>19</sup>Tsh g si uhgchu ha-ge'ejig ab bei nowij an k gam hu hekelko i wanimed k ab kakke, "Shahchu apt wo ni-ahgi?"

<sup>20</sup>K hab kajj, "Ni-wehm o'odham at am i e ap'ech matsh si'alim ab wo m-tai mamt am wo i bei g Paul e jehnegiddam ha wui hab wabsh s-e junimk mat am ba'ich ha'ichu wo i s-mai ab amjed. <sup>21</sup>Pt wabshaba pi ab hu wo ha kaiha. Gi'ikko

wehst-mahm i ba'iwechkim chechoj atsh am wo e e'estok ch wo kihshad nat pi am chum Jiosh tahgio a'ai si e ahgi matsh pi ha'ichu wo hug k ho'ip mua g Paul. K hemuch e nahtokch mat am hab wo e juh ch wabsh nenida mapt has wo e juh."

<sup>22</sup>Sh hab kajj g si ha-uhgchuga, "Pi g am hedai sha'i ahgid hegai mapt haschu ia ni-ahgi." Tsh gam hu hahawa hih g Paul ma'i.

**Mamtsh gam hu bek g  
Paul Cesaria wui**

<sup>23</sup>Tsh g si uhgchu shondal ha-ge'ejig gohk am ha wai g ha-ge'ege'ejig k hab kajj, "Am g wo ha'i i ha gawulkad gohk siant shondal ch wewa'akko wehst-mahm ehp mo g kakawyu ha chehchey ch gohk siant ehp mo s-e mahch ab is-pahyo t ab. Kut hegam wo e nahtok ch wo hihi mat d wo i humukt ohlak chuhug am Cesaria kihhim wui. <sup>24</sup>Kumt am ha'i wo i ha ap'ech g kakawyu mat g Paul wo hekaj. Mt am s-ap wo i be k am wo u'apa heg wui ge'e kownal mo d Felix." <sup>25</sup>Neh, bash kajj ch am hahawa o'ohani hegai uhgchu kownal ihda:

<sup>26</sup>"Ab g i s-ni-ho'ige'id ahpi uhgchu ni-kownalig Felix. Am ant wo m-o'ohani ahni mani d Claudius Lysius <sup>27</sup>nat pi g ge'e ha'ichu has e juh. Tutuligo at am wabsh hema si be k chum alo mua. Kunt s-mai mo ihda ab u'ukch g e-shel hab masma mo g Rome t am kihkam. Kutt hekaj g ni-shondalig ha wehm am do'ibia. <sup>28</sup>Nt amjed am i bei Tutuligo e jehnidam ha wui s-mahchimk hegai mam haschu

ab abchud. <sup>29</sup>Kuki wabshaba pi am hu d shai hegai mas hekaj wo e muhkid o wo e kuhpach. Heg amki ab wa'i abchud mat g hejel ha-chehanig melchkwua. <sup>30</sup>Sh am hahawa ha'i e nakog idam Tutuligo matsh wo mua. Kunt am ha hekaj ha cheha g ni-shondalig mat ab m-wui wo bei. Kuni hab ha ahg hegam mo ab ha'ichu abchud mat ahpi m-wui wo gagda. Neh, id o wud wa'i."

<sup>31</sup>Tsh am hab e juh g shondal hegai mam haschu ab i ha chehani k am i bei g Paul chuhug ch ed k am u'apa Antipatris kihhim t am.

<sup>32</sup>Sh am ba'ich d i tash, tsh hegam shondal mo wabsh e-tahtadkaj hihim gam hu uhpam hihi Jerusalem wui. <sup>33</sup>Tsh hegam mo shoshoigakch am i bei Cesaria wui k am dada k am i mah g kownal g o'ohana k ab wui hahawa i dagito g Paul.

<sup>34</sup>Tsh g kownal am ne'okchul hegai o'ohana k ab kakke g Paul mas haschu jewed amjed. Sh heg am ahgid mo ab Cilicia jewed amjed. <sup>35</sup>Sh hab kajj ab wui, "M ant wo wa m-nei mat hekid wo dada hegam mo ab ha'ichu m-abchud." Sh g shondaligaj am hahawa nuhkud kownal kih ed.

**Matsh am dada hegam mash  
ab ha'ichu abchud g Paul**

**24** K am d i hetasp tash, t am hih hegai si uhgchu pahl mo hab chehgig Ananias. T g Tutuligo ha-ge'egedga am ha'i oi. T heg ep ha oi mo d chehanig ab s-chu amichuddam ch hab chehgig Tertullus. T wehs idam am i dada

kownal wui k am gagda g Paul.

<sup>2</sup>T am wai g Paul. T ihda s-chu amichuddam am hahawa i ahgahi hegai mam haschu ab abchud g Paul hab kaijch:

“Uhgchu kownal Felix, si ap s-e mahch ch t-wanimed ch mul'i ha'ichu am hab junihim mo d t-ap'edag iia t-jewedga ed. Kuch heg hekaj s-dodolim kihdag <sup>3</sup>ch si s-ap t-tahtk chum hekid ch wabsh chum hebai ch ab si s-m-ho'ige'elid. <sup>4</sup>Kuni hi wa chum pi hohho'id mant tash an wo m-u'ukch ch hekaj ab si i m-tahni mapt ab wo si s-t-ho'ige'elid k am he'es wo i kaiha ihda al shopol ha'ichu t-ahga.

<sup>5</sup>“Am att cheh ihda o'odham. Kuki wa wehsko sha'i si ha kudut g t-wehm o'odham ch am i ha chu'amun mat wo cheggia g kownal ch pi apko ha wanimed mat ab wo i hema s-wohoch mo pi d wohokam ch ab Nazareth t amjed. <sup>6</sup>Kutt am cheh mat ep chum uamhu g ge'e cheopi ab Jerusalem t ab. Kutt hekaj an bei matt wo lodai g t-chehanigkaj. <sup>7</sup>T wabshaba g shondal ha-ge'ejig Lysias am i wahk k si s-bagam am t-wohppo'id <sup>8</sup>k ha cheha mat ia ha'ab wo i e bei m-wui. Kutsh hegam mo ab ha'ichu abchud ab m-wui wo gagda. Pt hems ab wo ha'ichu kakke ihda o'odham k wo s-mai ab amjed wehs ha'ichu mach haschu ab i abchud.” <sup>9</sup>Neh, bo kaij. T wehsijj am wohokamch hegam Tutuligo mat am e nam.

**Matsh am hejel e wehhejed neo g Paul ha wui am kaichudch g Felix.**

<sup>10</sup>T ab i ai g Paul. T g kownal ab ahgi mat am wo neo. K hab kaij:

“Tash ap ia d kownal ch ha lodait g t-wehm o'odham. Ni heg hekaj si s-ap ni-tahtk mant am wo hejel ni-wehhejed neo m-tahgio. <sup>11</sup>M apt wo i hoan k wo wohokamch mo pi woho g ha'ichu ha-ahga idam.

“Do wabsh i gamai gohk tash mant am hih Jerusalem wui hab ahgk mant ab wo ihm g Jiosh. <sup>12</sup>Kunt pi woho sha'i hedai kam'o am ge'e cheopi ch ed k pi woho sha'i am ha kudu g hemajkam amai o hebai i am Jerusalem ch ed. <sup>13</sup>Pi at wo sha'i e nako mas wo wohokamch hegai mo haschu ab i ni-abchud no pi pi woho.

<sup>14</sup>“M o hi wa woho mani ab ihm g Jiosh am oidch ihda himdag mo idam hab elid mo pi d wohokam. K eda d wa'i Jiosh mani ab ihm ch d ha-Jioshga g t-shohshon. Kuni wehs ab s-wohog elid g t-chehanig ch hegai mat g kekelibad Jiosh ha'ichu i tashogiddam an o'oha. <sup>15</sup>Ni-wehm o'odham o s-wohochud mat g Jiosh ab wo i ha wuwhas g ko'i muhkig t amjed k ab wo i ha gawulkai g s-ap'ekam k gam hu wo i ha gawulkai g pi ap'ekam. Ni ahni hab wa'ap s-wohochud ihda <sup>16</sup>ch hekaj chum hekid am si ni-nakog mant am hab wo wa'i junihid g s-ap'ekam ch hab pi wo sha'i ha'ichukaj si ni-el am tahgio g Jiosh ch am ha tahgio g hemajkam.

<sup>17</sup>“Tash ani gam hu oimmed am ha oidk g gawul mahs hemajkam ch pi ab hu ha'ichug Jerusalem t ab. T hegam gawul mahs hemajkam ab i to'ahi g lial k am ni-nuhkudach mant am wo i ha u'i g ni-wehm o'odham ab Jerusalem t ab. Nt heg ab ha mah am jiwiaik



k am hahawa i ni-dagito Jiosh wui k ab ihm ch am hab wua g iagchulida ge'e cheopi ch ed. <sup>18</sup>K pi sha'i mu'i ni-wehmaj. Kuni pi d sha'i ahni manis am i shonwua g kudutadag. <sup>19</sup>K wabshaba d hegamat am ni-chehg k am i shonwua g kudutadag k d ni-wehm o'odham ch ab dada Asia jewed t amjed. T ia wo chum u'apa m-wui hegai mo haschu ab ni-abchud k wabshaba pi ia hu dada. <sup>20</sup>T idam m ia gegok am wo chum ah matp woho cheh g pi ap chu'ijig ab ni-ab mant wa am i kekiwua ha wui g e jehnidam. <sup>21</sup>Ahni ant wo em-ahgi mani wa hab kajj, 'Ia am ni-lodait id i tashkaj heg hekaj mani ab s-wohochud mat g ko'i uhpam wo i wuwha ab muhkig amjed.' Na'as id pi hohho'id." Neh, bo kajj g Paul.

<sup>22</sup>Felix o si s-ap s-mahch ihda Jesus himdag. Kut am i ha'asa neo g Paul. T g Felix am i kuhgi g ha'ichu kaihama hab kajjch, "M ant wo wa i apch ihda mat hekid wo i jiwia g Lysias ab Jerusalem t amjed." <sup>23</sup>Neh, bo kajj ch am hahawa cheha g shondal ha-ge'ejig mat am wabsh wo i u'ukchid g Paul ch wabshaba hi wo wa hiwigidad matp hems am wo neidad g naipijjuch am wo ha'ichukaj i wehmtad.

**Matsh g Felix am ep kaiha g Paul g e-wehm kihkam wehm.**

<sup>24</sup>K g felix wehm kihkam d Tuhligo ch hab chehgig Drusilla. Sh idam ab s-kaimk g Paul. Tsh g Felix am ha cheha mant am wo i wahki g Paul. Sh heg am ha ahgid am jiwiak mant ab wo i chum s-wohoch g Jesus Christ. Sh am

hugkam wabsh s-ap kaiham idam. <sup>25</sup>Sh am hahawa i ha ahgidahim mat am wo i e dagito s-ap'ekam wui k pi am hu hab wo junihid g pi ap'ekam no pi e aihim mat g Jiosh gam hu wo i ha gawulkai g pi ap'ekam hemajkam. Tsh g Felix si s-ehbenid k hab kajj, "Oi g gam hu hihm. M ant wo wa ep i m-wai mat hekid am wo s-ni-ap'ek." <sup>26</sup>K eda hab chum em-ahg mat g Paul wo ha'i namkid g lial mat wo dagito ch heg hekaj mu'ikko ab i wappaid mat am wo wehmaj neo.

<sup>27</sup>Kut am i e ba'iwich g gohk ahidag. T am hema ep dahiwua g kownal Felix kehkud ed k hab chehgig Porcius Festus. T wa eda g Felix pi sha'i dagito g Paul no pi si tatchua mat si s-ap ab wo i nei g Tutuligo.

**Matsh g Paul ab wo i gei si ge'e kownal wui**

**25** Sh am d i waik tash amjed mat am i dahiwua g Festus Cesaria t am, tsh gam hu hih Jerusalem wui. <sup>2-3</sup>Tsh ab wui i hihi g u'ugchu papal ch ge'eged hemajkam k am ahgid hegai mo haschu ab i chum abchud g Paul ch ab si tahni mat ab wo i bei Jerusalem wui. Kush eda idam am heki hu e a'aga mat wo mua g Paul mat ab wo u'ad.

<sup>4</sup>Sh hab kajj g Festus, "Am o d wabsh kia lihso Cesaria t am. Nt eda hemuch am uhpam wo hih.

<sup>5</sup>Kumt am ha'i wo ni-oid k am wo ah mam haschu ab abchud."

<sup>6</sup>K am dakahim g Festus am hu i hemako domig k gam hu hahawa hih Cesaria wui. T hegam ge'eged hemajkam gam hu ep hihi.

Ba'ich i tash at am i dahiwua g Festus lodaita kih ch ed k am ha chehani mat am wo i wahki g Paul. <sup>7</sup>T am i wahki. T an wehgaj gegokiwua k ab ha hekaj si pi ap ha'ichu abchud ch wabshaba pi e nako mas wo wohokamch ihda.

<sup>8</sup>T g Paul am e wehhejed neok k hab kajj, "Pi ant ha'ichu sha'i pi ap hab juh manis melchkwua g t-chehanig ahchim Tutuligo k pi sha'i uamhu g ge'e cheopi k pi ab hu sha'i wui kehk g kownal."

<sup>9</sup>K hab kajj g Festus ab wui, "Pt hig am wo hih Jerusalem wui mant am ha'ab wo m-lodai." Bo kajj no pi hab elid mat wo s-hohho'i g Tutuligo.

<sup>10</sup>K hab kajj g Paul, "Ia ani kehk kownal lodaita kih ed mant ia ha'ab wo chum ni-lodaitach. Am ap wa si s-mahch mant pi ha'ichu am hu hab sha'i juh mas pi ap'e am ha wui g ni-wehm o'odham. <sup>11</sup>Pi ant ab hu wo em-tai mams wabsh wo ni-dagito matp hab wo sha mahsk mant mul g chehanig. M o wa s-ap'e mant wabsh wo ni-muhkid mantp am hugkam mul. K wabshaba pi woho hegai mo ab ni-abchud. T heg hekaj pi hedai wo e nako mas ab wo i ni-dagito ha wui. Ab ant wui wo i gei g si uhgchu kownal." Neh, bo kajj g Paul.

<sup>12</sup>K eda am dadha hegam mo am ha'ichu i shelamid ch am a'aga ihda. K g Festus ab ha kahk ch hab hahawa kajj ab Paul wui, "Neh, pt hemho wa am wo e u'apa si uhgchu kownal wui napt pi ab wui i gei."

**Matsh g Agrippa ch Bernice  
am kaiha g Paul**

<sup>13</sup>K am hu hebai hema d kownal ch hab chehgig Agrippa. Sh g uwi

wehngaj hab chehgig Bernice. Tsh idam am chehgio g Festus noki pi s-ap ab i neid.

<sup>14</sup>Sh am he'ekia i tash amjed, sh am ha ahgid g Festus ab amjed g Paul ch hab kajj, "Ia o hema kuhipi g o'odham ch hab chehgig Paul. T g Felix pi i wuhshad. <sup>15</sup>Kunt wa am hih Jerusalem wui k am ha nei g Tutuligo u'ugchu papal ch ge'eged. K hegam ab ha'ichu abchud ihda lihso ch ab ni-chehani mant wo mua. <sup>16</sup>Ni wabshaba am ha ahgid mo pi hab mahs g t-kownalig chehanig. T hemho wa wehpeg am wo i e hudaw g lihso ha wehm hegam mo ab ha'ichu abchud k am wo neo e wehhejed. T g kownal ab haha wo mah g namkidadgaj.

<sup>17</sup>"T wa woho i dada hegam Tutuligo ha wanimeddam. Nt am ha hekaj dahiwua kownal daikud ed mant wo ha kaiha. Kumt ab i wahki g lihso. <sup>18</sup>T am gegokiwua hegam mo ab ha'ichu chum abchud. Kuni hab ni-ahg matp hems ge'e ha'ichu ab wo abch ab t-chehanig amjed. <sup>19</sup>K wabshaba ab wabsh e-himdag amjed ab ha'ichu ne'owin ch heg amjed ehp o'odham mash hab chehgig Jesus ch atsh heki hu muh. K eda g Paul hab kajj mat uhpam e chegito.

<sup>20</sup>"Nt am wabsh i pi ni-amich mant has masma si tasho ha'ichu wo s-mai ab amjed k heg hekaj ab kakke g Paul mas wo s-hohho'i mat am uhpam wo hih Jerusalem wui k ab ha'ab wo e lodaitach. <sup>21</sup>K wabshaba ab t-ahgid g Paul mat ab wo i gei si ge'e kownal wui mat heg am wo mamche hegai mo haschu ab i abchud. Nt wa woho am ha

cheha g shondal mat wo si nuhkud k ab wo ai mat am wo e u'apa si ge'e kownal wui.”<sup>22</sup> KUSH hab kajj g Agrippa am Festus wui, “Ahni ani hab wa'ap chum s-kaimk ihda o'odham.”

Sh hab kajj g Festus, “Pt wo wa kah si'alim.”

<sup>23</sup>K am ba'ich d i tash, t hab masma i ha wahpki g Festus mo d si s-has haha'ichu idam Agrippa ch Bernice. K hegam ep ha wehmaj mo d si u'ugchu shondal ha-ge'ege'ejig ch hegam mo d si s-has haha'ichu heg eda kihhim. Kumt am i wahki g Paul. <sup>24</sup>K g Festus hab hahawa kajj: “Ahpi Agrippa map d kownal ch ahpi s-has haha'ichu o'odham, m ia kehk em-wui ihda o'odham. K g Tutuligo iia kch ab Jerusalem t ab ab ha'ichu abchud ab ni-wui ch am si e gewpkad mat hemho wa wo e mua. <sup>25</sup>Nt wabshaba pi sha'i cheh g chu'ijigaj mas heg hekaj wo e muhkid.

“K heg wa hejel hab kajj mat ab wo i gei si ge'e kownal wui. T hekaj hemho wa am hab wo e juh. <sup>26-27</sup>Ni wabshaba pi ni-amichud mant haschu am wo o'ohani g si ge'e kownal ab amjed. K pi hab chum mahs mas am wo e u'apa g lihso pi am hu tasho ahgk mas haschu d chu'ijigaj. Nt heg hekaj ia u'apa em-wui mant am wo i kaiha, wahm ahpi Agrippa map d kownal. Ntp hems haha wo s-mai ab em-amjed mant haschu am wo o'oha.”

**Matsh am e wehhejed neo g Paul am wui g Agrippa**

**26** K hab kajj g Agrippa ab wui g Paul, “B ant

m-mah g ap'edag mapt am hejel e wehhejed wo neo.” T ab ha ba'ich i kekiwua g Paul k am e wehhejed neok <sup>2-3</sup>k hab kajj:

“Agrippa map d kownal, ahpi ap s-mahch g t-himdag ch ha'ichu pi t-ap'edag ahchim Tutuligo. Ni heg hekaj si s-ap ni-tahtk mant ab m-wui wo neo id i tashkaj ab amjed hegai mo haschu ab chum ni-abchud g ni-wehm o'odham. Kuni ab i m-kakke mapt ab wo si i ni-kaiham k ab wabsh wo i ni-bahbgi.

<sup>4</sup>“S-mahch o g ni-wehm o'odham mani has i masma ga hu i amjed mani d wabsh kia si ali nani pi wa eda am wabsh i kih ni-jewedga ed ab Jerusalem t ab. <sup>5</sup>Dani Palasi wohochuddam. K g ni-wehm o'odham s-mahch mani am si s-gewkam oid g t-himdag. <sup>6</sup>Ia ani kehk ch wo ni-lodai nani pi ab s-wohochud mat g Jiosh woho hab wo juh hegai mat haschu am ha ahgi g t-shohshonbad. <sup>7-8</sup>Bo ha ahg mat uhpam wo i ha wuwahas g ko'i ab muhkig t amjed. Id o chum s-wohochud g ni-wehm o'odham ch eda s-ni-lodaitamk nani pi s-wohochud mat hab i juh.

<sup>9</sup>“Bani wa wa elid mant am wo si i ni-nakog k wo shohbi g himdaj hegai Jesus mo ab Nazareth t amjed. <sup>10</sup>Ni wa wa woho am hab chum ni-junihim amai Jerusalem t am. T wa g u'ugchu papal ab i ni-mah g ni-ap'edag. Kunid mu'i ha kuh hegam mo ab s-wohochud hegai himdag k ha wehm ap'ech g e jehnegiddam mant wo ha kokka. <sup>11</sup>Kunt wa mu'ikko am ap'ech mant wo ha sho'igch an i a'ai ha-chechopi

ed k am chum ha chehani mat hab wo chei mo pi ap'e hegai Jesus. Kunid wa sha'i si s-ha keh'id ch am i ni-nako mant am i wah gawul jewed kihhim ch ed mant wo ha sho'igch amai.

**Matsh am ep ah matsh has  
masma gawul juh g e-chegitoidag  
ab amjed g Jesus**

<sup>12</sup>“Kunid wa ab si ha tai g u'ugchu papal g ni-ap'edag k am hih Damascus wui heg wa si hekaj mant wo ha kuh hegam mo s-wohochud mo hegai Jesus d Jiosh si Kehsha.

<sup>13</sup>“Pegih neh, ahpi si s-has ha'ichu, am achd hihim wohg ch ed am hu i dahm juhk. Kud am hab e juh mat am ba'ich i s-mahs ton mo g tash tonlig an t-wehgaj. <sup>14</sup>Kutt wehsijj i shul am jewedo.

“Kunid ahni kah mad ab hema neok ni-wui g ni-ne'okikaj ch hab kaij, ‘Saul, s-wohom ap hig chum ni-sho'igchud ch wabshaba hejel s-ko'okam has e wua.’

<sup>15</sup>“Kunid si has elid ch hab kaij, ‘Dohp wud ch ab neok?’

“Kud hab hahawa ep kaij, ‘Dani ahni Jesus map ha sho'igchud hegam mo ab si ni-ihm. <sup>16</sup>Ab g i wamig k kekiwua. Ia ant i ni-chehgi m-wui mant am wo i m-kei mapt d wo ni-pionagk. Kupt am wo ha ahgi g hemajkam ihda map neid ch kah. Kunt am ha'ichu ep wo m-chehgi imhab i ba'ich. Pt heg am ep wo ha ahgi. <sup>17</sup>Nt wo m-do'ibia ab ha amjed g m-wehm o'odham. Kupt am wo ahgahid g ha'ichu ni-ahga am ha wui g gawul mahs hemajkam. Nt am ep wo m-nuhkud

k wo m-do'ibia ab ha amjed. <sup>18</sup>Kupt am wo i ha tashogi mo pi am hu ni-tatchui oidch hab e junihim ch am wabsh jiauwul tatchui oidch hab e junihim. T ab wo m-kaiham k ab wo i e dagito ni-wui. Nt hekaj gam hu hab wo i juh g pi ap ha-chu'ijig k hab wo ha juh mat d wo ni-hemajkamgak.’ Neh, bo kaij g Jesus ab ni-wui.

**Mash am ahg g e-chikpan mo  
am hab junidahim g Jesus**

<sup>19</sup>“Pegih neh, Agrippa map d kownal, bad wa masma am i e chehgi ni-wui hegai mo d si ge'e kownal am wehs ha'ichu dahm k hab wa masma ni-cheha. Kunt ahni ab wohog elid <sup>20</sup>k am ha hekaj i ahgahi Damascus t am g ha'ichu ahgaj k amjed am ahgahi Jerusalem t am ch wehsko Judea chekshani ch ed. K am hahawa ni-tashogid g Jiosh mant am ha wui wo hih g nahnko mahs hemajkam. Ni am mu'ikpa ha ahgidahim mat gam hu wo s-ohhod g pi ap e-chegitoi k ab wo i e nohnogi Jiosh wui k amjed hab wo junihid g s-ap'ekam. <sup>21</sup>Neh, k d ihda mad heg hekaj an ni-bei g ni-wehm o'odham am ge'e cheopi ch ed k chum alo ni-mua. <sup>22</sup>K wabshaba ia'i himdam g Jiosh am ni-wehmaj ch ni-nuhkud. Ni heg hekaj ia kehk ch am si tasho em-ahgid ahpim mam d s-has haha'ichu mani haschu am ep ha ahgid g sho'ig hemajkam. K ihda ha'ichu ni-ahga d wa'i hegai mo haschu g Mosesbad ch hegam kekelibad Jiosh ha'ichu i tashogiddam am heki hu ahgahim mat am hab wo

e juh. <sup>23</sup>Sh idam am ahg matsh wa g Jiosh si Kehsha wo e sho'igchud k wo e muhkid k uhpam wo i wuhsh ab muhkig t amjed k id hekaj wo kuhpi'o g do'ibidiadag am ha wehhejed g Tutuligo ch nahnko mahs hemajkam."

<sup>24</sup>Neh, bo wa masma hejel e wehhejed neok g Paul. K g Festus ab si s-kaidam hab kaij, "Ahp i aptki wabsh e lohgoch, Paul. Ha'ichu m-mahchig atki wabsh m-lohgoch."

<sup>25</sup>K hab kaij g Paul, "Pi ant sha'i ni-lohgoch, si s-has ha'ichu Festus. Hegai mani haschu hab ahg d si wohokam <sup>26</sup>ch am wabsh si tasho hab e junihim t-shahgid. K g Agrippa wehs s-mahch.

<sup>27</sup>Agrippa map d kownal, m ap wa s-ha wohochud g Jiosh ha'ichu i tashogiddam."

<sup>28</sup>K hab kaij g Agrippa ab wui g Paul, "Nap hab elid mapt ha hekaj wabsh s-pehegi wo i ni-nodagi id wui Jesus himdag?"

<sup>29</sup>K g Paul hab kaij, "Chum anis ha hekaj o gam hu ba'ich. K wabshaba g ni-ho'ige'idahuna am Jiosh wui d ihda mamt wehsijj ahpim mam am ni-kaiham id tashkaj hems ab wo s-wohochud k hab wo chu'igk mani ahni ch wabsh hi wo wa pi e wupulshch g e hukshchim wainomikaj."

<sup>30</sup>T am hahawa wehs i gegokiwua <sup>31</sup>k ab a'ai e wui hab kaij am hihimadch, "Pi atki ha'ichu has sha'i juh ihda o'odham mat hekaj wo e muhkid o mas wo e kuhpach."

<sup>32</sup>K hab kaij g Agrippa ab wui g Festus, "T wo wa chum e dagito ihda mat hems pi ab hu wo e ah mat ab wo i gei si ge'e kownal wui."

### Mamtsh am ui g Paul Rome wui

*An g neid g jewed o'ohadag 907*

**27** Mt am hahawa dagito g Paul ch ha'i ep lilso shondal ha-ge'ejig wui mat am wo i ha ui ge'echu kownal wui. Id o hab chehgig Julius ch d ha-ge'ejig hegam mo hab e a'aga Ge'echu Kownal Shondalig.

<sup>2</sup>K am hema daha g ge'e wahlko ch atsh am gahi wo i wua Asia jewed wui. T g Julius g e-shondalig ha wehm am ha ui g lilso k am i chehchsh heg ab wahlko. Nt ahni Luke ep ha oi. T heg ha oi Aristarcas mo ab d kihkam Thessalonica t ab am Macedonia jewed ch ed. Kutt am gahi i shul g ge shuhdagi.

<sup>3</sup>Am ba'ich i tash, tt am dada Sidon kihhim t am. K eda g Julius s-ho'ige'id g Paul ch hiwigi mat am wo him k wo ha nei g e-naipijju mat hegam wo dagio'i.

<sup>4</sup>Tt amjed am hahawa gahi ep i shul. K wabshaba g hewel ab si s-gewkam med huduni tahgio t amjed ab t-wui. Tt hekaj an bibbij Cyprus jewed wehgaj mat pi wo heb hu t-wi'ichkwua. <sup>5</sup>T am hebai i cheka. Tt am gahi i shul hegai ge shuhdagi mo an miabidch g Cilicia jewed ch Pamphylia jewed k ga hu dada mash ab d Myra kihhim am Lycia jewed ch ed. <sup>6</sup>T amai g shondal ha-ge'ejig am hema ep cheh g ge'e wahlko. Id ash ab Alexandria t amjed am Egypt jewed ch ed ch atsh gam hu wo gahi i gei Italy jewed wui. Kutt heg ab i chehchsh <sup>7</sup>k am gahi i shul.

K wabshaba ab t-wui hewed he'ekia i tash. K hekaj wabsh

s-bahbagi him g wahlko ch am hu wa has masma ga hu jiwia Nidas kihhim t ab. T ab i t-shohbi g hewel. Kutt hekaj inhab sha'al i t-nohnogi wakolim tahgio ab wui hegai al jewed mo hab chehgig Crete. K an s-mu'ukam i koa g jewed. K hab e a'aga Salmon Koa. <sup>8</sup>Kutt heg hugid an bihbij k am hu wa has masma ga hu dada mash hebai s-ap dadhaiwup g wapalko. K ia amjed pi sha'i mehk hegai kihhim mo d Lasia.

<sup>9</sup>Kuttki pi oi ba'ich hihim k ab wabsh ai mat wo si hewedad s-hehpich'ed. T hekaj wo s-ta ehbidamak matt am gahi wo i shul.

K g Paul am ha'ichu chum ha ahgid <sup>10</sup>ch hab kaij, "Neh'e! Bani masma neid matki wo s-ta ehbidamak matt am gahi wo i shul ia'i amjed. T am hu wo e padch g wahlko ch hegai mo mohto. Kutt p hems ep wo ha'i t-ko'ij."

<sup>11</sup>T wabshaba g shondal ha-ge'ejig ab si s-ha wohoch g wahlko nuhkuddam ch enigakam k pi ab hu kaiha g Paul mo ab chum ha ahgid. <sup>12</sup>Pi o apkodag amai ha wehhejed g wapalko s-hehpich'ed. K heg hekaj mu'ijj hab kaij matt am gahi wo i shulig k wo chum si s-ahim g Phoenix kihhim am Crete t am. Am o e shohbidch g shuhdagi to'otonk. K g wapalko am wabsh s-ap dadhaiwup.

**Matsh g s-gewk hewel am  
ha ai ge kahchki ch ed**

<sup>13</sup>Kut ab s-bahbagi i meh g hewel wakolim tahgio amjed. K hab e ahg hegam mo himchud g wahlko mat am hab wo e juh mat has

masma am e a'aga ch heg hekaj am wupulshpi'o g wahlko k am himch si miabidch g jewed hugidag.

<sup>14</sup>T wabshaba ab haha wabsh s-gewkam i meh g juhpin hewel ab jewed dahm amjed <sup>15</sup>k ab si s-ta ehbidam wi'ichkwua g t-wahlko. Kut am i pi e nako mas wo mo'oshk himch g wahlko ihda hewel. Kutt am wabsh i dagito k wabsh hiwigi g hewel mat am i t-wi'ichkwuhi.

<sup>16</sup>K am hema al jewedag ch hab chehgig Cauda. K hi wa sha e shohbid matt an wecho bihbij. K eda am wabsh kia e chewaimed g al chum wahlko shuhdagi ch ed. Kutt am hahawa s-hasigam i cheshaj.

<sup>17</sup>T g chikpandam an hahawa si s-wihnam wupulsh g ge'e wahlko mat pi wo e padch. Am attp hems wo t-wi'ichkwua jewed wui. T g wahlko am hu wo e hiash hia ch ed. T heg hekaj g chikpandam ab i huhuds hegai lohna mo hekaj himchud g wahlko k wabsh hiwigi mat g hewel am i t-wi'ichkwuhi. <sup>18</sup>T ihda sha'i si s-gewk hewel pi sha'i ha'asa. K am ba'ich d i tash. T gam hu i shul hegai mo mohto g ge'e wahlko. <sup>19</sup>K am ba'ich d ep i tash. K am wabsh kia si hewed. T gm hu i nehnc g hejel e-nohnoikaj hegai mo haschukaj chum himchud g ge'e wahlko mat wo si i haukai.

<sup>20</sup>Kutt mu'i tashkaj pi sha'i nei g tash tonlig o g huhu'u. K am wabsh i med g s-gewk hewel. Tt am hu hebai hab haha wabsh i t-ah mattki pi wo sha'i t-do'ibia.

<sup>21</sup>Kuch tash pi ha'ichu sha'i ko'a. T g Paul ab i ha waid k hab kaij, "Mamt hems ab wo ni-kaiha, kutt pi ab hu wo chum gahi i shul

ab amjed matt wa ab dadhaiwua. Neh, t idani chum pi wo e padch g wahlko. T g ha'ichu mohtoi pi wo heb hu e shul. <sup>22</sup>Mt wabshaba pi has wo sha'i e tahtkkad. Pi amt hedai wo sha'i e muhkid. Heg at wa'i wahlko wo e padch. <sup>23</sup>Id ani s-mahch nat pi hema am i e chehgi g anghil ni-wui <sup>24</sup>k hab kajj, 'Pi g sha'i ha'ichu ehbidad, Paul. Hemho wa apt am wo kekiwua si ge'e kownal wui. T g Jiosh ab i m-kaiham k wehs wo ha do'ibia hegam mo m-wehmaj.' Neh, bo kajj g anghil ab ni-wui.

<sup>25</sup>"Kumt am wo si i e gewpkai. Jiosh at woho hab wo juh hegai mo haschu am ni-ahgid g anghil <sup>26</sup>k ab wo t-u'apa g hewelkaj mo ab hebai al jewedag shuhdagi ch ed."

<sup>27</sup>Am d i gohk domig amjed mat am t-ai g s-gewk hewel, t eda i e huh g s-chuhugam. K am wabsh kia t-wi'ichkwuhim. K hegam wahlko nuhkuddam hab elid mach aihim mash ab hebai jewedag <sup>28</sup>ch heg hekaj am ha'ichu s-wehch i huduni g wijinakaj an wudk mat heg hekaj wo s-mai mas he'es i s-juhk. T ged hu si taht g jewed mat siant gokko wehst-mahm (120) tad wijina hekaj. Kut ab i wanchkwua ihda s-wehch ha'ichu. K am sha'i he'es, t am ep i huduni. T ged hu ep si taht g jewed mat humukto wehst-mahm (90) tad wijina hekaj. <sup>29</sup>T am i s-mai moki ab aihim mo ab hema jewedag k s-ehbid mat am hu ab wo gei hohodai ch ed g wahlko. T hekaj gi'ik am shul g s-wehch wapainomi mo hekaj wulshshap g ge'e wahlko k am hahawa si e ho'ige'idahu mat wo mahsij.

<sup>30</sup>K ha'i hejel s-e do'ibiamk g wahlko nuhkuddam ch am i huduni g al chum wahlko shuhdagi ch ed hab wabsh s-e junimk mat am ha'i ep wo i huhuds g wupulshpadaj g wahlko. <sup>31</sup>K wabshaba g Paul hab kajj ab wui g shondal ha-ge'e'jig ch hegam shondal, "Pi amt wo sha'i e do'ibia matp wo sha t-dagito idam wahlko nuhkuddam." <sup>32</sup>T hekaj g shondal an si hikkumia g wipijina mo an hekaj wulshch g al chum wahlko. T ged hu gei shuhdagi ch ed.

<sup>33</sup>Kuki eda mahsihim. K g Paul am ha chehani mat wo ha'ichu huh hab kajjch, "Do wa'i gohk domig mamt amjed pi ha'ichu huh nam pi e kudut id hekaj pi t-ap'edag. <sup>34</sup>Mt ab hig wo ha'ichu hug k ab wo i e gewpkai. Hemho wa amt wehsijj wo e do'ibia." <sup>35</sup>Neh, bat che'ioik am ha hekaj bei g pahn k ab si ihm g Jiosh wehs ha wehhejed k am hahawa i hahain k huh. <sup>36</sup>T wehsijj am i neidok ab si i e gewkemhun k am hahawa ha'ichu huh. <sup>37</sup>Kuch eda d gohk siant wewa'akko gamai chuhdp (276). <sup>38</sup>Tt am i wehsijj kokwod. Kut am hahawa ep i chikpan k gm hu shul g pilkani ge shuhdagi ch ed mat wo si i haukai g ge'e wahlko.

#### **Matsh am e padch g ge'e wahlko**

<sup>39</sup>T am i mahsi, t g wahlko nuhkuddam pi sha'i amich hegai jewed mattki ab wui i wuwha. K eda am s-tadaniko i wahks g shuhdagi ch pi hohodaig an hugidaj an. T hab i e ah mat am wo himch g wahlko. Tp hems ab s-ap wo dahiwua heg eda. <sup>40</sup>T hekaj am si



hikkumia g wupulshpadaj. T im hu shul shuhdagi ch ed. K eda an wupulshch hegai mo hekaj s-apko e himchud g wahlko. Kumt gam si wuhpul'o k am hahawa wabsh i cheshaj hegai lohna mo gam hu ba'ich hab chu'ig. T g hewel am t-wi'ichkwua am wui mo am i wahks g shuhdagi. <sup>41</sup>T wabshaba ged hu si e hiash g wahlko mo'o o'od ch ed mat koi am hu i wah. K eda sha'i si s-gewkam ab i hihhim g shuhdagi to'otonk. Kut hegai mo gam hu oidch hab chu'ig gam si e ohmi.

<sup>42</sup>T g shondal am i e ap'ech mat wehs wo ha kokda g lilso mat pi wo i e watchwihim k wo heb hu wohp. <sup>43</sup>T wabshaba pi ha hiwigi g ha-ge'ejig nat pi s-do'ibiam g Paul k am wehsijj ha chehani mat wo i e watchwihi am jewed koa wui. Tsh hegam mo s-mahch g watchwi am wo i nehni k hehe'ejel wo i e watchwihi. <sup>44</sup>T heg ha'i am wo i ha oi an e u'ukch u'us t an mat ab e ohmi g wahlko. Kutt hab masma wehsijj t-do'ibia ga hu ak mo ab i koa g jewed.

#### Matsh ga hu ai g Malta jewed

**28** <sup>1-2</sup>Kuki am ha'i d o'odham ch si s-ap i e taht k ab i t-neid k si s-t-nawojima. Kutt s-mai mash ihda al jewed d Malta. K eda juhk ch s-hehpid. Kutki am ge t-nahj. <sup>3</sup>T g Paul am ha'i ku'a mat am wo si i mehmed g nahda k am toa mei ch ed. T g ko'oi ab hema si i da'iwush tonidk k an ki'ish nowij an.

<sup>4</sup>T g kihkam am i nei ihda ko'oi mo an ki'ishch g Paul k hab kajj ab

a'ai e wui, "Id oki d ha mu'akam ch hi wa chum pi e muhkid am shuhdagi ch ed. Kuki am hab wa mahs matki hemho wa wo e muhkid k ab wo bei g s-ko'ok e-namkidadag." <sup>5</sup>K wabshaba g Paul am si e nowigid ch gam hu wua g ko'oi mei ch ed k pi sha'i ko'okam e juh. <sup>6</sup>K idam kihkam am chum neid mat wo i tosko o wabsh chum hekid wo muhk k i gei. T wabshaba gam hu wabsh i mehko. T oi wa pi ha'ichu has sha'i juh g Paul. T am hahawa gawul ep i e ah k hab kajj moki d jiosh.

<sup>7</sup>Ha-ge'ejig idam hemajkam o hab chehgid Publius ch am wa'i mia oidag. Kuch am wehmaj dadkkahim waik tash nat pi si s-ap ab i t-nei.

<sup>8</sup>Kuki g ohgaj wo'ok ch mumku g s-tonjigkaj ch wakuidagkaj. T g Paul am i wah mo am wo'o k an tahtam k am i tai g Jiosh mat wo doaj. T wa woho hab e juh mat doaj.

<sup>9</sup>T am i nei ihda g hemajkam. T am hahawa mu'i ep dada g kok'odam k e dodaj. <sup>10</sup>T hekaj ab si has i t-elid k sha'i mu'i ha'ichu t-mah. Am hu i hebai mat am i e ai matt wo hihi, t ab ep i t-mah hegai matt haschu wo i tatchuad am gahi ep i shuligk.

#### Matsh gam hu dada Rome t am

<sup>11</sup>T eda hema wuhshad g s-hehpich'ed g ge'e wahlko ch hab e a'aga Kukadi Jijosh ch ab Alexandria t amjed. Am d i waik mashad, tt heg ab gam hu gahi i shul juhpin tahgio wui <sup>12</sup>k ga hu dada mo am d Syracuse kihhim. Am d i waik tash, <sup>13</sup>tt gam hu gahi ep i shul juhpin tahgio wui k ga hu dada mo am d Regium kihhim.

Am ba'ich d i tash, t ab i meh g hewel wakolim tahgio amjed. Tt hekaj s-hohtam gam hu dada mo d i gohk tash mash am d Putoli kihhim am gahi i shuligk. <sup>14</sup>Kuki am ha'i kih g t-wehm wohochuddam ch ab si t-ahgid mattsh am wo ha wehmajkahim hemako domig ab. Kutt wa woho hab t-juh k gam hu hahawa hihi Rome wui. <sup>15</sup>Kutsh wa heki hu am kah hegam t-wehm wohochuddam ab Rome t ab mattsh am wo dada k atki meh k ab i hihi mat wo t-ho'ige'el. Kut ha'i idam am t-nam mo am d Waik Gegosidakud. T ha'i am ep t-nam mo am d Appius Nolawtakud. Kut ab i ha nei g Paul k ab ihm g Jiosh k ab si e gewkai.

**Mash has i masma am  
ha'ichug g Paul Rome t am**

<sup>16</sup>Kutt am dada Rome t am. Kumt wabsh hiwigi g Paul mat wabsh hejelko wo i chiwia. K g shondal am hi wa nuhkud.

<sup>17</sup>Mu'i o am kih g Tutuligo. K am d i waik tash. T g Paul am i ha wai g ha-ge'egedga e-kih wui. T am i e nam. K hab kajj ab ha wui:

“Ni-hajuni, am amt ni-lihsoch Jerusalem t am k ab i ni-dagito Rome chehanig wui. K eda hab wa chum mahs mant pi has chu'i ab ha wui t-hajuni o g t-himdag. <sup>18</sup>T hegam Rome t ab haha'ichu ab ha'ichu ni-kakke k chum s-ni-dagitoimk nat pi pi ha'ichu sha'i cheh manis heg hekaj wo ni-muhkid. <sup>19</sup>T wabshaba g t-wehm o'odham ab wui gegokiwua ihda. Kunt hekaj hab i ni-ah mantki hemho wa ab wo i gei si ge'e kownal wui mo hi wa chum pi am

hu ha'ichu d hegai manis ab wo ha abch g t-wehm o'odham. <sup>20</sup>Ab ani hiwig hegai Jiosh si Kehsha mach wehsijj nenida ahchim Tutuligo. Ni hab elid mo hema d hegai ch heki hu am i wuhsh. K eda mu'ijj g t-wehm o'odham pi wohochud mo d hegai ch hab s-ni-keh'id. Nt heg hekaj ab i em-wai mant em-wehm wo a'agad.”

<sup>21</sup>K hab kajj ab wui, “Pi at ab hu hedai sha'i t-o'ohani hegam ge'eged o'odham ab Judea t ab ab m-amjed. T pi hedai ia hu sha'i jiwia g t-hajuni ab amjed mas am hu i pi ap has m-ahg. <sup>22</sup>K eda wehsko g hemajkam mu'i pi ap has ahg ihda himdag mapsh ahpi s-wohochud. Kuch s-kaimk maps has wo chei ab amjed.” <sup>23</sup>Neh, bo kajj. T am hahawa a'aga k kei g tash mat wo e jehnigi.

T am him k am i e ai g tash. T mu'i am dada amai mo am daha g Paul k am i e jehnigi ge tash oidam k gam hu si huduni. K g Paul am i ha tashogid g Jiosh kownaltalig ch am si s-gewkam ha jehnidid mo g Jesus d hegai si Kehshaj g Jiosh mat wa ab amjed an o'oha g Mosesbad ch hegam kekelibad Jiosh ha'ichu i tashogiddam.

<sup>24</sup>T ha'i ab i s-wohoch ab kaiok. T wabshaba ha'ijj pi sha'i wohoch. <sup>25</sup>T am i pi sha'i e ap'et k hab e juh mat wo a'ai hihi. T hekaj id hab ep chei g Paul, “Do si wohokam mash wa has i kajj g Jiosh ab em-amjed ab Isaiaabad wui. K an hab chu'ig Isaiaabad o'ohana ed:

<sup>26</sup>Am g hihm k am hab cheh'i ha wui idam hemajkam:  
Mt wo kah g ha'ichu ni-ahga  
ch wo neidad mani haschu

s-kehg hab em-junid ch  
wabshaba pi wo amich mani  
d ahni ch hab wua ha'ichu.

<sup>27</sup> Em-chegitoidag at i e mehkod  
ab ni-amjed.

Kum pi chechkaidag ch pi ab  
hu ni-wui i e nohnogidamk  
mant wo i kegch g pi  
ap em-chegitoidag ch pi  
ap ha'ichu hab em-juni.

*Isaiah 6:9-10*

Neh, bo masma an o'ohadag mo id  
hab kaj g Jiosh.

<sup>28</sup> "Pegih, mtki pi ab hu wo  
kaiha g Jiosh ha'ichu ahga mat wo  
em-do'ibia. T g Jiosh heg hekaj

ab wo ha mah g gawul mahs  
hemajkam ihda do'ibiadag ahga  
mo ab chum s-em-mahkimk. T  
hegam ab hi wo kaiha." [<sup>29</sup>T am i  
ha'asa hab chei ihda g Paul. T gam  
hu a'ai hihi hegam mo ab kah si e  
ne'owinahimch.]

<sup>30</sup> K am kihkahim g Paul gohk  
ahid ab hema kih ed mo namkid ch  
am kih. K g hemajkam am chechga.

<sup>31</sup> K g Paul si s-ap e tahtk ch ab ha  
neid ch am wabsh si s-mahchim  
ha'ichu ha ahgid ab amjed g Jiosh  
kownaltalig ch ha mashcham ab  
amjed g t-kownalig Jesus Christ. K  
pi hedai sha'i shohbid.